

દશવૈકલિકસૂત્ર (આચાર્ય શયંભવસૂરિ)

(૧) દ્રુમપુષ્પિકાધ્યયન

ધમ્મો મંગલમુક્કિટ્ઠં, અહિંસા સંજમો તવો; દેવા વિ તં નમંસંતિ, જસ્સ ધમ્મે સયા મણ્ણો.	૧
જહા દુમસ્સ પુષ્કેસુ, ભમરો આવિયઈ રસં, ણ ય પુષ્કં કિલામેઇ, સો અ પીણેઇ અપ્પયં.	૨
એમેએ સમણા મુત્તા, જે લોએ સંતિ સાહુણો; વિહંગમા વ પુષ્કેસુ, દાણાભત્તેસણે રયા.૩	
વયં ય વિત્તિં લભ્ભામો, ન ય કોઇ ઉવહમ્મઇ; અહાગડેસુ રીયંતે, પુષ્કેસુ ભમરા જહા.૪	
મહુકારસમા બુદ્ધા, જે ભવંતિ અણિસ્સિયા; નાણા પિંડરયાદંતા, તેણ વુચ્યંતિ સાહુણોઠ ત્તિ બેમિ.	૫

(૨) શ્રામણ્યપૂર્વિકાધ્યયન

કંહ નું કુજ્જા સામણ્ણં, જો કામે ન નિવારએ; પએ પએ વિસીઅંતો, સંકપ્પસ્સ વસં ગઓ.	૧
વત્થગંધમલંકારં, ઇત્થીઓ સયણાણિ અ; અચ્છંદા જે ન ભુંજંતિ, ન સે યાઇત્તિ વુચ્ચઇ.	૨
જે અ કંતે પિએ ભોએ, લદ્ધે વિ પિટ્ઠિઠ કુલ્લઇ; સાહીણે યયઇ ભોએ, સે હુ યાઇ ત્તિ વુચ્ચઇ.	૩
સમાઈ પેહાઈ પરિવ્વયંતો, સિઆ મણ્ણો નિસ્સરઈ બહિદ્ધા, ન સા મહં નોવિ અહંપિ તીસે, ઇચ્ચેવ તાઓ વિણઇજ્જ રાગં.	૪
આયાવયાહિ યય સોગમલ્લં કામે કમાહી, કમિઅં પુ દુક્ખં, છિંદાહિ દોસં, વિણઇજ્જ રાગં; એવં સુહી હોહિસિ સંપરાએ.	૫
પક્ખંદે જલિઅં જોઇં ધૂમકેઉં દુરાસયં; નેચ્છંતિ વંતયં ભોત્તું, કુલે જાયા અગંધણે.	૬
ધિરત્થુ તેઝસોકામી, જો તં જીવિયકારણા; વંતં ઇચ્છસિ આવેઉં, સેયં તે મરણં ભવે.૭	
અહં ય ભોગરાયસ્સ, તં યડસિ અંધગવણ્ણિણો; મા કુલે ગંધણા હોમો, સંજમં નિહુઓ યર.	૮
જઈ તં કાહિસિ ભાવં, જા જા દિચ્છસિ નારીઓ; વાયાવિદ્ધુલ્લ હડો, અટ્ઠિઅપ્પા ભવિસ્સસિ.	૯
તીસે સો વયણં સોચ્ચા, સંજયાઈ સુભાસિયં; અંકુસેણ જહા નાગો, ધમ્મે સંપડિવાઈઓ.	૧૦
એવં કરંતિ સંબુદ્ધા, પંડિયા પવિઅક્ખણા; વિણિઅટ્ટંતિ ભોગેસુ, જહા સે પુરિસુત્તમોઠ ત્તિ બેમિ.	૧૧

(૩) ક્ષુલ્લકાચારાધ્યયન

સંજમે સુટ્ઠિઅપ્પાણં, વિપ્પમુક્કાણ તાઈણં; તેસિમેઅમણાઇજ્જં નિગ્ગંથાણ મહેસિણં.૧	
ઉદ્દેસિયં કીયગડં, નિયાગ મભિહડાણિ ય; રાઈભત્તે સિણાણે ય, ગંધમલ્લે ય વીયણે.	૨
સંનિહી ગિહિમત્તે અ, રાયપિંડે કિમિચ્છએ; સંવાહણા દંતપહોયણા અ, સંપુચ્છણા દેહપલોયણા અ.	૩
અટ્ટાવએ અ નાલીએ, છત્તસ્સ ય ધારણાટ્ટાએ; તેગિચ્છં પાહણા પાએ, સમારંભં ય જોઇણો.	૪
સિજ્જાયરપિંડં ય, આસંદીપલિઅંકએ;	

ગિહંતરનિસિજ્જા ય, ગાયસ્સુવટ્ટણાણિ ય.	૫
ગિહિણો વેઆવડિયં, જા ય અજ્જવવત્તિયા;	
તત્તાનિવ્વુડભોઇત્તં, આઉરસ્સરણાણિ અ.૬	
મૂલએ સિંગબેરે ય, ઉચ્છુખંડે અનિવ્વુડે;	
કંદે મૂલે ય સચ્ચિત્તે, ફલે બીએ ય આમએ.	૭
સોવચ્ચલે સિંઘવે લોણે, રોમાલોણે ય આમએ;	
સામુદ્દે પંસુખારે ય, કાલાલોણે ય આમએ.	૮
ધૂવણે ત્તિ વમણે અ, બત્થીકમ્મ વિરેયણે;	
અંજણે દંતવણે અ, ગાયાબ્ભંગ વિભૂસણે.	૯
સવ્વમેયમણાઇઘ્ઠં, નિગ્ગંથાણ મહેસિણં;	
સંજમંમિ અ જુત્તાણં, લહુભૂયવિહારિણં.૧૦	
પંયાસવપરિણાયા, તિગુત્તા ઇસુ સંજયા;	
પંચનિગ્ગહણા ધીરા, નિગ્ગંથા ઉજ્જુદંસિણો.	૧૧
આયાવયંતિ ગિમ્હેસુ, હેમંતેસુ અવાઉડા;	
વાસાસુ પડિસંલીણા, સંજયા સુસમાહિયા.	૧૨
પરિસહ રિઉદંતા, ધૂઅમોહા જિઇંદિઆ;	
સવ્વદુક્ખપ્પહીણટ્ઠા, પક્કમંતિ મહેસિણો.	૧૩
દુક્કરાઇ કરિત્તા ણં, દુસ્સહાઇ સહેતુ અ;	
કેઇત્થ દેવલોએસુ, કેઇ સિજ્જંતિ નીરયા.	૧૪
ખવિત્તા પુવ્વકમ્માઇ, સંજમેણ તવેણ ય;	
સિદ્ધિમગ્ગમણુપ્પત્તા, તાઇણો પરિનિવ્વુડેઠ ત્તિ બેમિ.	૧૫

(૪) છજ્જવણિકાધ્યયન

સુઅં મે આઉસં! તેણં ભગવયા એવ મફખાયં,	
ઇહ ખલુ છજ્જવણિઆનામજ્જયણં સમણેણં ભગવયા;	
મહાવીરેણં કાસવેણં પવેઇઆ સુઅફખાયા સુપણણતા,	
સેઅં મે અહિજ્જિઉં અજ્જયણં ધમ્મપણણત્તી.	૧
કયરા ખલુ સા છજ્જવણિઆ નામજ્જયણં,	
સમણેણં ભગવયા મહાવીરેણં,	
કાસવેણં પવેઇઆ, સુઅફખાયા સુપણણતા;	
સેઅં મે અહિજ્જિઉં અજ્જયણં ધમ્મપણણત્તી.	૨
ઇમા ખલુ સા છજ્જવણિઆ નામજ્જયણં,	
સમણેણં ભગવયા મહાવીરેણં,	
કાસવેણં પવેઇઆ સુઅફખાયા સુપણણતા;	
સેઅં મે અહિજ્જિઉં અજ્જયણં ધમ્મપણણત્તી.	૩
તં જહા-પુઢવિકાઇઆ, આઉકાઇઆ, તેઉકાઇઆ,	
વાઉકાઇઆ, વણસ્સઇકાઇઆ, તસકાઇઆ.	૪
પુઢવી ચિત્તમંત મફખાયા, અણેગજ્જવા;	
પુઢોસત્તા, અન્નત્થ સત્થપરિણાએણં. ૫	
આઉ ચિત્તમંત મફખાયા અણેગજ્જવા;	
પુઢોસત્તા અન્નત્થ સત્થપરિણાએણં. ૬	
તેઉ ચિત્તમંત મફખાયા અણેગ જ્જવા;	
પુઢોસત્તા અન્નત્થ સત્થપરિણાએણં. ૭	
વાઉ ચિત્તમંત મફખાયા, અણેગજ્જવા;	
પુઢોસત્તા અન્નત્થ સત્થપરિણાએણં. ૮	
વણસ્સઇ ચિત્તમંત મફખાયા અણેગજ્જવા;	

પુઢોસત્તા અન્નત્થ સત્થપરિણએણં. ૯
તં જહા-અગ્ગબીઆ, મૂલબીઆ, પોરબીઆ,
ખંધબીઆ, બીઅરુહા, સંમુચ્છિમા તણલયા
વણસ્સઠકાઠઆ સબીઆ, ચિત્તમંત મકુખાયા
અણોગજ્જવા; પુઢોસત્તા અન્નત્થ સત્થપરિણએણં.

૧૦

સે જે પુણ ઇમે અણોગે બહવે તસા પાણા, તં જહા-અંડયા પોયયા જરાઉઆ રસયા સંસેઠમા સંમુચ્છિમા ઉબ્ભિઆ ઉવવાઠઆ, જેસિં કેસિં ચિ પાણાણં અભિક્કંતં પડિક્કંતં સંકુચિઅં પસારિઅં રુઅં ભંતં તસિઅં પલાઠઅં આગઈગઠવિન્નાયા જે અ કીડપયંગા, જા ય કુંથુ પિપીલિઆ, સવ્વે બેઈંદિઆ, સવ્વે તેઈંદિયા, સવ્વે ચઉરિંદિઆ, સવ્વે પંચિંદિઆ, સવ્વે તિરિક્ખજોણિઆ, સવ્વે નેરઠઆ, સવ્વે મણુઆ, સવ્વે દેવા, સવ્વે પાણા પરમાહમ્મિઆ, એસો ખલુ છટ્ઠો જીવનિકાઓ તસકાઓ તિ પવુચ્ચઠ (સૂત્ર૦ ૧)

ઠચ્ચેસિં છણહં જીવનિકાયાણં નેવ સયં દંડં સમારંભિજ્જા, નેવડનેહિં દંડં સમારંભાવિજ્જા, દંડ સમારંભંતે વિ અન્ને ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ, કરંતં પિ અન્નં ન સમણુજાણામિ તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ (સૂત્ર૦ ૨)

પઢમે ભંતે! મહવ્વએ પાણાઠવાયાઓ વેરમણં, સવ્વં ભંતે! પાણાઠવાયં પચ્ચકુખામિ, સે સુહુમં વા, બાયરં વા, તસં વા, થાવરં વા, નેવ સયં પાણે અઠવાઠજ્જા, નેવડનેહિં પાણે અઠવાયાવિજ્જા, પાણે અઠવાયંતે વિ અન્ને ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ પઢમે ભંતે! મહવ્વએ ઉવટ્ઠિઓમિ સવ્વાઓ પાણાઠવાયાઓ વેરમણં (૧) (સૂત્ર૦ ૩)

અહાવરે દોચ્ચે ભંતે! મહવ્વએ મુસાવાયાઓ વેરમણં, સવ્વં ભંતે! મુસાવાયં પચ્ચકુખામિ સે કોહા વા, લોહા વા, ભયા વા, હાસા વા, નેવ સયં મુસં વઠજ્જા નેવડનેહિં મુસં વાયાવિજ્જા, મુસં વયંતે વિ અન્ને ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ, દોચ્ચે ભંતે! મહવ્વએ ઉવટ્ઠિઓમિ સવ્વાઓ મુસાવાયાઓ વેરમણં (૨) (સૂત્ર૦ ૪)

અહાવરે તચ્ચે ભંતે! મહવ્વએ અદિન્નાદાણાઓ વેરમણં, સવ્વં ભંતે! અદિન્નાદાણં પચ્ચકુખામિ, સે ગામે વા, નગરે વા, રણ્ણે વા, અપ્પં વા, બહું વા, અણું વા, થૂલં વા, ચિત્તમંતં વા, અચિત્તમંતં વા, નેવ સયં અદિન્નં ગિણ્ણહજ્જા, નેવડનેહિં અદિન્નં ગિણ્ણહાવિજ્જા, અદિન્નં ગિણ્ણહંતેવિ અન્ને ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ, તચ્ચે ભંતે! મહવ્વએ ઉવટ્ઠિઓમિ, સવ્વાઓ અદિન્નાદાણાઓ વેરમણં (૩) (સૂત્ર૦ ૫)

અહાવરે ચઉત્થે ભંતે! મહવ્વએ મેહુણાઓ વેરમણં, સવ્વં ભંતે! મેહુણં પચ્ચકુખામિ, સે દિવ્વં વા, માણુસં વા, તિરિક્ખજોણિઅં વા, નેય સયં મેહુણં સેવિજ્જા, નેવડનેહિં મેહુણં સેવાવિજ્જા, મેહુણં સેવંતે વિ અન્ને ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ, ચઉત્થે ભંતે! મહવ્વએ ઉવટ્ઠિઓમિ, સવ્વાઓ મેહુણાઓ વેરમણં (૪) (સૂત્ર૦ ૬)

અહાવરે પંચમે ભંતે! મહવ્વએ પરિગ્ગહાઓ વેરમણં, સવ્વંભંતે! પરિગ્ગહં પચ્ચકુખામિ, સે અપ્પં વા, બહું વા, અણું વા, થૂલં વા, ચિત્તમંતં વા, અચિત્તમંતં વા, નેવ સયં પરિગ્ગહં પરિગિણ્ણહજ્જા નેવડનેહિં પરિગ્ગહં પરિગિણ્ણહાવિજ્જા, પરિગ્ગહં પરિગિણ્ણહંતે વિ અન્ને ન સમણુજાણામિ જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ, પંચમે ભંતે! મહવ્વએ ઉવટ્ઠિઓમિ, સવ્વાઓ પરિગ્ગહાઓ વેરમણં (૫) (સૂત્ર૦ ૭)

અહાવરે છટ્ઠે ભંતે! વએ રાઠભોયણાઓ વેરમણં, સવ્વં ભંતે! રાઠભોયણં પચ્ચકુખામિ, સે અસણં વા, પાણં વા, ખાઠમં વા, સાઠમં વા, નેવ સયં રાઠં ભુંજિજ્જા; નેવડનેહિં રાઠં ભુંજાવિજ્જા રાઠં ભુંજંતે વિ અન્ને ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિંદામિ ગરિહામિ અપ્પાણં વોસિરામિ, છટ્ઠે ભંતે! વએ ઉવટ્ઠિઓમિ સવ્વાઓ રાઠભોયણાઓ વેરમણં (૬) (સૂત્ર૦ ૮)

ઠચ્ચેઠયાઠં પંચમહવ્વયાઠં રાઠભોઅણવેરમણા છટ્ઠાઠં અત્તહિયટ્ઠયાએ ઉવસંપજ્જિત્તા ણં વિહરામિ (સૂત્ર૦ ૯)

સે ભિક્ખુ વા ભિક્ખુણી વા સંજય વિરય પડિહય પચ્ચકુખાય પાવકમ્મે દિઆ વા, રાઓ વા, એગઓ વા,

પરિસાગઓ વા, સુત્તે વા, જાગરમાણે વા, સે પુઢવિ વા, ભિત્તિ વા, સિલં વા, લેલું વા, સસરકૂખં વા કાયં, સસરકૂખં વા વત્થં, હત્થેણ વા, પાએણ વા, કટ્ઠેણ વા, કિલિંયેણ વા, અંગુલિઆએ વા, સિલાગએ વા, સિલાગહત્થેણ વા, ન આલિહિજ્જા ન વિલિહિજ્જા ન ઘટ્ટિજ્જા, ન ભિદ્ધિજ્જા, અન્નં ન આલિહાવિજ્જા ન વિલિહાવિજ્જા ન ઘટ્ટાવિજ્જા, ન ભિદ્ધાવિજ્જા, અન્નં આલિહંતં વા વિલિહંતં વા ઘટ્ટંતં વા ભિદ્ધંતં વા ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિદ્દામિ ગરિહામિ અપ્પાણં વોસિરામિ (૧) (સૂત્ર૦ ૧૦)

સે ભિક્કૂ વા ભિક્કુણી વા સંજય વિરય પડિહય પચ્ચકૂખાય પાવકમ્મે દિઆ વા, રાઓ વા, એગઓ વા, પરિસાગઓ વા, સુત્તે વા જાગરમાણે વા, સે ઉદગં વા ઓસં વા, હિમં વા, મહિઅં વા, કરગં વા, હરતણુગં વા, સુદ્ધોદગં વા, ઉદઉલ્લં વા કાયં, ઉદઉલ્લં વા વત્થં, સસિણિહં વા કાયં, સસિણિહં વા વત્થં, ન આમુસિજ્જા ન સંકુસિજ્જા, ન આવીલિજ્જા, ન પવીલિજ્જા, ન અકૂખોડિજ્જા, ન પકૂખોડિજ્જા, ન આયાવિજ્જા ન પયાવિજ્જા, અન્નં ન આમુસાવિજ્જા ન સંકુસાવિજ્જા ન આવીલાવિજ્જા ન પવીલાવિજ્જા, ન અકૂખોડાવિજ્જા ન પકૂખોડાવિજ્જા, ન આયાવિજ્જા ન પયાવિજ્જા, અન્નં આમુસંતં વા, સંકુસંતં વા, આવીલંતં વા પવીલંતં વા, અકૂખોડંતં વા પકૂખોડંતં વા, આયાવંતં વા પયાવંતં વા, ન સમણુજાણામિ જાવજ્જવાએ તિવિહં તિવિહેણં, મણેણં વાયાએ કાએણં, ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિદ્દામિ ગરિહામિ અપ્પાણં વોસિરામિ (૨) (સૂત્ર૦ ૧૧)

સે ભિક્કૂ વા ભિક્કુણી વા સંજય વિરય પડિહય પચ્ચકૂખાય પાવકમ્મે દિઆ વા, રાઓ વા, એગઓ વા, પરિસાગઓ વા, સુત્તે વા, જાગરમાણે વા, સે અગણિં વા, ઇંગાલં વા, મુમ્મુરં વા અચ્ચિં વા, જાલં વા, અલાયં વા, સુદ્ધાગણિં વા, ઉક્કં વા, ન ઉંજેજ્જા ન ઘટ્ટેજ્જા, ન ભિદ્ધેજ્જા ન ઉજ્જાલેજ્જા ન પજ્જાલેજ્જા ન નિવ્વાલેજ્જા, અન્નં ન ઉંજાવેજ્જા ન ઘટ્ટાવેજ્જા ન ભિદ્ધાવેજ્જા ન ઉજ્જાલાવેજ્જા ન પજ્જાલાવેજ્જા ન નિવ્વાલેજ્જા, અન્નં ઉંજંતં વા ઘટ્ટંતં વા, ભિદ્ધંતં વા, ઉજ્જાલંતં વા, પજ્જાલંતં વા નિવ્વાલંતં વા, ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ, નિદ્દામિ ગરિહામિ અપ્પાણં વોસિરામિ (૩) (સૂ૦ ૧૨)

સે ભિક્કૂ વા ભિક્કુણી વા, સંજય વિરય પડિહય પચ્ચકૂખાય પાવકમ્મે, દિઆ વા, રાઓ વા, એગઓ વા, પરિસાગઓ વા, સુત્તે વા જાગરમાણે વા, સે સિએણ વા, વિહુયણેણ વા, તાલિઅંટેણ વા, પત્તેણ વા, પત્ત ભંગેણ વા, સાહાએ વા, સાહાભંગેણ વા, પિહુણેણ વા, પિહુણહત્થેણ વા, ચેલેણ વા, ચેલકણેણ વા, હત્થેણ વા, મુહેણ વા, અપ્પણો વા કાયં, બાહિરં વા વિ પુગ્ગલં, ન કુમેજ્જા ન વીએજ્જા, અન્નં ન કુમાવેજ્જા ન વીઆવેજ્જા, અન્નં કુમંતં વા વીઅંતં વા ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિદ્દામિ ગરિહામિ અપ્પાણં વોસિરામિ (૪) (સૂત્ર૦ ૧૩)

સે ભિક્કૂ વા ભિક્કુણી વા સંજયવિરયપડિહય-પચ્ચકૂખાયપાવકમ્મે, દિઆ વા, રાઓ વા, એગઓ વા, પરિસાગઓ વા, સુત્તે વા, જાગરમાણે વા, સે બીએસુ વા, બીઅપઇટ્ટેસુ વા, રૂઢેસુ વા, રૂઢપઇટ્ટેસુ વા, જાએસુ વા, જાયપઇટ્ટેસુ વા, હરિએસુ વા, હરિઅપઇટ્ટેસુ વા, છિત્તેસુ વા, છિત્તપઇટ્ટેસુ વા, સચિત્તેસુ વા, સચિત્તકોલ-પડિનિસ્સિએસુ વા, ન ગચ્છેજ્જા, ન ચિટ્ટેજ્જા, ન નિસીએજ્જા, ન તુઅટ્ટેજ્જા, અન્નં ન ગચ્છાવેજ્જા, ન ચિટ્ટાવેજ્જા ન નિસીઆવેજ્જા, ન તુઅટ્ટાવેજ્જા; અન્નં ગચ્છંતં વા, ચિટ્ટંતં વા, નિસીયંતં વા, તુયટ્ટંતં વા, ન સમણુજાણામિ, જાવજ્જવાએ તિવિહં તિવિહેણં મણેણં વાયાએ કાએણં ન કરેમિ, ન કારવેમિ કરંતં પિ અન્નં ન સમણુજાણામિ, તસ્સ ભંતે! પડિક્કમામિ નિદ્દામિ ગરિહામિ અપ્પાણં વોસિરામિ (૫) (સૂત્ર૦ ૧૪)

સે ભિક્કૂ વા ભિક્કુણી વા સંજયવિરયપડિહય-પચ્ચકૂખાય પાવકમ્મે, દિઆ વા, રાઓ વા, એગઓ વા, પરિસાગઓ વા, સુત્તે વા, જાગરમાણે વા, સે કીડં વા, પયંગં વા, કુંથું વા, પિપીલીઅં વા, હત્થંસિ વા, પાયંસિ વા, બાહુંસિ વા, ઊરુંસિ વા, ઉદરંસિ વા, સીસંસિ વા, વત્થંસિ વા, પડિગ્ગહંસિ વા, કંબલંસિ વા, પાયપુંછણંસિ વા, રયહરણંસિ વા, ગોચ્છગંસિ વા, ઉડગંસિ વા, દંડગંસિ વા, પીઢગંસિ વા, ફલગંસિ વા, સેજ્જંસિ વા, સંથારગંસિ વા, અન્નયરંસિ વા, તહપ્પગારે ઉવગરણાજાએ તઓ સંજયામેવ પડિલેહિઅ પડિલેહિઅ, પમજ્જિઅ પમજ્જિઅ, એગંતમવણેજ્જા, નો ણં સંઘાયમાવજ્જેજ્જા (૬) (સૂત્ર૦ ૧૫)

અજયં ચરમાણો ઉ, પાણભૂયાઇં હિંસઇ;

બંધઇ પાવયં કમ્મં, તં સે હોઇ કડુઅં ફલં.

૧

અજયં ચિટ્ટમાણો ઉ પાણભૂયાઇં હિંસઇ;

બંધઇ પાવયં કમ્મં, તં સે હોઇ કડુઅં ફલં.

૨

અજયં આસમાણો ઉ, પાણભૂયાઇં હિંસઇ;

બંધ ધ પાવયં કમ્મં, તં સે હોઠ કડુઅં ફલં.	૩
અજયં સયમાણો ઉ, પાણભૂયાઇં હિંસઇ;	
બંધ ધ પાવયં કમ્મં, તં સે હોઠ કડુઅં ફલં.	૪
અજયં ભુંજમાણો ઉ, પાણભૂયાઇં હિંસઇ;	
બંધ ધ પાવયં કમ્મં, તં સે હોઠ કડુઅં ફલં.	૫
અજયં ભાસમાણો ઉ, પાણભૂયાઇં હિંસઇ;	
બંધ ધ પાવયં કમ્મં, તં સે હોઠ કડુઅં ફલં.	૬
કહં ચરે? કહં ચિટ્ઠે? કહમાસે? કહં સએ?;	
કહં ભુંજંતો? ભાસંતો? પાવં કમ્મં ન બંધઇ?.	૭
જયં ચરે જયં ચિટ્ઠે, જયમાસે જયં સએ;	
જયં ભુંજંતો ભાસંતો, પાવં કમ્મં ન બંધઇ.	૮
સવ્વભૂયપ્પભૂઅસ્સ, સમ્મં ભૂયાઇં પાસઓ;	
પિહિઆસવસ્સ દંતસ્સ, પાવં કમ્મં ન બંધઇ.	૯
પઢમં નાણં તઓ દયા, એવં ચિટ્ઠઇ સવ્વસંજએ;	
અન્નાણી કિં કાહી? કિં, વા નાહીઇ સેઅપાવગં?.	૧૦
સોચ્ચા જાણઇ કલ્લાણં, સોચ્ચા જાણઇ પાવગં;	
ઉભયં પિ જાણઇ સોચ્ચા, જં સેઅં તં સમાયરે.	૧૧
જો જીવે વિ ન યાણઇ, અજીવે વિ ન યાણઇ;	
જીવાજીવે અયાણંતો, કહં સો નાહીઇ સંજમં.	૧૨
જો જીવે વિ વિયાણઇ અજીવે વિ વિયાણઇ;	
જીવાજીવે વિયાણંતો, સો હુ નાહીઇ સંજમં.	૧૩
જયા જીવમ જીવે ય, દો વિ એએ વિયાણઇ;	
તયા ગઇં બહુવિહં, સવ્વજીવાણ જાણઇ.૧૪	
જયા ગઇં બહુવિહં, સવ્વજીવાણ જાણઇ;	
તયા પુણણં ય પાવં ય, બંધં મોક્ખં ય જાણઇ.	૧૫
જયા પુણણં ય પાવં ય, બંધં મોક્ખં ય જાણઇ;	
તયા નિવ્વિંદએ ભોએ, જે દિવ્વે જે અ માણુસે.	૧૬
જયા નિવ્વિંદએ ભોએ, જે દિવ્વે જે અ માણુસે;	
તયા ચયઇ સંજોગં, સબ્બિંતરબાહિરં.૧૭	
જયા ચયઇ સંજોગં, સબ્બિંતરબાહિરં;	
તયા મુંડે ભવિત્તાણં, પવ્વઇએ અણગારિઅં.	૧૮
જયા મુંડે ભવિત્તાણં, પવ્વઇએ અણગારિઅં;	
તયા સંવરમુક્કિટ્ઠં, ધમ્મં ફાસે અણુતરં.૧૯	
જયા સંવરમુક્કિટ્ઠં, ધમ્મં ફાસે અણુતરં;	
તયા ધુણઇ કમ્મરયં, અબોહિકલુસં કડં.૨૦	
જયા ધુણઇ કમ્મરયં, અબોહિકલુસં કડં;	
તયા સવ્વત્તગં નાણં, દંસણં ચાભિગચ્છઇ.	૨૧
જયા સવ્વત્તગં નાણં, દંસણં ચાભિગચ્છઇ;	
તયા લોગમલોગં ય, જિણો જાણઇ કેવલી.	૨૨
જયા લોગમલોગં ય, જિણો જાણઇ કેવલી;	
તયા જોગે નિરં ભિત્તા, સેલેસિં પડિવજજઇ.	૨૩
જયા જોગે નિરંભિત્તા, સેલેસિં પડિવજજઇ;	
તયા કમ્મં ખવિત્તાણં, સિદ્ધિં ગચ્છઇ નીરઓ.	૨૪
જયા કમ્મં ખવિત્તાણં, સિદ્ધિં ગચ્છઇ નીરઓ;	
તયા લોગમત્થયત્થો, સિદ્ધો હવઇ સાસઓ.	૨૫
સુહસાયગસ્સ સમણસ્સ, સાયાઉલગસ્સ નિગામસા ઇસ્સ;	
ઉચ્છોલણપહોઅસ્સ, દુલ્લહા સુગઇ તારિસગસ્સ.	૨૬
તવોગુણપહાણસ્સ, ઉજ્જુમઇ ખંતિસંજમરયસ્સ;	

પરીસહે જિણંતસ્સ, સુલહા સુગઇ તારિસગસ્સ.	૨૭
પચ્છા વિ તે પયાયા, ખિપ્પં ગચ્છંતિ અમરભવણાઇં;	
જેસિં પિઓ તવો સંજમો અ, ખંતી અ બંભયેરં ચ.	૨૮
ઇચ્ચેઅં ઇજ્જવણિઅં, સમ્મદિટ્ઠી સયા જએ;	
દુલ્લહં લહિત્તુ સામણાં, કમ્મણા ન વિરાહેજ્જાસિં તિ બેમિ.	૨૯

(૫) પિણ્ડેષણાધ્યયન (પ્રથમ ઉદ્દેશઃ)

સંપત્તે ભિક્ખુકાલંમિ, અસંભંતો અમુચ્છિઓ;	
ઇમેણ કમ્મજોગેણ, ભત્તપાણં ગવેસએ. ૧	
સે ગામે વા નગરે વા, ગોઅરગ્ગગઓ મુણી;	
ચરે મંદમણ્ણવ્વિગ્ગો, અવ્વકૂખિતેણ ચેઅસા.	૨
પુરઓ જુગમાયાએ, પેહમાણો મહિં ચરે;	
વજ્જંતો વીઅહરિઆઇં, પાણે અ દગમટ્ટિઅં.	૩
ઓવાયં વિસમં ખાણું, વિજલં પરિજ્જએ;	
સંકમેણ ન ગચ્છેજ્જા, વિજ્જમાણો પરક્કમે.	૪
પવડંતે વ સે તત્થ, પકૂખલંતેવ સંજએ;	
હિંસેજ્જ પાણાભૂઆઇં, તસે અદુવ થાવરે.	૫
તમ્હા તેણ ન ગચ્છિજ્જા, સંજએ સુસમાહિએ;	
સઇ અન્નેણ મગ્ગેણ, જયમેવ પરક્કમે. ૬	
ઇંગાલં ઘારિઅં રાસિં, તુસરાસિં ચ ગોમયં;	
સસરકૂખેહિં પાએહિં, સંજઓ તં નઇક્કમે.	૭
ન ચરેજ્જ વાસે વાસંતે, મહિઆએ વ પડંતિએ;	
મહાવાએ વ વાયંતે, તિરિચ્છસંપાઇમેસુ વા.	૮
ન ચરેજ્જ વેસસામંતે, બંભયેરવસાણુ એ;	
બંભયારિસ્સ દંતસ્સ, હુજ્જા તત્થ વિસુત્તિઆ.	૯
અણાય યણે ચરંતસ્સ, સંસગ્ગીએ અભિક્ખણાં;	
હુજ્જ વયાણં પીલા, સામણાંમિ અ સંસઓ.	૧૦
તમ્હા એઅં વિઆણિત્તા, દોસં દુગ્ગઇવડ્ઢણાં;	
વજ્જએ વેસસામંતં, મુણી એગંતમસ્સિએ.	૧૧
સાણં સૂયં ગાવિં, દિત્તં ગોણં હયં ગયં;	
સડિમ્ભં કલહં જુહ્હં, દૂરઓ પરિવજ્જએ.	૧૨
અણુન્નએ નાવણાએ, અપ્પહિટ્ઠે અણાઉલે;	
ઇંદિઆઇં જહાભાગં, દમઇત્તા મુણી ચરે.	૧૩
દવદવસ્સ ન ગચ્છેજ્જા, ભાસમાણો અ ગોઅરે;	
હસંતો નાભિગચ્છિજ્જા, કુલં ઉચ્ચાવયં સયા.	૧૪
આલોઅં થિગ્ગલં દારં, સંધિં દગભવણાણિ અ;	
ચરંતો ન વિનિજ્જાએ, સંકટ્ઠાણં વિવજ્જએ.	૧૫
રત્તો ગિહવઇણં ચ, રહસ્સા રકૂખિઆણ ય;	
સંકિલેસકરં ઠાણં, દૂરઓ પરિવજ્જએ. ૧૬	
પડિકુટ્ઠકુલં ન પવિસે, મામગં પરિવજ્જએ;	
અચિઅત્તં કુલં ન પવિસે, ચિઅત્તં પવિસે કુલં.	૧૭
સાણીપાવારપિહિઅં, અપ્પણા નાવપુંગુરે;	
કવાડં નો પણોલ્લેજ્જા, ઓગ્ગહંસિ અજાઇઆ.	૧૮
ગોઅરગ્ગપવિટ્ઠો અ, વચ્ચમુત્તં ન ધારએ;	
ઓગાસં ફાસુઅં નચ્ચા, અણુન્નવિઅ વોસિરે.	૧૯
નીઅદુવારં તમસં, કોટ્ઠગં પરિવજ્જએ;	
અચકૂખુવિસઓ જત્થ, પાણા દુપ્પરિલેહગા.	૨૦
જત્થ પુફ્ફાઇં બીઆઇં, વિપ્પઇન્નાઇં કોટ્ઠએ;	
અહુણોવલિત્તં ઉલ્લં, દટ્ઠૂણં પરિવજ્જએ.	૨૧

એલગં દારગં સાણં, વચ્છગં વા વિ કુટ્ટએ; ઉલ્લંઘિઆ ન પવિસે, વિઉહિતાણ વ સંજએ.	૨૨
અસંસતં પલોઠજજા, નાઇદૂરાવલોઅએ; ઉષ્કુલ્લં ન વિનિજજાએ, નિઅટ્ટિજજ અયંપિરો.	૨૩
અઇભૂમિં ન ગચ્છેજજા, ગોઅરગગગઓ મુણી; કુલસ્સ ભૂમિં જાણિતા, મિઅં ભૂમિં પરક્કમે.	૨૪
તત્થેવ પડિલેહિજજા, ભૂમિભાગં વિઅકુખણો; સિણાણસ્સ વ વચ્ચસ્સ, સંલોગં પરિવજજએ.	૨૫
દગમટ્ટિઅઆયાણો, બીયાણિ હરિઆણિ અ; પરિવજજંતો ચિટ્ટિજજા, સવ્વિંદિઅ સમાહિએ.	૨૬
તત્થ સે ચિટ્ટમાણસ્સ, આહરે પાણભોઅણં; અકપ્પિઅં ન ગેણિહજજા, પરિગાહિજજ કપ્પિઅં.	૨૭
આહરંતી સિઆ તત્થ, પરિસાહિજજ ભોયણં; દિંતિઅં પડિઆઇકુખે, ન મે કપ્પઇ તારિસં.	૨૮
સંમદમાણી પાણાણિ, બીઆણિ હરિઆણિ અ; અસંજમકરિં નચ્ચા, તારિસિં પરિવજ્જિએ.	૨૯
સાહટ્ટુ નિક્કખિવિત્તાણં, સચિત્તં ઘટ્ટિઆણિ અ; તહેવ સમણટ્ટાએ, ઉદગં સંપણુલ્લિઆ.૩૦	
ઓગાહઇત્તા ચલઇત્તા, આહરે પાણભોઅણં; દિંતિઅ પડિઆઇકુખે, ન મે કપ્પઇ તારિસં.	૩૧
પુરેકમ્મેણ હત્થેણ, દલ્લીએ ભાયણેણ વા; દિંતિઅં પડિઆઇકુખે, ન મે કપ્પઇ તારિસં.	૩૨
એવં ઉદઉલ્લે સસિણિદ્ધે, સસરકુખે મટ્ટિઆઉસે, હરિઆલે હિંગુલએ, મણ્ણસિલા અંજણે લોણે.	૩૩
ગેરુઅ વન્નિઅ સેદ્ધિઅ-સોરટ્ટિઅ પિટ્ટકુક્કુસકએ ય; ઉક્કિટ્ટમસંસટ્ટે, સંસટ્ટે ચેવ બોદ્ધવ્વે.૩૪	
અસંસટ્ટેણ હત્થેણ, દલ્લીએ ભાયણેણ વા; દિજ્જમાણં ન ઇચ્છિજજા, પચ્છાકમ્મં જહિં ભવે.	૩૫
સંસટ્ટેણ ય હત્થેણ, દલ્લીએ ભાયણેણ વા; દિજ્જમાણં પડિચ્છિજજા, જં તત્થેસણિઅં ભવે.	૩૬
દુણહં તુ ભુંજમાણાણં, એગો તત્થ નિમંતએ; દિજ્જમાણં ન ઇચ્છિજજા, ઇંદં સે પડિલેહએ.	૩૭
દુણહં તુ ભુંજમાણાણં, દો વિ તત્થ નિમંતએ; દિજ્જમાણં પડિચ્છિજજા, જં તત્થેસણિઅં ભવે.	૩૮
ગુલ્લિણીએ ઉવણશત્થં, વિવિહં પાણભોઅણં; ભુંજમાણં વિવજ્જિજજા, ભુત્તસેસં પડિચ્છએ.	૩૯
સિઆ ય સમણટ્ટાએ, ગુલ્લિણી કાલમાસિણી; ઉટ્ટિઆ વા નિસીઇજજા, નિસન્ના વા પુણુટ્ટએ.	૪૦
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકુખે, ન મે કપ્પઇ તારિસં.	૪૧
થણગં પિજ્જેમાણી, દારગં વા કુમારિઅં; તં નિક્કખિવિત્તુ રોઅંતં, આહરે પાણભોઅણં.	૪૨
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકુખે, ન મે કપ્પઇ તારિસં.	૪૩
જં ભવે ભત્તપાણં તુ, કપ્પા-કપ્પમિ સંકિઅં; દિંતિઅં પડિઆઇકુખે, ન મે કપ્પઇ તારિસં.	૪૪
દગવારેણ પિહિઅં, નીસાએ પીઢએણ વા; લોઢેણ વા વિ લેવેણ, સિલેસેણ વ કેણઇ.	૪૫

તં ચ ઉબ્બિંદિઉં દિજજા, સમણટ્ટાએ વ દાવએ; દિંતિઅં પડિઆઇકૂખે, ન મે કપ્પઇ તારિસં.	૪૬
અસણં પાણગં વા વિ, ખાઇમં સાઇમં તહા; જં જાણિજજ સુણિજજા વા, દાણટ્ટા પગડં ઇમં.	૪૭
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૪૮
અસણં પાણગંવા વિ, ખાઇમં સાઇમં તહા; જં જાણિજજ સુણિજજા વા, પુણટ્ટા પગડં ઇમં.	૪૯
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૫૦
અસણં પાણગં વા વિ, ખાઇમં સાઇમં તહા; જં જાણિજજ સુણિજજા વા, વણિમટ્ટા પગડં ઇમં.	૫૧
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૫૨
અસણં પાણગં વા વિ, ખાઇમં સાઇમં તહા; જં જાણિજજ સુણિજજા વા, સમણટ્ટા પગડં ઇમં.	૫૩
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૫૪
ઉદ્દેસિઅં કીઅગડં, પૂઇકમ્મં ચ આહડં; અજ્જોયર પામિચ્ચં, મીસજાયં વિવજ્જએ.	૫૫
ઉગ્ગમં સે અ પુચ્છિજ્જા, કસ્સટ્ટા કેણ વા કડં; સુચ્ચા નિસ્સંકિઅં સુદ્ધં, પડિગાહિજ્જા સંજએ.	૫૬
અસણં પાણગં વા વિ, ખાઇમં સાઇમં તહા; પુષ્કેસુ હુજ્જ ઉમ્મીસં, બીએસુ હરિએસુ વા.	૫૭
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૫૮
અસણં પાણગં વા વિ, ખાઇમં સાઇમં તહા; ઉદ્દગંમિ હુજ્જ નિક્ખિત્તં, ઉત્તિંગ-પણગેસુ વા.	૫૯
તં ભવે ભત્ત-પાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૬૦
અસણં પાણગં વા વિ, ખાઇમં સાઇમં તહા; તેઉમ્મિ હુજ્જ નિક્ખિત્તં, તં ચ સંઘટ્ટિઆ દએ.	૬૧
તં ભવે ભત્તપાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૬૨
એવં ઉસ્સકિકા આસકિકા, ઉજ્જાલિઆ, પજ્જાલિઆ નિવ્વાવિઆ; ઉસ્સિચિયા નિસ્સિચિયા, ઉવ્વત્તિયા ઓયારિયા દએ. ૬૩	
તં ભવે ભત્ત-પાણં તુ, સંજયાણ અકપ્પિઅં; દિંતિઅં પડિઆઇકૂખે, ન મે કપ્પઇ તારિસં.	૬૪
હુજ્જ કટ્ટં સિલં વા વિ, ઇટ્ટાલં વા વિ એગયા; ઠવિઅં સંકમટ્ટાએ, તંચ હોજ્જ ચલાયલં.	૬૫
ન તેણ ભિક્ખુ ગચ્છિજ્જા, દિટ્ટો તત્થ અસંજમો; ગંભીરં ઝુસિરં ચેવ, સવ્વિંદિઅ-સમાહિએ.	૬૬
નિસ્સેણિં ફલગં પીઠં, ઉસ્સવિત્તાણ-મારુહે; મંચં કીલં ચ પાસાયં, સમણટ્ટા એવ દાવએ.	૬૭
દુરૂહમાણી પવડિજ્જા, હત્થં પાયં વ લૂસએ; પુઠ્ઠવીજ્જાવે વિ હિંસિજ્જા, જે અ તન્નિસ્સિઆ જગે.	૬૮

એચારિસે મહાદોસે, જાણિણિણ મહેસિણો; તમ્હા માલોહડં ભિક્ષુ, ન પરિગિણહંતિ સંજયા.	૬૯
કંદં મૂલં પલંબં વા, આમં છિત્તં વ સન્નિરં; તુંબાગં સિંગબેરં ચ, આમગં પરિવજ્જએ.	૭૦
તહેવ સત્તુ-ચુણ્ણાઈ, કોલચુણ્ણાઈ આવણે; સક્કુલિં ફાણિં પૂઅં, અન્નં વા વિ તહાવિહં.	૭૧
વિક્કાયમાણં પસદં, રએણં પરિફાસિઅં; દિંતિઅં પરિઆઈકૂખે, ન મે કપ્પઈ તારિસં.	૭૨
બહુઅદ્દિઠઅં પુગ્ગલં, અણિમિસં વા બહુકંટયં; અત્થિયં તિંદુયં ભિલ્લં, ઉચ્છુખંડં વ સિંવલિં.	૭૩
અપ્પે સિઆ ભોઅણજજાએ, બહુઉજ્જિયધમ્મિએ; દિંતિઅં પરિઆઈકૂખે, ન મે કપ્પઈ તારિસં.	૭૪
તહેવુચ્ચાવયં પાણં, અદુવા વારધોઅણં; સંસેઈમં ચાઉલોદગં, અહુણાધોઅં વિવજ્જએ.	૭૫
જં જાણેજ્જ ચિરાધોયં, મઈએ દંસણેણ વા; પરિપુચ્છિણિણ સુચ્ચા વા, જં ચ નિસ્સંકિઅં ભવે.	૭૬
અજ્જવં પરિણયં નચ્ચા, પરિગાહિજ્જ સંજએ; અહ સંકિયં ભવિજ્જા, આસાઈત્તાણ રોયએ.	૭૭
થોવમાસાયણટ્ટાએ, હત્થગંમિ દલાહિ મે; મા મે અચ્ચંબિલં પૂઈ, નાલં તણહં વિણિત્તએ.	૭૮
તં ચ અચ્ચંબિલં પૂઈ, નાલં તણહં વિણિત્તએ; દિંતિઅં પરિઆઈકૂખે, ન મે કપ્પઈ તારિસં.	૭૯
તં ચ હોજ્જ અકામેણં, વિમણેણ પરિચ્છિઅં; તં અપ્પણા ન પિબે, નો વિ અન્નસ્સ દાવએ.	૮૦
એગંત મવક્કમિત્તા, અચિત્તં પરિલેહિઆ; જયં પરિટ્ઠવિજ્જા, પરિટ્ઠપ્પ પરિક્કમે.૮૧	
સિઆ ય ગોયરગ્ગ-ગઓ, ઇચ્છિજ્જા પરિભુત્તુઅં; કુટ્ઠગં ભિત્તિમૂલં વા, પરિલેહિત્તાણ ફાસુઅં.	૮૨
અણુન્નવિત્તુ મેહાવી, પરિચ્છન્નંમિ સંવુડે; હત્થગં સંપમજ્જિત્તા, તત્થ ભુંજિજ્જ સંજએ.	૮૩
તત્થ સે ભુંજમાણસ્સ, અદ્દિઠઅં કંટઓ સિઆ; તણકટ્ઠસક્કરં વા વિ, અન્નં વા વિ તહાવિહં.	૮૪
તં ઉકૂખિવિત્તુ ન નિક્કખિવે, આસએણ ન છડ્ડએ; હત્થેણ તં ગહેણિણં, એગંત મવક્કમે. ૮૫	
એગંતમ વક્કમિત્તા, અચિત્તં પડલેહિઆ; જયં પરિટ્ઠવિજ્જા, પરિટ્ઠપ્પ પરિક્કમે.૮૬	
સિઆ ય ભિક્કખૂ ઇચ્છિજ્જા, સિજ્જમાગમ્મ ભુત્તુઅં; સપિંડપાય માગમ્મ, ઉંડુયં પરિલેહિઆ.૮૭	
વિણએણં પવિસિત્તા, સગાસે ગુરુણો મુણી; ઈરિયાવહિય-માયાય, આગઓ ય પરિક્કમે.	૮૮
આભોઈત્તાણ નીસેસં, અઈઆરં જહક્કમં; ગમણાગમણે ચેવ, ભત્તપાણે વ સંજએ.૮૯	
ઉજ્જુપન્નો અણુવ્વિગ્ગો અવ્વકૂખિત્તેણ ચેઅસા; આલોએ ગુરુસગાસે, જં જહા ગહિઅં ભવે.	૯૦
ન સમ્મમાલોઈયં હુજ્જા, પુલ્લિં પચ્છા વ જં કડં; પુણો પરિક્કમે તસ્સ, વોસટ્ઠો ચિંતએ ઇમં.	૯૧
અહો જિણેહિં અસાવજ્જા, વિત્તી સાહૂણ દેસિઆ; મુકૂખ સાહણહેઉસ્સ, સાહુદેહસ્સ ધારણા.	૯૨

નમુકારેણ પારિતા, કરિતા જિણસંથવં;	
સજ્ઞાયં પટ્ટવિતાણં, વીસમેજ્જ ખણં મુણી.	૯૩
વીસમંતો ઇમં ચિંતે, હિમયટ્ટં લાભમટ્ટિઠઓ;	
જઇ મે અણુગ્ગહં કુજ્જા, સાહૂ હુજ્જામિ તારિઓ.	૯૪
સાહવો તો ચિઅત્તેણં, નિમંતિજ્જ જહક્કમં;	
જઇ તત્થ કેઇ ઇચ્છિજ્જા, તેહિં સદ્ધિં તુ ભુંજએ.	૯૫
અહ કોઇ ન ઇચ્છિજ્જા, તઓ ભુંજિજ્જ એગઓ;	
આલોએ ભાયણે સાહૂ, જયં અપરિસારિયં.	૯૬
તિત્તગં વ કડુઅં વ કસાયં, અંબિલં વ મહુરં લવણં વા;	
એઅ લદ્ધમન્નત્થપઉત્તં, મહુ ઘયં વ ભુંજિજ્જ સંજએ.	૯૭
અરસં વિરસં વા વિ, સૂઇઅં વા અસૂઇઅં,	
ઉલ્લં વા જઇ વા સુક્કં, મંથુકુમ્માસ ભોઅણં.	૯૮
ઉપ્પણં નાઇહીલિજ્જા, અપ્પં વા બહુ ફાસુઅં;	
મુહાલદ્ધં મુહાજીવી, ભુંજિજ્જા, દોસવજ્જિઅં.	૯૯
દુલ્લહા ઉ મુહાદાઇ, મુહાજીવી વિ દુલ્લહા;	
મુહાદાઇ મુહાજીવી, દોઠવિ ગચ્છંતિ સુગ્ગઇં૦ ત્તિ બેમિ.	૧૦૦

(પિણ્ડેષણાધ્યયને દ્વિતીય ઉદ્દેશઃ)

પરિગ્ગહં સંલિહિત્તાણં, લેવમાયાએ સંજએ;	
દુગંધં વા સુગંધં વા, સવ્વં ભુંજે ન છડ્ડએ.	૧
સેજ્જા નિસીહિયાએ, સમાવન્નો ય ગોઅરે;	
અયાવયટ્ટઠા ભુચ્ચા ણં, જઇ તેણં ન સંથરે.	૨
તઓ કારણમુપ્પન્ને, ભત્તપાણં ગવેસએ;	
વિહિણા પુવ્વઉત્તેણ, ઇમેણં ઉત્તરેણ ય. ૩	
કાલેણ નિક્ખમે ભિક્ખૂ, કાલેણ ય પરિક્કમે;	
અકાલં ય વિવજ્જિત્તા, કાલે કાલં સમાયરે.	૪
અકાલે ચરસિ ભિક્ખૂ, કાલં ન પરિલેહસિ;	
અપ્પાણં ય કિલામેસિ, સંનિવેસં ય ગરિહસિ.	૫
સઇ કાલે ચરે ભિક્ખૂ કુજ્જા પુરિસકારિઅં;	
અલાભુત્તિ ન સોએજ્જા, તવોત્તિ અહિઆસએ.	૬
તહેવુચ્ચાવયા પાણા, ભત્તટ્ટઠાએ સમાગયા;	
તં ઉજ્જુઅં ન ગચ્છિજ્જા, જયમેવ પરક્કમે.	૭
ગોચરગ્ગપવિટ્ટઠો અ, ન નિસીએજ્જા કત્થઇ;	
કહં ય ન પબંધિજ્જા, ચિટ્ટિઠતાણ વ સંજએ.	૮
અગ્ગલં ફલિહં દારં, કવાડં વા વિ સંજએ;	
અવલંબિઆ ન ચિટ્ટિઠજ્જા, ગોચરગ્ગગઓ મુણી.	૯
સમણં માહણં વા વિ, કિવિણં વા વણીમગં;	
ઉવસંકમંતં ભત્તટ્ટઠા, પાણટ્ટઠાએ વ સંજએ.	૧૦
તં અઇક્કમિત્તુ ન પવિસે, ન ચિટ્ટે ચક્ખુગોચરં;	
એગંતમવક્કમિત્તા, તત્થ ચિટ્ટિઠજ્જ સંજએ.	૧૧
વણીમગસ્સ વા તસ્સ, દાયગસ્સુભયસ્સ વા,	
અપ્પત્તિઅં સિઆ હુજ્જા, લહુત્તં પવયણસ્સ વા.	૧૨
પરિસેહિએ વ દિન્ને વા, તઓ તમ્મિ નિયત્તિએ;	
ઉવસંકમિજ્જ ભત્તટ્ટઠા, પાણટ્ટઠાએ વ સંજએ.	૧૩
ઉપ્પલં પઉમં વાવિ, કુમુઅં વા મગદંતિઅં;	
અન્નં વા પુફ્ફસચ્ચિત્તં, તં ય સંલુંચિઆ દએ.	૧૪
તં ભવે ભત્તપાણં તુ, સંજયાણ અકપ્પિઅં;	
દિંતિઅં પરિઆઇફ્ફે, ન મે કપ્પઇ તારિસં.	૧૫
ઉપ્પલં પઉમં વા વિ, કુમુઅં વા મગદંતિઅં;	

અન્નં વા પુષ્કસચ્ચિત્તં, તં ચ સંમદ્દિઆ દએ.	૧૬
તં ભવે ભત્તપાણં તુ, સંજયાણ અકપ્પિઅં;	
દિંતિઅં પડિઆઇકુપ્પે, ન મે કપ્પઇ તારિસં.	૧૭
સાલુયં વા વિરાલિયં, કુમુઅં ઉપ્પલનાલિઅં;	
મુણ્ણાલિઅં સાસવનાલિઅં, ઉચ્છુખંડં અનિવ્વુડં.	૧૮
તરુણાગં વા પવાલં, રુકુખસ્સ તણાગસ્સ વા;	
અન્નસ્સ વા વિ હરિઅસ્સ, આમગં પરિવજ્જએ.	૧૯
તરુણિઅં વા ઈવાડિં, આમિઅં ભજ્જિઅં સઇં;	
દિંતિઅં પડિઆઇકુપ્પે, ન મે કપ્પઇ તારિસં.	૨૦
તહા કોલમણુસ્સિન્નં, વેલુઅં કાસવનાલિઅં;	
તિલપપ્પડગં નીમં, આમગં પરિવજ્જએ.૨૧	
તહેવ ચાઉલં પિટ્ઠં, વિઅડં વા તત્તડનિવ્વુડં;	
તિલપિટ્ઠં પૂઇપિન્નાગં, આમગં પરિવજ્જએ.	૨૨
કવિટ્ઠં માઉલિંગં ચ, મૂલગં મૂલગત્તિઅં;	
આમં અસત્થપરિણયં, મણ્ણાસા વિ ન પત્થએ.	૨૩
તહેવ ફલમંથૂણિ, બીઅમંથૂણિ જાણિઅં;	
બિહેલગં પિયાલં ચ, આમગં પરિવજ્જએ.	૨૪
સમુઆણં ચરે ભિક્કૂ, કુલમુચ્ચાવયં સયા;	
નીયં કુલમઇક્કમ, ઊસઢં નાભિધારએ.૨૫	
અદીણો વિત્તિમેસિજ્જા, ન વિસીઇજ્જ પંડિએ;	
અમુચ્છિઓ ભોઅણંમિ, માયણો એસણારએ.	૨૬
બહું પરઘરે અત્થિ, વિવિહં ખાઇમં સાઇમં;	
ન તત્થ પંડિઓ કુપ્પે, ઇચ્છા દિજ્જ પરો ન વા.	૨૭
સયણાસણ વત્થં વા, ભત્ત પાણં વ સંજએ;	
અદિંતસ્સ ન કુપ્પિજ્જા, પચ્ચકુપ્પે વિ અ દીસઓ.	૨૮
ઇત્થઅં પુરિસં વાવિ, ડહરં વા મહલ્લગં;	
વંદમાણં ન જાઇજ્જા, નો અણં ફરુસં વએ.	૨૯
જે ન વંદે ન સે કુપ્પે, વંદિઓ ન સમુક્કસે;	
એવમન્ને સમાણસ્સ, સામણ્ણામણુચિટ્ઠઇ.૩૦	
સિઆ એગઇઓ લહ્હુ, લોભેણ વિણિગૂહઇ;	
મામેયં દાઇયં સંતં, દટ્ઠુણં સયમાયએ.૩૧	
અત્તટ્ઠા ગુરુઓ લુદ્ધો, બહું પાવં પકુવ્વઇ;	
દુત્તોસઓ અ સો હોઇ, નિવ્વાણં ચ ન ગચ્છઇ.	૩૨
સિઓ એગઇઓ લહ્હુ, વિવિહં પાણાભોઅણં;	
ભદ્દગં ભદ્દગં ભુચ્ચા વિવન્નં વિરસમાહરે.૩૩	
જાણંતુ તા ઇમે સમણા, આયયટ્ઠી અયં મુણ્ણી;	
સતુટ્ઠો સેવએ પંતં, લૂહવિત્તી સુતોસઓ.	૩૪
પૂઅણટ્ઠા જસોકામી, માણ સમ્માણાકામએ;	
બહું પસવઇ પાવં, માયાસલ્લં ચ કુવ્વઇ.૩૫	
સુરં વા મેરગં વા વિ, અન્નં વા મજ્જગં રસં;	
સસકુપ્પં ન પિબે ભિક્કૂ, જસં સારકુખ મપ્પણો.	૩૬
પિયા એગઇઓ તેણો, ન મે કોઇ વિઆણાઇ;	
તસ્સ પસ્સહ દોસાઇં, નિઆડિં ચ સુણેહ મે.	૩૭
વડ્ઢઇ સુંડિઆ તસ્સ, માયામોસં ચ ભિક્કુણ્ણો;	
અયસો અ અનિવ્વાણં, સયયં ચ અસાહુઆ.	૩૮
નિચ્ચુવ્વિગ્ગો જહા તેણો, અત્તકમ્મેહિં દુમ્મઇ;	
તારિસો મરણંતે વિ, ન આરાહેઇ સંવરં.૩૯	
આયરિએ નારાહેઇ, સમણો આવિ તારિસે;	

ગિહત્યાવિ ણં ગરિહંતિ, જેણ જાણંતિ તારિસં. એવં તુ અગુણાપ્પેહી, ગુણાણં ચ વિવજ્જઓ; તારિસો મરણંતે વિ, નારાહેઠ સંવરં.૪૧	૪૦
તવં કુવ્વઠ મેહાવી, પણીઅં વજ્જએ રસં; મજ્જપ્પમાય વિરઓ, તવસ્સી અઠઉક્કસો. તસ્સ પસ્સહ કલ્લાણં, અણોગસાહુ પૂઠઅં; વિઉલં અત્થસંજુત્તં, કિત્તઠસ્સં સુણોહ મે.૪૩	૪૨
એવં તુ સગુણાપ્પેહી, અગુણાણં ચ વિવજ્જએ; તારિસો મરણંતે વિ, આરાહેઠ અ સંવરં. આયરિએ આરાહેઠ સમણે આવિ તારિસો; ગિહત્યા વિ ણં પૂયંતિ, જેણ જાણંતિ તારિસં.	૪૪
તવતેણે વયતેણે, રૂવતેણે અ જે નરે; આયારભાવતેણે અ, કુવ્વઠ દેવકિલ્લિસં.૪૬ લક્કણ વિ દેવત્તં, ઉવવત્તો દેવકિલ્લિસે; તત્થા વિ સે ન યાણાઠ, કિં મે કિચ્ચા ઇમં ફલં. તત્તો વિ સે ચઠત્તાણં, લબ્ભિહી એલમૂઅગં; નરયં તિરિક્ખજોણિં વા, બોહી જત્થ સુદુલ્લહા. એઅં ચ દોસં દટ્ટૂણં, નાયપુત્તેણ ભાસિઅં; અણુમાયં પિ મેહાવી, માયામોસં વિવજ્જએ. સિક્ખિઉણ ભિક્ખેસણસોહિં, સંજયાણ બુદ્ધાણ સગાસે; તત્થ ભિક્ખૂ સુપ્પણિહિંદિએ, તિવ્વલજ્જગુણવં વિહરિજ્જાસિં તિ બેમિ.	૪૬
	૪૮
	૪૯
	૫૦

(૬) મહાચારકથાધ્યયન

નાણદંસણસંપન્નં, સંજમે અ તવે રયં; ગણિમાગમસંપન્નં, ઉજ્જાણમ્મિ સમોસઠં.૧ રાયાણો રાયમચ્ચા ય, માહણા અદુવ ખત્તિઆ; પુચ્છંતિ નિહુઅપ્પાણો, કહં ભે આચારગોયરો?.	૨
તેસિં સો નિહુઓ દંતો, સવ્વભૂઅસુહાવહો; સિક્ખાએ સુસમાઉત્તો, આયક્ખઠ વિઅક્ખણો. હંદિ ધમ્મત્થકામાણં, નિગ્ગંથાણં સુણોહ મે; આચારગોઅરં ભીમં, સયલં દુરહિટ્ઠિઅં. નમ્મત્થ એરિસં વુત્તં, જે લોએ પરમદુચ્ચરં; વિઉલટ્ટઠાણભાઠસ્સ, ન ભૂઅં ન ભવિસ્સઠ. સખુરૂડગવિઅત્તાણં, વાહિઆણં ચ જે ગુણા; અખંડકુડિઆ કાયવ્વા, તં સુણોહ જહા તહા. દસ અટ્ટ ય ઠાણાઠં, જાઠં બાલોડવરજ્જઠઠં; તત્થ અન્નયરે ઠાણે, નિગ્ગંથત્તાઉ ભસ્સઠ. વયઠ્ઠકં કાયઠ્ઠકં અકપ્પો ગિહિભાયણં; પલિયકં નિસેજ્જા ય, સિણાણં સોહવજ્જણં. તત્થિમં પઠમં ઠાણં, મહાવીરેણ દેસિઅં; અહિંસા નિઉણા દિટ્ટઠા, સવ્વભૂએસુ સંજમો. જાવંતિ લોએ પાણા, તસા અદુવ થાવરા; તે જાણમજ્જાણં વા, ન હણે ણો વિ ઘાયએ. સવ્વે જીવા વિ ઇચ્છંતિ, જીવિઉં ન મરિજ્જિઉં;	૩
	૪
	૫
	૬
	૭
	૮
	૯
	૧૦

તમ્હા પાણવહં ઘોરં, નિગ્ગંથા વજ્જયંતિ ણં.	૧૧
અપ્પણટ્ઠા પરટ્ઠા વા, કોહા વા જઈ વા ભયા;	
હિંસગં ન મુસં ભૂઆ, નોવિ અન્નં વયાવએ.	૧૨
મુસાવાઓ ઉ લોગમ્મિ, સવ્વસાહૂહિં ગરિહિઓ;	
અવિસ્સાઓ; અ ભૂઆણં, તમ્હા મોસં વિવજ્જએ.	૧૩
ચિત્તમંતમચિત્તં વા, અપ્પં વા જઈ વા બહું;	
દંતસોહણમિત્તં વિ, ઉગ્ગહંસિ અજાઇયા.૧૪	
તં અપ્પણા ન ગિણહંતિ, નો વિ ગિણહાવએ પરં;	
અન્ન વા ગિણહમાણં પિ, નાણુજાણંતિ સંજયા.	૧૫
અભંભચરિઅં ઘોરં, પમાયં દુરહિટ્ઠિઅં;	
નાયરંતિ મુણી લોએ, ભેઆયણવજ્જિણો.	૧૬
મૂલમેયમહમ્મસ્સ, મહાદોસસમુસ્સયં;	
તમ્હા મેહુણસંસગ્ગં, નિગ્ગંથા વજ્જયંતિ ણં.	૧૭
ભિડ મુબ્ભેઇમં લોણં, તિલ્લં સપ્પિં ચ ફાણિઅં;	
ન તે સંનિહિમિચ્છંતિ, નાયપુત્તવઓરયા.૧૮	
લોહસ્સેસ અણુપ્પાસે, મન્ને અન્નયરામવિ;	
જે સિઆ સન્નિહિં કામે, ગિહી પવ્વઇએ ન સે.	૧૯
જં પિ વત્થં વ પાયં વા, કંબલં પાયપુંછણં;	
તં પિ સંજમલજ્જટ્ઠા, ધારંતિ પરિહિતિ અ.	૨૦
ન સો પરિગ્ગહો વુત્તો, નાયપુત્તેણ તાઇણા;	
મુચ્છા પરિગ્ગહો વુત્તો, ઇઇ વુત્તં મહેસિણા.	૨૧
સવ્વત્થુવહિણા ભુદ્ધા, સંરૂપ્પણપરિગ્ગહે;	
અવિ અપ્પણો વિ દેહંમિ, નાયરંતિ મમાઇયં.	૨૨
અહો નિચ્ચં તવો કમ્મં, સવ્વબુદ્ધેહિં વણિણાં;	
જા ય લજ્જાસમા વિત્તી, એગભત્તં ચ ભોઅણં.	૨૩
સંતિમે સુહુમા પાણા, તસા અદુવ થાવરા;	
જાઇં રાઓ અપાસંતો, કહમેસણિઅં ચરે?.	૨૪
ઉદઉલ્લં બીઅસંસત્તં, પાણા નિવડિયા મહિં;	
દ્વિઆ તાઇં વિવજ્જિજ્જા, રાઓ તત્થ કહં ચરે?.	૨૫
એઅં ચ દોસં દટ્ટૂણં, નાયપુત્તેણ ભાસિઅં;	
સવ્વાહારં ન ભુંજંતિ, નિગ્ગંથા રાઇભોઅણં.	૨૬
પુઠ્ઠવિકાયં ન હિંસંતિ, મણસા વયસા કાયસા;	
તિવિહેણ કરણજોએણ, સંજયા સુસમાહિઆ.	૨૭
પુઠ્ઠવિકાયં વિહિંસંતો હિંસઇ ઉ તયસ્સિએ;	
તસે અ વિવિહે પાણો, ચક્ખુસે અ અચક્ખુસે.	૨૮
તમ્હા એઅં વિઆણિત્તા, દોસં દુગ્ગઇવડ્ઢણં;	
પુઠ્ઠવિકાયસમારંભં, જાવજ્જવાઇં વજ્જએ.૨૯	
આઉકાયં ન હિંસંતિ, મણસા વયસા કાયસા;	
તિવિહેણ કરણજોએણ, સંજયા સુસમાહિઆ.	૩૦
આઉકાયં વિહિંસંતો, હિંસઇ ઉ તયસ્સિએ;	
તસે અ વિવિહે પાણો, ચક્ખુસે અ અચક્ખુસે.	૩૧
તમ્હા એઅં વિઆણિત્તા, દોસં દુગ્ગઇવડ્ઢણં;	
આઉકાયસમારંભં, જાવજ્જવાઇં વજ્જએ.૩૨	
જાયતેઅં ન ઇચ્છંતિ, પાવગં જલઇત્તએ;	
તિક્ખમન્નયરં સત્થં, સવ્વઓ વિ દુરાસયં.	૩૩
પાઇણં પડિણં વા વિ, ઉડ્ઢં અણુદિસામવિ;	
અહે દાહિણઓ વા વિ, દહે ઉત્તરઓ વિ અ.	૩૪
ભૂઆણમેસમાઘાઓ, હવ્વવાહો ન સંસઓ;	

તં પઇવપયાવટ્ટા, સંજયા કિંચિ નારભે.૩૫	
તમ્હા એઅં વિઆણિત્તા, દોસં દુગ્ગઇડ્ઢણં;	
તેઉકાયસમારંભં, જાવજીવાઇ વજજએ.૩૬	
અણિલસ્સ સમારંભં, બુદ્ધા મન્નંતિ તારિસં;	
સાવજજબહુલં ચેઅં, નેઅં તાઇહિ સેવિઅં.	૩૭
તાલિઅંટેણ પત્તેણ, સાહાવિહુઅણેણ વા;	
ન તે વીઇઉમિચ્છંતિ, વેઆવેઊણ વા પરં.	૩૮
જં પિ વત્થં વ પાયં વા, કંબલં પાયપુંછણં;	
ન તે વાયમુઇરંતિ, જયં પરિહરંતિ અ.૩૯	
તમ્હા એઅં વિઆણિત્તા, દોસં દુગ્ગઇ વડ્ઢણં;	
વાઉકાયસમારંભં, જાવજીવાઇ વજજએ.૪૦	
વણસ્સઇ ન હિંસંતિ, મણસા વયસા કાયસા;	
તિવિહેણ કરણજોએણ, સંજયા સુસમાહિઆ.	૪૧
વણસ્સઇ વિહિંસંતો, હિંસઇ ઉ તયસ્સિએ;	
તસે અ વિવિહે પાણે, ચકુખુસે અ અચકુખુસે.	૪૨
તમ્હા એઅં વિઆણિત્તા, દોસં દુગ્ગઇવડ્ઢણં;	
વણસ્સઇસમારંભં, જાવજીવાઇ વજજએ.૪૩	
તસકાયં ન હિંસંતિ, મણસા વયસા કાયસા;	
તિવિહેણ કરણજોએણ, સંજયા સુસમાહિઆ.	૪૪
તસકાયં વિહિંસંતો, હિંસઇ ઉ તયસ્સિએ;	
તસે અ વિવિહે પાણે, ચકુખુસે અ અચકુખુસે.	૪૫
તમ્હા એઅં વિઆણિત્તા, દોસં દુગ્ગઇ વડ્ઢણં;	
તસકાયસમારંભં, જાવજીવાઇ વજજએ.૪૬	
જાઇં ચત્તારિડભુજ્જાઇં, ઇસિણા હારમાઇણિ;	
તાઇં તુ વિવજજંતો, સંજમં અણુપાલએ.૪૭	
પિંડં સિજજં ચ વત્થં ચ, ચઉત્થં પાયમેવ ચ;	
અકપ્પિઅં ન ઇચ્છિજ્જા, પરિગાહિજ્જ કપ્પિઅં.	૪૮
જે નિઆગં મમાયંતિ, કીઅ મુદ્દેસિઆહંડં;	
વહં તે સમણુજાણંતિ, ઇઇ વુત્તં મહેસિણા.	૪૯
તમ્હા અસણ પાણાઇં, કીઅ મુદ્દેસિ આહંડં;	
વજજયંતિ ઠિઅપ્પાણો, નિગ્ગંથા ધમ્મજીવિણો.	૫૦
કંસેસુ કંસપાએસુ, કુંડમોએસુ વા પુણો;	
ભુજંતો અસણ-પાણાઇં, આયારા પરિભસ્સઇ.	૫૧
સીઓદગ સમારંભે, મત્તધોઅણ છડ્ડણો;	
જાઇં છિન્નંતિ (છિપ્પંતિ) ભૂઆઇં, દિટ્ઠો તત્થ અસંજમો.	૫૨
પચ્છાકમ્મં પુરેકમ્મં, સિઆ તત્થ ન કપ્પઇ;	
એઅમટ્ઠં ન ભુંજંતિ, નિગ્ગંથા ગિહિભાયણો.	૫૩
આસંદી પલિઅંકેસુ, મંચમાસાલએસુ વા;	
અણાયરિઅ મજ્જાણં, આસઇત્તુ સઇત્તુ વા.	૫૪
નાસંદી પલિઅંકેસુ, ન નિસિજ્જા ન પીઢએ;	
નિગ્ગંથાડપડિલેહાએ, બુદ્ધવુત્તમહિટ્ઠગા.	૫૫
ગંભીરવિજયા એએ, પાણા દુપ્પડિલેહગા;	
આસંદી પલિઅંકો અ, એઅમટ્ઠં વિવજ્જિઆ.	૫૬
ગોઅરગ્ગપવિટ્ઠસ્સ, નિસિજ્જા જસ્સ કપ્પઇ;	
ઇમેરિસમણાયારં, આવજજઇ અબોહિઅં.	૫૭
વિવત્તી બંભચેરસ્સ, પાણાણં ચ વહે વહો;	
વણીમગપડિગ્ઘાઓ, પડિકોહો અગારિણં.	૫૮
અગુત્તી બંભચેરસ્સ, ઇત્થીઓ વા વિ સંકણં;	

કુસીલવડ્ડણં ઠાણં, દૂરઓ પરિવજ્જએ.૫૮	
તિણ્ણમન્નયરાગસ્સ, નિસિજ્જા જસ્સ કપ્પઇ;	
જરાએ અભિભૂઅસ્સ, વાહિઅસ્સ તવસ્સિણો.	૬૦
વાહિઓ વા અરોગી વા, સિણાણંજો ઉ પત્થએ;	
વુક્કંતો હોઇ આયારો, જઢો હવઇ સંજમો.	૬૧
સંતિમે સુહુમા પાણા, ઘસાસુ ભિલુગાસુ અ;	
જે અ ભિક્ખૂ સિણાયંતો, વિઅડેણુપ્પલાવએ.	૬૨
તમ્હા તે ન સિણાયંતિ, સીએણ ઉસિણેણ વા;	
જાવજ્જીવં વયં ઘોરં, અસિણાણમહિટ્ઠગા.	૬૩
સિણાણં અદ્ધવા કક્કં, લુદ્ધં પઉમગાણિ અ;	
ગાયસ્સુવ્વટ્ઠણટ્ઠાએ, નાયરંતિ કયાઇ વિ.	૬૪
નગિણસ્સ વા વિ મુંડસ્સ, દીહરોમનહંસિણો;	
મેહુણા ઉવસંતસ્સ, કિં વિભૂસાઇ કારિઅં?.	૬૫
વિભૂસાવત્તિ અં ભિક્ખૂ, કમ્મં બંધઇ ચિક્કણં;	
સંસારસાયરે ઘોરે, જેણં પડઇ દુરુત્તરે.૬૬	
વિભૂસાવત્તિઅં ચેઅં, બુદ્ધા મન્નંતિ તારિસં;	
સાવજ્જબહુલં ચેઅં, નેયં તાઇહિં સેવિઅં.	૬૭
ખવંતિ અપ્પાણમમોહંસિણો, તવે રયા સંજમઅજ્જવે ગુણે;	
ધુણંતિ પાવાઇ, પુરેકડાઇ, નવાઇ પાવાઇ ન તે કરંતિ.	૬૮
સઓવસંતા અમમા અકિંચણા,	
સવિજ્જવિજ્જાણુગયા જસંસિણો;	
ઉઉપ્પસન્ને વિમલે વ ચંદિમા,	
સિદ્ધિં વિમાણાઇ ઉવેંતિ તાઇણોઠ ત્તિ બેમિ.	૬૯

(૭) સુવાક્યશુદ્ધિનામાધ્યયન

ચઉણ્ણં ખલુ ભાસાણં, પરિસંખાય પન્નવં;	
દુણ્ણં તુ વિણયં સિક્ખે દો ન ભાસિજ્જ સવ્વસો.	૧
જા અ સચ્ચા અવત્તવ્વા, સચ્ચામોસા અ જા મુસા;	
જા અ બુદ્ધેહિંડણાઇણણા, ન તં ભાસિજ્જ પન્નવં.	૨
અસચ્ચમોસં સચ્ચં ચ, અણવજ્જમકક્કસં;	
સમુપ્પેહમસંદિદ્ધં, ગિરં ભાસિજ્જ પન્નવં.૩	
એઅં ચ અટ્ઠમન્નં વા, જં તુ નામેઇ સાસયં;	
સ ભાસં સચ્ચમોસં પિ, તં પિ ધીરો વિવજ્જએ.	૪
વિતહં પિ તહામુત્તિ, જં ગિરં ભાસએ નરો;	
તમ્હા સો પુટ્ઠો પાવેણં, કિં પુણં જો મુસં વએ?.	૫
તમ્હા ગચ્છામો વક્ખામો, અમુગં વા ણે ભવિસ્સઇ;	
અહં વા ણં કરિસ્સામિ, એસો વા ણં કરિસ્સઇ.	૬
એવમાઇ ઉ જા ભાસા, એસકાલંમિ સંકિયા;	
સંપયાઇઅમટ્ઠે વા, તં પિ ધીરો વિવજ્જએ.	૭
અઇઅંમિ અ કાલંમિ, પચ્ચુપ્પન્નમણાગએ;	
જમટ્ઠં તુ ન જાણિજ્જા, એવમેઅં તિ નો વએ.	૮
અઇઅંમિ અ કાલંમિ, પચ્ચુપ્પન્નમણાગએ;	
જત્થ સંકા ભવે તં તુ, એવમેઅં તિ નો વએ.	૯
અઇઅંમિ અ કાલંમિ, પચ્ચુપ્પન્ન મણાગએ;	

નિસ્સંકિઅં ભવે જં તુ, એવમેઅં તિ નિદિસે.	૧૦
તહેવ ફરુસા ભાસા ગુરુભૂઓવઘાઇણી;	
સચ્યા વિ સા ન વત્તવા, જઓ પાવસ્સ આગમો.	૧૧
તહેવ કાણં કાણોત્તિ, પંડગં પંડગે ત્તિ વા;	
વાહિઅં વા વિ રોગિત્તિ, તેણં ચોરે ત્તિ નો વએ.	૧૨
એએણાડનેણ અટ્ટેણં, પરો જેણુવહમ્મઇ;	
આયારભાવદોસન્નુ, ન તં ભાસિજ્જ પન્નવં.	૧૩
તહેવ હોલે ગોલિત્તિ, સાણે વા વસુલિ ત્તિ અ;	
દુમએ દિહએ વા વિ, નેવં ભાસિજ્જ પન્નવં.	૧૪
અજ્જએ પજ્જિએ વા વિ, અમ્મો માઉસિઉત્તિ અ;	
પિઉસ્સિએ ભાયણિજ્જત્તિ, ધૂએ નત્તુણિઅત્તિ અ.	૧૫
હલે હલિત્તિ અન્નિત્તિ, ભટ્ટે સામિણિ ગોમિણિ;	
હાલે ગોલે વસુલિત્તિ, ઇત્થિઅં નેવમાલવે.	૧૬
નામધિજ્જેણ ણં બૂઆ, ઇત્થિગુત્તેણ વા પુણો;	
જહારિહમભિગિજ્જ, આલવિજ્જ લવિજ્જ વા.	૧૭
અજ્જએ પજ્જએ વા વિ, બપ્પો યુલ્લપિઉ ત્તિ અ;	
માઉલો ભાઇણિજ્જત્તિ, પુત્તે નત્તુણિઅ ત્તિઅ.	૧૮
હે હો હલિ ત્તિ અન્નિત્તિ, ભટ્ટે સામિઅ ગોમિઅ;	
હોલ ગોલ વસુલિ ત્તિ, પુરિસં નેવમાલવે.૧૯	
નામધિજ્જેણ ણંબૂઆ પુરિસગુત્તેણ વા પુણો;	
જહારિહમભિગિજ્જ, આલવિજ્જ લવિજ્જ વા.	૨૦
પંચિંદિઆણ પાણાણં, એસ ઇત્થી અયં પુમં;	
જાવ ણં ન વિજાણિજ્જ, તાવ જાઇ ત્તિ આલવે.	૨૧
તહેવ માણુસં પસું, પકુમ્મિ વા વિ સરીસવં;	
થૂલે પમેઇલે વજ્જે, પાઇમે ત્તિ અ નો વએ.	૨૨
પરિવૂઠ ત્તિ ણં બૂઆ, બૂઆ ઉવચિઅ ત્તિ અ;	
સંજાએ પીણિએ વા વિ, મહાકાય ત્તિ આલવે.	૨૩
તહેવ ગાઓ દુજ્જાઓ, દમ્મા ગોરહગ ત્તિ અ;	
વાહિમા રહજોગિ ત્તિ નેવં ભાસિજ્જ પન્નવં.	૨૪
જુવં ગવિત્તિ ણં બૂઆ, ઘેણું રસદય ત્તિ અ;	
રહસ્સે મહલ્લએ વા વિ, વએ સંવહણિ ત્તિ અ.	૨૫
તહેવ ગંતુમુજ્જાણં, પવ્વયાણિ વણાણિ અ;	
રુકુખા મહલ્લ પેહાએ, નેવં ભાસિજ્જ પન્નવં.	૨૬
અલં પાસાયખંભાણં, તોરણાણં ગિહાણ અ;	
ફલિહગ્ગલનાવાણં, અલં ઉદગદોણિણં.૨૭	
પીઠએ ચંગબેરે અ, નંગલે મઇયં સિઆ;	
જંતલટ્ટી વ નાભી વા, ગંડિઆ વ અલં સિઆ.	૨૮
આસણં સયણં જાણં, હુજ્જા વા કિંચુવસ્સએ;	
ભૂઓવઘાઇણિ ભાસં, નેવં ભાસિજ્જ પન્નવં.	૨૯
તહેવ ગંતુમુજ્જાણં, પવ્વયાણિ વણાણિ અ;	
રુકુખા મહલ્લ પેહાએ, એવં ભાસિજ્જ પન્નવં.	૩૦
જાઇમંતા ઇમે રુકુખા, દીહવટ્ટા મહાલયા;	
પયાયસાલા વિડિમા, વએ દરિસણિ ત્તિ અ.	૩૧
તહા ફલાઇં પક્કાઇં, પાયખજ્જાઇનો વએ;	
વેલોઇયાઇં ટાલાઇં, વેહિમાઇં ત્તિ નો વએ.	૩૨
અસંથડા ઇમે અંબા, બહુનિવ્વડિમા ફલા;	
વઇજ્જ બહુ સંભૂઆ, ભૂઅરૂવ ત્તિ વા પુણો.	૩૩
તહોસહિઓ પક્કાઓ, નીલિઆઓ ઇવીઇ અ;	

લાઇમા ભજ્જિમાઉ ત્તિ, પિહુખજ્જ ત્તિ નો વએ.	૩૪
રૂઢા બહુસંભૂઆ, થિરા ઓસઢા વિ અ;	
ગભ્ભિઆઓ પસૂઆઓ, સંસારાઉત્તિ આલવે.	૩૫
તહેવ સંખરિં નચ્યા, કિચ્ચં કજ્જંતિ નો વએ;	
તેણગં વાવિ વજ્જિત્તિ, સુતિત્થિ ત્તિ અ આવગા.	૩૬
સંખરિં સંખરિં બૂઆ, પણિઅટ્ઠં તિ તેણગં;	
બહુસમાણિ તિત્થાણિ, આવગાણં વિઆગરે.	૩૭
તહા નઇઓ પુણ્ણાઓ, કાયતિજ્જત્તિ નો વએ;	
નાવાહિં તારિમાઓત્તિ પાણિપિજ્જત્તિ નો વએ.	૩૮
બહુબાહડા અગાહા, બહુસલિલુપ્પિલોઢગા;	
બહુવિત્થડોઢગા આવિ, એવં ભાસિજ્જ પન્નવં.	૩૯
તહેવ સાવજ્જં જોગં, પરસ્સટ્ઠાએ નિટ્ઠિઠં;	
કીરમાણં તિ વા નચ્યા, સાવજ્જં નાલવે મુણ્ણી.	૪૦
સુકડિત્તિ સુપક્કિત્તિ, સુચ્છિન્ને સુહડે મડે;	
સુનિટ્ઠિઠંએ સુલટ્ઠિઠિત્તિ, સાવજ્જં વજ્જએ મુણ્ણી.	૪૧
પયત્તપક્ક ત્તિ વ પક્કમાલવે, પયત્તછિન્નત્તિ વ છિન્નમાલવે;	
પયત્તલટ્ઠત્તિ વ કમ્મહેઉઅં, પહારગાઢત્તિ વ ગાઢમાલવે.	૪૨
સવ્વુક્કસં પરગ્ઘં વા, અઉલં નત્થિ એરિસં;	
અવિક્કિઅમવત્તવ્વં, અવિઅત્તં ચેવ નો વએ.	૪૩
સવ્વમેઅં વઇસ્સામિ, સવ્વમેઅં તિ નો વએ;	
અણુવીઇ સવ્વં સવ્વત્થ, એવં ભાસિજ્જ પન્નવં.	૪૪
સુક્કીઅં વા સુવિક્કીઅં, અકિજ્જં કિજ્જમેવ વા;	
ઇમં ગિણહ ઇમં મુંચ, પણીયં નો વિઆગરે.	૪૫
અપ્પગ્ઘે વા, મહગ્ઘેવા, કએ વા વિક્કએ વિ વા;	
પણિઅટ્ઠે સમુપ્પન્ને, અણવજ્જં વિઆગરે.	૪૬
તહેવાસંજયં ધીરો આસ એહિ કરેહિ વા;	
સય ચિટ્ઠ વયાહિત્તિ, નેવં ભાસિજ્જ પન્નવં.	૪૭
બહવે ઇમે અસાહૂ, લોએ વુચ્ચંતિ સાહુણો;	
ન લવે અસાહું સાહુત્તિ, સાહું સાહુત્તિ આલવે.	૪૭
નાણઢંસણ સંપન્નં, સંજમે અ તવે રયં;	
એવં ગુણસમાઉત્તં, સંજયં સાહુમાલવે. ૪૮	
ઢેવાણં મણુઆણં ચ, તિરિઆણં ચ વુગ્ગહે;	
અમુગાણં જઓ હોઉ, મા વા હોઉત્તિ નો વએ.	૫૦
વાઓ વુટ્ઠં ચ સીઉણહં, ખેમં ધાયં સિવંતિ વા;	
કયા ણુ હુજ્જ એઆણિ? મા વા હોઉ ત્તિ નો વએ.	૫૧
તહેવ મેહં વ નહં વ માણવં, ન ઢેવઢેવત્તિ ગિરં વઇજ્જા;	
સમુચ્છિએ ઉન્નએ વા પઓએ, વઇજ્જ વા વુટ્ઠ બલાહયેત્તિ.	૫૨
અંતલિક્ખત્તિ ણં બૂઆ, ગુજ્જાણુચરિઅત્તિ અ;	
રિદ્ધિમંતં નરં ઢિસ્સ, રિદ્ધિમંતં તિ આલવે.	૫૩
તહેવ સાવજ્જણુમોઅણી ગિરા,	
ઓહારિણી જા ય પરોવઘાઇણી;	
સે કોહ લોહ ભય હાસ માણવો,	
ન હાસમાણો વિ ગિરં વઇજ્જા. ૫૪	
સુવક્કસુદ્ધિં સમુપેહિઆ મુણ્ણી,	
ગિરં ચ દુટ્ઠં પરિવજ્જએ સયા;	
મિઅં અદુટ્ઠં અણુવીઇ ભાસએ,	
સયાણ મજ્જે લહઇ પસંસણં. ૫૫	
ભાસાઇ ઢોસે અ ગુણે અ જાણિઆ,	

તીસે અ દુટ્ટે પરિવજજએ સયા;
 છસુ સંજએ સામણિએ સયા જએ,
 વઇજજ બુદ્ધે હિઅમાણુલોમિઅં. ૫૬
 પરિક્ખભાસી સુસમાહિંદિએ;
 ચઉક્કસાયાવગએ અણિસ્સિએ;
 સ નિદ્ધણે ધુન્નમલં પુરેકડં,
 આરાહએ લોગમિણં તહા પરં ૦ તિબેમિ. ૫૭

(૮) આચાર પ્રણિધિનામાધ્યયન

આચારપ્પણિહિં, લહ્હુ જહા કાયવ્વ ભિક્ખુણા;
 તં ભે ઉદાહરિસ્સામિ, અણુપુવ્વિં સુણેહ મે. ૧
 પુઢવીદગઅગણિ મારુઅ, તણરુક્ખસબીયગા;
 તસા અ પાણા જીવત્તિ, ઇઇવુત્તં મહેસિણા. ૨
 તેસિં અચ્છણજોએણ, નિચ્ચં હોઅવ્વયં સિઆ;
 મણસા કાયવક્કંણં, એવં હવઇ સંજએ. ૩
 પુઢવિં ભિત્તિં સિલં લેલું, નેવ ભિંદે ન સંલિહે;
 તિવિહેણ કરણજોએણ, સંજએ સુસમાહિએ. ૪
 સુદ્ધપુઢવિએ ન નિસીએ, સસરક્ખંમિ અ આસણે;
 પમજ્જિત્તુ નિસીઇજજા, જાઇતા જસ્સ ઉગ્ગહં. ૫
 સીઓદગં સેવિજજા, સિલાવુટ્ઠં હિમાણિ અ;
 ઉસિણોદગં તત્તફાસુઅં, પડિગાહિજજ સંજએ. ૬
 ઉદઉલ્લં અપ્પણો કાયં, નેવ પુછે ન સંલિહે;
 સમુપ્પેહ તહાભૂઅં, નો ણં સંઘટ્ટએ મુણી. ૭
 ઇંગાલં અગણિ અચ્ચિં, અલાયં વા સજોઇઅં;
 ન ઉંજિજજા ન ઘટ્ટિજજા, નો ણં નિવ્વાવએ મુણી. ૮
 તાલિઅંટેણ પત્તેણ, સાહાએ વિહુયણેણ વા;
 ન વીઇજજ અપ્પણો કાયં, બાહિરં વા વિ પુગ્ગલં. ૯
 તણરુક્ખં ન ઇંદિજજા, ફલં મૂલં ચ કસ્સ ઇ;
 આમગં વિવિહં બીઅં, મણસા વિ ન પત્થએ. ૧૦
 ગહણેસુ ન ચિટ્ટિજજા, બીએસુ હરિએસુ વા;
 ઉદગંમિ તહા નિચ્ચં, ઉત્તિંગપણગેસુ વા. ૧૧
 તસે પાણે ન હિંસિજજા, વાયા અદુવ કમ્મુણા;
 ઉવરઓ સવ્વ ભૂએસુ, પાસેજજ વિવિહં જગં. ૧૨
 અટ્ઠ સુહુમાઇ પેહાએ, જાઇં જાણિત્તુ સંજએ;
 દયાહિગારી ભૂએસુ, આસ ચિટ્ઠ સએહિ વા. ૧૩
 ક્યરાઇં અટ્ઠ સુહુમાઇં, જાઇં પુચ્છિજજ સંજએ;
 ઇમાઇં તાઇં મેહાવી, આઇ ખિજજ વિઅક્ખણો. ૧૪
 સિણેહં પુક્કસુહુમં ચ, પાણુત્તિંગં તહેવ ય;
 પણગં બીઅહરિઅં ચ, અંડસુહુમં ચ અટ્ઠમં. ૧૫
 એવમેઆણિ જાણિત્તા, સવ્વભાવેણ સંજએ;
 અપ્પમત્તો જએ નિચ્ચં, સવ્વિંદિઅસમાહિએ. ૧૬
 ધુવં ચ પડિલેહિજજા, જોગસા પાયકંબલં;
 સિજજમુચ્ચારભૂમિં ચ, સંથારં અદુવાસણં. ૧૭
 ઉચ્ચારં પાસવણં; ખેલં સિંઘાણજલ્લિઅં;
 ફાસુઅં પડિલેહિત્તા, પરિટ્ઠાવિજજ સંજએ. ૧૮
 પવિસિત્તુ પરાગારં, પાણટ્ઠા ભોઅણસ્સ વા,
 જયં ચિટ્ઠે મિઅં ભાસે, ન ય રૂવેસુ મણં કરે. ૧૯
 બહું સુણેહિ કન્નેહિં, બહું અચ્છીહિં પિચ્છઇ;
 ન ય દિટ્ઠં સુઅં સવ્વં, ભિક્ખૂ અક્ખાઉમરિહઇ. ૨૦

સુઅં વા જઇ વા દિટ્ઠં ન લવિજ્જોવઘાઇઅં; ન ય કેણ ઉવાએણં, ગિહિજોગં સમાયરે. ૨૧	
નિટ્ઠાણં રસનિજ્જૂઠં, ભદ્ગં પાવગંતિ વા; પુટ્ઠો વા વિ અપુટ્ઠો વા, લાભાલાભં ન નિદિસે.	૨૨
ન ય ભોઅણંમિ ગિદ્ધો, ચરે ઉંછં ન અયંપિરો; અફાસુઅં ન ભુંજિજ્જા, કીય મુદ્દેસિઆહડં.	૨૩
સંનિહિં ય ન કુલ્લિજ્જા, અણુમાયં પિ સંજએ; મુહાજીવી અસંબદ્ધે, હવિજ્જ જગનિસ્સિએ.	૨૪
લૂહવિત્તો સુસંતુટ્ઠે અપ્પિચ્છે સુહરે સિઆ; આસુરતં ન ગચ્છિજ્જા, સુચ્યા ણં જિણ સાસણં.	૨૫
કન્નસુકુખેહિં સદેહિં, પેમં નાભિનિવેસએ; દારુણં કક્કસં ફાસં, કાએણ અહિઆસએ.	૨૬
ખુહં પિવાસં દુસ્સિજ્જં, સીઉણહં અરઇં ભયં; અહિઆસે અવહિઓ, દેહદુકુખં મહાફલં.	૨૭
અત્યંગયંમિ આઇચ્ચે, પુરત્યા અ અણુગગએ; આહાર માઇયં સવ્વં, મણસાવિ ન પત્યએ.	૨૮
અતિતિણે અચવલે, અપ્પભાસી મિઆસણો; હવિજ્જ ઉઅરે દંતે, થોવં લહ્હં ન ખિંસએ.	૨૯
ન બાહિરં પરિભવે, અત્તાણં ન સમુક્કસે; સુઅલાભે ન મજ્જિજ્જા, જચ્યા, તવસ્સિબુદ્ધિએ.	૩૦
સે જાણમજાણં વા, કટ્ટુ, આહમ્મિઅં પર્યં; સંવરે ખિપ્પમપ્પાણં, બીઅં તં ન સમાયરે.	૩૧
અણાચારં પરક્કમ્મ, નેવ ગૂહે ન નિન્હવે; સુઇ સયા વિયડભાવે, અસંસત્તે જિઇંદિએ.	૩૨
અમોહં વયણં કુજ્જા, આયરિઅસ્સ મહપ્પણો; તં પરિગિજ્જા વાયાએ, કમ્મુણા ઉવવાયએ.	૩૩
અધુવં જીવિઅં નચ્યા, સિદ્ધિમગ્ગં વિઆણિઆ; વિણિઅટ્ટિજ્જા ભોગેસુ, આઉં પરિમિઅમપ્પણો.	૩૪
બલં થામં ય પેહાએ, સદ્દામારુગ્ગમપ્પણો; ખિત્તં કાલં ય વિન્નાય, તહપ્પાણં નિજુંજએ.	૩૫
જરા જાવ ન પીડેઇ, વાહી જાવ ન વડ્ઢઇ; જાવિદિઆ ન હાયંતિ, તાવ ધમ્મં સમાયરે.	૩૬
કોહં માણં ય માયં ય લોભં ય, પાવવડ્ઢણ; વમે ચત્તારિ દોસે ઉ, ઇચ્છંતો હિઅમપ્પણો.	૩૭
કોહો પીઇંપણાસેઇ, માણો વિણયનાસણો; માયા મિત્તાણિ નાસેઇ, લોભો સવ્વવિણાસણો.	૩૮
ઉવસમેણ હણે કોહં, માણં મદવયા જિણે; માયં ચજ્જવભાવેણ, લોભં સંતોસઓ જિણે.	૩૯
કોહો અ માણો અ અણિગ્ગહીઆ, માયા અ લોભો અ પવ્વડ્ઢમાણા; ચત્તારિ એએ કસિણા કસાયા, સિંચન્તિ મૂલાઇં પુણભ્ભવસ્સ. ૪૦	
રાયણિએસુ વિણયં પરૂજે, ધુવસીલયં સયયં ન હાવઇજ્જા; કુમ્મુવ્વ અલ્લીણપલીણાગુત્તો, પરક્કમિજ્જા તવસંજમંમિ. ૪૧	
નિદં ય ન બહુ મન્નિજ્જા, સપ્પહાસં વિવજ્જએ; મિહો કહાહિં ન રમે, સજ્જાયંમિ રઓ સયા. ૪૨	

જોગ ચ સમણધમ્મમ્મિ, જુંજે અણલસો ધુવં; જુત્તો અ સમણધમ્મમ્મિ, અટ્ઠં લહઇ અણુતરં.	૪૩
ઇહલોગપારત્તહિઅં, જેણ ગચ્છઇ; સુગ્ગઇ, બહુસ્સુઅં પજ્જુવા સિજ્જા, પુચ્છિજ્જત્થવિણિચ્છયં.	૪૪
હત્થં પાયં ચ કાયં ચ, પણિહાય જિંઇંદિએ; અલ્લીણગુત્તો નિસિએ, સગાસે ગુરુણો મુણી.	૪૫
ન પક્ખઓ ન પુરઓ, નેવ કિચ્ચાણ પિટ્ઠઓ; ન ય ઉરું સમાસિજ્જ, ચિટ્ઠિજ્જા ગુરુણંતિએ.	૪૬
અપુચ્છિઓ ન ભાસિજ્જા, ભાસમાણસ્સ અંતરા; પિટ્ઠિમંસં ન ખાઇજ્જા, માયામોસં વિવજ્જએ.	૪૭
અપ્પત્તિઅં જેણ સિઆ, આસુ કુપ્પિજ્જ વા પરો; સવ્વસો તંન ભાસિજ્જા, ભાસં અહિઅ ગામિણિં.	૪૮
દિટ્ઠં મિઅં અસંદિદ્ધં, પડિપુત્તં વિઅં જિઅં; અયંપિરમણુવ્વિગ્ગં, ભાસં નિસિર અત્તવં.	૪૯
આયારપન્નત્તિધરં, દિટ્ઠિવાયમહિજ્જગં; વાયવિક્ખલિઅં નચ્ચા, નતં ઉવહસે મુણી.	૫૦
નક્ખત્તં સુમિણં જોગં, નિમિત્તં મંતભેસજં; ગિહિણો તં ન આઇક્ખે, ભૂઆહિગરણં પયં.	૫૧
અન્નટ્ઠં પગડં લયણં, ભઇજ્જ સયણાસણં; ઉચ્ચારભૂમિ સંપન્નં ઇત્થીપસુવિવજ્જિઅં.પર	
વિવિત્તા અ ભવે સિજ્જા, નારીણં ન લવે કહં; ગિહિસંથવં ન કુજ્જા, કુજ્જા સાહૂહિં સંથવં.	૫૩
જહા કુક્કુડપોઅસ્સ, નિચ્ચં કુલલઓ ભયં; એવં ખુ બંભયારિસ્સ, ઇત્થીવિગ્ગહઓ ભયં.	૫૪
ચિત્તભિત્તિં ન નિજ્જાએ, નારિં વા સુઅલંકિઅં, ભક્ખરં પિવ દટ્ઠૂણં, દિટ્ઠિં પડિસમાહરે.	૫૫
હત્થપાયપડિચ્છિન્નં, કન્નનાસવિગપ્પિઅં; અવિ વાસસયં નારિં, બંભયારી વિવજ્જએ.	૫૬
વિભૂસા ઇત્થિસંસગ્ગો, પણીઅં રસભોઅણં, નરસ્સત્તગવેસિસ્સ વિસં તાલઉડં જહા.૫૭	
અંગપચ્ચંગસંઠાણં, ચારુલ્લવિઅપેહિઅં; ઇત્થીણં તં ન નિજ્જાએ, કામરાગવિવડ્ઢણં.	૫૮
વિસએસુ મણુનેસુ, પેમં નાભિનિવેસએ; અણિચ્ચં તેસિં વિન્નાય, પરિણામં પુગ્ગલાણ ય.	૫૯
પોગ્ગલાણં પરિણામં, તેસિં નચ્ચા જહા તહા; વિણીઅતણહો વિહરે, સીઇભૂએણ અપ્પણા.	૬૦
જાઇ સદ્ધાઇ નિક્ખંતો, પરિઆયટ્ઠાણમુત્તમં; તમેવ અણુપાલિજ્જા, ગુણે આયરિઅસંમએ.	૬૧
તવં ચિમં સંજમજોગયં ચ, સજ્જાયજોગં ચ સયા અહિટ્ઠિએ;	
સુરે વ સેણાઇ સમત્તમાઉહે, અલમપ્પણો હોઇ અલં પરેસિં.	૬૨
સજ્જાય સજ્જાણરયસ્સ તાઇણો, અપાવભાવસ્સ; તવે રયસ્સ;	
વિસુજ્જાઇ જં સિ મલં પુરેકડં, સમીરિઅં રુપ્પમલં વ જોઇણા.	૬૩
સે તારિસે દુક્ખસહે જિંઇંદિએ, સુએણ જુત્તે અમમે અકિંચાણે;	

વિરાયઠ કમ્મઘણંમિ અવગએ,
કસિણબ્ભપુડાવગમે વ ચંદિમે○ ત્તિભેમિ.૬૪

(૯) વિનયસમાધિનામાધ્યયન (પ્રથમ ઉદ્દેશઃ)

થંભા વ કોહા વ મયપ્પમાયા,
ગુરુસ્સગાસે વિણયં ન સિક્ખે;
સો ચેવ ઉ તસ્સ અભૂઠભાવો,
ફલં વ કીઅસ્સ વહાય હોઈ. ૧

જે આવિ મંદિત્તિ, ગુરું વિઠત્તા,
હરે ઇમે અપ્પસુઅત્તિ નચ્ચા;
હીલંતિ મિચ્છં પરિવજ્જમાણા
કરંતિ આસાયણ તે ગુરૂણાં. ૨

પગઈઈ મંદા વિ ભવંતિ એગે,
હરે વિ અ જે સુઅબુદ્ધોવવેઆ;
આયારમંતા ગુણસુટ્ઠિઅપ્પા,
જે હીલિઆ સિહિરિવ ભાસ કુજ્જા. ૩

જે આવિ નાગં હરંતિ નચ્ચા,
આસાયએ સે અહિઆય હોઈ;
એવાયરિઅં પિ હુ હીલયંતો,
નિઅચ્છઠ જાઇપહં ખુ મંદો. ૪

આસિવિસો વા વિ પરં સુરુટ્ઠો,
કિં જીવનાસાઉ પરં નુ કુજ્જા;
આયરિઅપાયા પુણ અપ્પસન્ના,
અબોહિઆસાયણ નત્થિ મુક્ખો. ૫

જો પાવગં જલિઅમવક્કમિજ્જા,
આસીવિસં વા વિ હુ કોવઇજ્જા;
જો વા વિસં ખાયઇ જીવિઅટ્ઠી,
એસોવ માસાયણયા ગુરૂણાં. ૬

સિયા હુ સે પાવય નો હરેજ્જા,
આસીવિસો વા કુવિઓ ન ભક્ખે;
સિયા વિસં હાલહલં ન મારે,
ન યાવિ મોક્ખો ગુરુહીલણાએ. ૭

જો પવ્વયં સિરસા ભેત્તુમિચ્છે,
સુત્તં વ સીહં પરિબોહઇજ્જા,
જો વા દએ સત્તિઅગ્ગે પહારં,
એસોવમાસાયણયા ગુરૂણાં. ૮

સિયા હુ સીસેણ ગિરિં પિ ભિન્દે,
સિયા હુ સીહો કુવિઓ ન ભક્ખે;
સિયા ન ભિન્દિજ્જા વ સત્તિઅગ્ગં,
ન યાવિ મોક્ખો ગુરુહીલણાએ. ૯

આયરિયપાયા પુણ અપ્પસન્ના,
અબોહિઆસાયણ નત્થિ મુક્ખો;
તમ્હા અણાબાહસુહાત્તિકંખી,
ગુરુપ્પસાયાત્તિમુહો રમિજ્જા. ૧૦

જહાહિઅગ્ગી જલણં નમંસે,

નાણાહુધમન્તપયાભિસિત્તં;
 એવાયરિયં ઉવચિટ્ટઠઠજજા;
 અણન્તનાણોવગઓ વિ સન્તો. ૧૧
 જસ્સન્તિએ ધમ્મપયાઇં સિક્ખે,
 તસ્સન્તિએ વેણઇયં પઉંજે;
 સક્કારએ સિરસા પંજલીઓ,
 કાયગ્ગિરા ભો મણસા ય નિચ્ચં. ૧૨
 લજજા દયા સંજમ બંભયેરં,
 કલ્લાણાભાગિસ્સ વિસોહિઠાણં;
 જે મે ગુરુ સયયમણુસાસયન્તિ,
 તેહહં ગુરુ સયયં પૂયયામિ. ૧૩
 જહા નિસન્તે તવણચ્ચિમાલી,
 પભાસઇ કેવલભારહં તુ;
 એવાયરિઓ સુયસીલ બુદ્ધિએ,
 વિરાયઇ સુરમજ્જે વ ઇંદો. ૧૪
 જહા સસી કોમુઇ જોગજુત્તો,
 નક્ખત્તતારાગણપરિવુડપ્પા,
 ખે સોહઇ વિમલે અભ્ભમુક્કે
 એવં ગણી સોહઇ ભિક્ખુમજ્જે. ૧૫
 મહાગરા આયરિયા મહેસી,
 સમાહિજોગે સુયસીલબુદ્ધિએ;
 સમ્પાવિઉકામે અણુત્તરાઇં,
 આરાહએ તોસઇ ધમ્મકામી. ૧૬
 સોચ્ચાણ મેહાવિસુભાસિયાઇં,
 સુસ્સૂસએ આયરીઅપ્પમત્તો;
 આરાહઇત્તાણગુણે અણોગે,
 સે પાવઇ સિદ્ધિમણુત્તરેઠ ત્તિભેમિ. ૧૭

(વિનયસમાધ્યધ્યયને દ્વિતીય ઉદ્દેશઃ)

મૂલાઉ બન્ધપ્પભવો દુમસ્સ,
 બન્ધાઉ પચ્છા સમુવેન્તિ સાહા;
 સાહપ્પસાહા વિરુહન્તિ પત્તા,
 તઓ સે પુહ્ણં ય ફલં રસો ય. ૧
 એવં ધમ્મસ્સ વિણઓ,
 મલં પરમો સે મુક્ખો;
 જેણ કિત્તિ સુઅં સિગ્ઘં,
 નીસેસં યાભિગચ્છઇ. ૨
 જે ય ચણ્ણે મિએ થદ્ધે,
 દુવ્વાઇ નિયડી સઢે;
 વુજ્જઇ સે અવિનીયપ્પા,
 કટ્ઠં સોયગયં જહા. ૩
 વિણયં પિ જો ઉવાએણં,
 ચોઇઓ કુપ્પઇ નરો;
 દિવ્વં સો સિરિમિજ્જન્તિં,
 દંડેણ પડિસેહએ. ૪
 તહેવ અવિણીઅપ્પા, ઉવવજ્જા હયા ગયા;
 દીસન્તિ દુહમેહન્તા, આભિઓગમુવટ્ઠિયા.
 તહેવ સુવિણીઅપ્પા, ઉવવજ્જા હયા ગયા;
 દીસન્તિ સુહમેહન્તા, ઇડિંદે પત્તા મહાયસા.

૫

૬

તહેવ અવિણીઅપ્પા, લોગંસિ નરનારિઓ; દીસન્તિ દુહમેહન્તા, છાયા વિગલિતેન્દિયા. દણ્ડસત્યપરિજુણા, અસભ્ભવયણેહિ ય; કલુણા વિવન્નછન્દા, ખુપ્પિવાસાપરિગયા.૮	૭
તહેવ સુવિણીઅપ્પા, લોગંસિ નરનારિઓ; દિસન્તિ સુહમેહન્તા, ઇરિંદે પત્તા મહાયસા. તહેવ અવિણીઅપ્પા, દેવા જ ક્ખા ય ગુજ્જગા; દીસન્તિ દુહમેહન્તા, આભિઓગ મુવિટ્ઠિઆ.	૯
તહેવ સુવિણીઅપ્પા, દેવા જ ક્ખા અ ગુજ્જગા; દિસન્તિ સુહમેહન્તા, ઇરિંદે પત્તા મહાયસા. જે આયરિય ઉવજ્જાયાણં, સુસ્સૂસા વયણંકરા; તેસિં સિક્ખા પવડ્ઢન્તિ, જલસિત્તા ઇવ પાયવા. અપ્પણટ્ઠા પરટ્ઠા વા, સિપ્પા નેઉણિયાણિ ય; ગિહિણો ઉવભોગટ્ઠા, ઇહ લોગસ્સ કારણા.	૧૦
જેણે બન્ધં વહં ઘોરં, પરિઆવં ચ દારુણં; સિક્ખમાણા નિયચ્છન્તિ, જુત્તા તે લલિઇન્દિઆ. તેડવિ તં ગુરું પૂયન્તિ, તસ્સ સિપ્પસ્સ કારણા; સક્કારેન્તિ, નમંસન્તિ તુટ્ઠા નિદેસવત્તિણો. કિં પુણ જે સુઅગ્ગાહી, અણન્તહિયકામએ; આયરિયા જં વએ ત્મિક્ખૂ, તમ્હા તં નાઇવિત્તએ.	૧૧
નીઅં સેજજં ગઇં ઠાણં, નીયં ચ આસણાણિ ય; નીયં ચ પાએ વંદિજ્જા, નીયં કુજ્જા ય અંજલિં. સંઘટ્ટઇત્તા કાએણં, તહા ઉવહિણામવિ; ખમેહ અવરાહં મે, વઇજ્જ ન પુણત્તિ અ. દુગ્ગાઓ વા પઓએણં, ચોઇઓ વહઇ રહં; એવં દુબુદ્ધિ કિચ્ચાણં, વુત્તો વુત્તો પકુવ્વઇ.	૧૨
(આલવંતે લવંતે વા, ન નિસિજ્જાઇ પડિસ્સુણે; મુત્તૂણં આસણં ધીરો, સુસ્સૂસાએ પડિસ્સુણે) કાલં ઇંદોવયારં ચ, પડિલેહિત્તાણ હેઉહિં; તેણં તેણં ઉવાએણં, તં તં સંપડિવાયએ.૨૦ વિવત્તી અવિણીયસ્સ, સમ્પત્તી વિણિયસ્સ અ; જસ્સેયં દુહઓ નાયં, સિક્ખં સે અભિગચ્છઇ. જે આવિ ચણ્ડે મઇ ઇરિંદે ગારવે, પિસુણે નરે સાહસ હીણેપેસણે; અદિટ્ઠધમ્મે વિણાએ અકોવિએ, અસંવિભાગી ન હુ તસ્સ મુક્ખો. ૨૨ નિદેસવત્તી પુણ જે ગુરૂણં, સૂયત્થ ધમ્મા વિણયમ્મિ કોવિયા; તરિત્તુ તે ઓહમિણં દુરુત્તરં, ખવિત્તુ કમ્મં ગઇમુત્તમં ગયંતિ ભેમિ.૨૩	૧૩
	૧૪
	૧૫
	૧૬
	૧૭
	૧૮
	૧૯
	૨૧

(વિનયસમાધ્યયને તૃતીય ઉદ્દેશઃ)

આયરિયં અગ્ગિભિવાહિઅગ્ગી,
સુસ્સૂસમાણો પડિજાગરિજ્જા;
આલોઇયં ઇંગિઅમેવ નચ્ચા,
જો ઇંદમારાહયઇ સ પુજ્જો. ૧
આયારમટ્ઠા વિણયં પઉંજે,
સુસ્સૂસમાણો પરિગિજ્જા વક્કં;

જહોવઈટૂઠં અભિકંખમાણો,
 ગુરું તુ નાસાયયઈ સ પુજજો. ૨
 રાઈણિએસુ વિણયં પઉંજે,
 ડહરા વિ ય જે પરિયાય જેટૂઠા,
 નિયત્તણો વટૂટઈ સચ્ચવાઈ,
 ઓવાયવં વક્કકરે સ પુજજો. ૩
 અન્નાયઉંઈં યરઈ વિસુદ્ધં,
 જવણટૂઠયા સમુયાણં ય નિચ્ચં;
 અલદ્ધયં નો પરિદેવએજજા,
 લદ્ધું ન વિકત્થયઈ સ પુજજો. ૪
 સંથાર સેજજા સણ ભત્તપાણો,
 અપ્પિચ્છયા અઈલાભે વિ સન્તે;
 જો એવમપ્પાણાભિતોસએજજા,
 સંતોસ પાહન રએ સ પુજજો. ૫
 સક્કા સહેઉં આસાઈ કંટયા,
 અઓમયા ઉચ્છહયા નરેણં;
 અણાસએ જો ઉ સહેજજ કંટએ,
 વઈમએ કણસરે સ પુજજો. ૬
 મુહુત્ત દુક્ખા ઉ હવન્તિ કંટયા,
 અઓમયા તે વિ તઓ સુઉદ્ધરા;
 વાયાદુરુત્તાણિ દુરુદ્ધરાણિ,
 વેરાણુબન્ધીણિ મહબ્ભયાણિ. ૭
 સમાવયન્તા વયણાભિધાયા,
 કણ્ણંગયા દુમ્મણિયં જણન્તિ;
 ધમ્મો ત્તિ કિચ્ચા પરમગ્ગસૂરે,
 જિઈન્દિએ જો સહઈ સ પુજજો. ૮
 અવણવાયં ય પરમ્મુહસ્સ,
 પચ્ચકુખઓ પડિણીયં ય ભાસં;
 ઓહારણિ અપ્પિયકારિણિ ય,
 ભાસં ન ભાસેજજ સયા સ પુજજો. ૯
 અલોલુએ અક્કુહએ અમાઈ,
 અપિસુણે યાવિ અદ્દીણવિત્તી;
 નો ભાવએ નો વિય ભાવિયપ્પા,
 અકોઉહલ્લે ય સયા સ પુજજો. ૧૦
 ગુણોહિ સાહૂ અગુણોહિડસાહૂ,
 ગેણહાહિ સાહુગુણ મુંચડસાહૂ;
 વિયાણિયા અપ્પગમપ્પએણં,
 જો રાગદોસેહિ સમો સ પુજજો. ૧૧
 તહેવ ડહરં વ મહલ્લગં વા,
 ઈત્થીં પુમં પવ્વઈયં ગિહિં વા;
 નો હીલએ નોડવિ ય ખિંસએજજા,

થંભં ચ ક્રોહં ચ ચએ સ પુજ્જો. ૧૨
જે માણિયા સયયં માણયંતિ,
જત્તેણ ક્ષં વ નિવેસયંતિ;
તે માણએ માણરિહે તવસ્સી,
જિંદિએ સચ્ચરએ સ પુજ્જો. ૧૩
તેસિં ગુરુણં ગુણસાયરાણં,
સોચ્ચા ણ મેહાવી સુભાસિયાઇં;
ચરે મુણી પંચ રએ તિગુત્તો,
ચઉક્કસાયાવગએ સ પુજ્જો. ૧૪
ગુરુમિહ સયયં પરિયરિય મુણી,
જિણમયનિઉણે અભિગમ કુસલે;
ધુણિય રયમલં પુરેકકં,
ભાસુર મઉલં ગઇં ગયઠ ત્તિભેમિ. ૧૫

(વિનયસમાધ્યયને ચતુર્થ ઉદ્દેશઃ)

સુયં મે આઉસં! તેણં ભગવયા એવમકૂખાયં, ઇહ ખલુ થેરેહિં ભગવંતેહિં ચત્તારિ વિણય સમાહિટ્ઠાણા પન્નત્તા, ક્યરે ખલુ તે થેરેહિં ભગવંતેહિં ચત્તારિ વિણય સમાહિટ્ઠાણા પન્નત્તા? ઇમે ખલુ તે થેરેહિં ભગવંતેહિં ચત્તારિ વિણયસમાહિટ્ઠાણા પન્નત્તા, તં જહા-વિણય સમાહી, સુય સમાહી, તવસમાહી, આયારસમાહીઠ વિણએ સુએ અ તવે, આયારે નિચ્ચ પંડિયા; અભિરામયંતિ અપ્પાણં, જે ભવંતિ જિંદિયા (૧)

ચઉવ્વિહા ખલુ વિણયસમાહી ભવઇ, તં જહા-અણુસાસિજ્જંતો સુસ્સુસઇ (૧) સમ્મં સંપડિવજ્જઇ (૨) વેયમારાહઇ (૩) ન ચ ભવઇ અત્તસંપગ્ગહિએ (૪) ચઉત્થં પયં ભવઇ, ભવઇ ય ઇત્થ સિલોગો

પેરેઇં હિયાણુસાસણં, સુસ્સુસઇ તં ચ પુણો અહિટ્ઠિએ; ન ચ માણમએણ મજ્જઇ, વિણયસમાહી આયયટ્ઠિએ (૨)

ચઉવ્વિહા ખલુ સુયસમાહી ભવઇ, તં જહા-સુયં મે ભવિસ્સઇત્તિ અજ્જાઇયવ્વં ભવઇ (૧) એગગ્ગચિત્તો ભવિસ્સામિત્તિ અજ્જાઇયવ્વં ભવઇ (૨) અપ્પાણં ઠાવઇસ્સામિત્તિ અજ્જાઇયવ્વં ભવઇ (૩) ઠિઓપરં ઠાવઇસ્સામિત્તિ અજ્જાઇયવ્વં ભવઇ (૪) ચઉત્થંપયં ભવઇ, ભવઇ ય ઇત્થ સિલોગો

નાણમેગગ્ગ ચિત્તો ય, ઠિઓ ય ઠાવઇ પરં; સુયાણિ ય અહિજ્જિત્તા, રઓ સુય સમાહિએ (૩)

ચઉવ્વિહા ખલુ તવસમાહી ભવઇ, તં જહા-નો ઇહલોગ-ટ્ઠયાએ તવમહિટ્ઠિજ્જા (૧) નો પરલોગટ્ઠયાએ તવમહિ-ટ્ઠિજ્જા (૨) નો કિત્તિ વ વણ્ણ સદ્ધસિલોગટ્ઠયાએ તવમહિ-ટ્ઠિજ્જા (૩) નન્નત્થ નિજ્જરટ્ઠયાએ તવમહિટ્ઠિજ્જા (૪) ચઉત્થં પયં ભવઇ, ભવઇ ય ઇત્થ સિલોગો

વિવિહગુણ તવોરએ ય નિચ્ચં, ભવઇ નિરાસએ નિજ્જ-રટ્ઠિએ; તવસા ધુણઇ પુરાણપાવગં, જુત્તો સયા તવસમાહિએ (૪)

ચઉવ્વિહા ખલુ આયારસમાહી ભવઇ, તં જહા-નો ઇહલોગટ્ઠયાએ આયારમહિટ્ઠિજ્જા (૧) નો પરલોગટ્ઠયાએ આયારમહિટ્ઠિજ્જા (૨) નોકિત્તિવણ્ણ-સદ્ધસિલોગટ્ઠયાએ આયારમહિટ્ઠિજ્જા (૩) નન્નત્થ અરિહંતેહિં હેઊહિં આયારમહિટ્ઠિજ્જા (૪) ચઉત્થં પયં ભવઇ, ભવઇ ય ઇત્થ સિલોગો

જિણવયણરએ અતિતિણે, પરિપુણાયયમાયયટ્ઠિએ;

આયારસમાહિસંવુડે, ભવઇય દંતે ભાવસંઘએ. ૫

અભિગમ ચઉરો સમાહિઓ, સુવિસુદ્ધો સુસમાહિયપ્પઓ;

વિઉલહિયસુહાવહં પુણો, કુવ્વઇ સો પયખેમમપ્પણો. ૬

જાઇમરણાઓ મુચ્ચઇ ઇત્થં ત્થં ચ ચયઇ સવ્વસો;

સિદ્ધે વા ભવઇ સાસએ, દેવે વા અપ્પરએ મહટ્ઠિએઠ ત્તિભેમિ. ૭

(૧૦) સભિક્ષનામાધ્યયન

નિક્ખમ્મમાણાઇ ય બુદ્ધવયણે,

નિચ્ચં ચિત્તસમાહિઓ હવિજ્જા;

ઇત્થીણ વસં ન યાવિ ગચ્છે,

વંતંનો પરિયાયઇ જે સ ભિક્ખૂ. ૧

પુઠ્ઠવિં ન ખણે ન ખણાવએ,

સીઓદગં ન પિએ ન પિયાવએ;

અગણિસત્યં જહા સુનિસિયં,
 તં ન જલે ન જલાવએ જે સ ભિક્ષૂ. ૨
 અનિલેણ ન વીએ ન વીયાવએ,
 હરિયાણિ ન છિંદે ન છિંદાવએ,
 બીયાણિ સયા વિવજ્જયંતો,
 સચ્ચિત્તં નાહારએ જે સ ભિક્ષૂ. ૩
 વહણં તસથાવરાણ હોઇ,
 પુઠવિતણકટ્ઠનિસ્સિયાણં;
 તમ્હા ઉદ્દેસિયં ન ભુંજે,
 નો વિ પએ ન પયાવએ જે સ ભિક્ષૂ. ૪
 રોઇય નાયપુત્તવયણે,
 અત્તસમે મન્નેજ્જ છપ્પિ કાએ,
 પંચ ય ફાસેમહવ્વયાઇં,
 પંચાસવસંવરએ જે સ ભિક્ષૂ. ૫
 યત્તારિ વમે સયા કસાએ,
 ધુવજોગી હવિજ્જ બુદ્ધવયણે;
 અહણે નિજ્જાયરૂવરયએ,
 ગિહિજોગં પરિવજ્જએ જે સ ભિક્ષૂ. ૬
 સમ્મદિટ્ઠિ સયા અમૂઠે,
 અત્થિ હુ નાણે તવે સંજમે ય;
 તવસા ધુણઇ પુરાણપાવગં,
 મણવયકાયસુસંવુડે જે સ ભિક્ષૂ. ૭
 તહેવ અસણં પાણગં વા,
 વિવિહં ખાઇમ સાઇમં લભિત્તા;
 હોહી અટ્ઠો સુએ પરે વા,
 તં ન નિહે ન નિહાવએ જે સ ભિક્ષૂ. ૮
 તહેવ અસણં પાણગં વા,
 વિવિહં ખાઇમસાઇમં લભિત્તા;
 છંદિય સાહમ્મિઆણ ભુંજે,
 ભોચ્ચા સજ્જાયરએ ય જે સ ભિક્ષૂ. ૯
 ન ય વુગ્ગહિયં કહં કહેજ્જા,
 ન ય કુપ્પે નિહુઇંદિએ પસંતે;
 સંજમે ધુવં જોગેણ જુત્તે,
 ઉવસંતે અવિહેડએ જે સ ભિક્ષૂ. ૧૦
 જો સહઇ હુ ગામકણ્ટએ,
 અક્કોસ પહારતજ્જણાઓ ય;
 ભય ભેરવ સદ્દ સપ્પહાસે,
 સમસુહદુક્ખ સહે ય જે સ ભિક્ષૂ. ૧૧
 પડિમં પડિવજ્જિયા મસાણે,
 નો ભીયએ ભયભેરવાઇં દિઅસ્સ;
 વિવિહગુણતવોરએ ય નિચ્ચં,
 ન સરીરં ચાભિકંખ જે સ ભિક્ષૂ. ૧૨
 અસઇં વોસટ્ઠયત્ત દેહે,
 અકુટ્ઠે વ હએ વ લૂસિએ વા;
 પુઠવિસમે મુણી હવિજ્જા,
 અનિયાણે અકોઉહલ્લે જે સ ભિક્ષૂ. ૧૩
 અભિભૂય કાએણ પરીસહાઇં,
 સમુદ્ધરે જાઇપહાઓ અપ્પયં;

વિઠતુ જાઈમરણં મહબ્ભયં,
 તવે રએ સામણિએ જે સ ભિક્ષૂ. ૧૪
 હત્યસંજએ પાય સંજએ,
 વાયસંજએ સંજઈંદિએ,
 અજ્ઞપ્પરએ સુસમાહિયપ્પા,
 સુત્તથં ય વિયાણઈ જે સ ભિક્ષૂ. ૧૫
 ઉવહિમ્મિ અમુચ્છિએ અગિદ્ધે,
 અન્નાયઉંઈં પુલાનપ્પુલાએ,
 ક્યવિક્કયસન્નિહિઓ વિરએ,
 સવ્વસંગાવગએ ય જે સ ભિક્ષૂ. ૧૬
 અલોલભિક્ષૂ ન રસેસુ ગિદ્ધે,
 ઉંઈં ચરે જીવિય નાભિકંખે;
 ઈંઈંદે ય સક્કારણપૂયણં ય,
 ચએ ઠિયપ્પા અણિહં જે સ ભિક્ષૂ. ૧૭
 ન પરં વએજ્જાસિ અયં કુસીલે,
 જેણાન્ન કુપ્પેજ્જ ન તં વએજ્જા;
 જાણિય પત્તેયં પુણ્ણપાવં,
 અત્તાણં ન સમુક્કસે જે સ ભિક્ષૂ. ૧૮
 ન જાઈમત્તે ન રૂવમત્તે,
 ન લાભમત્તે ન સુએણ મત્તે;
 મયાણિ સવ્વાણિ વિવજ્જઈત્તા,
 ધમ્મજ્જાણરએ ય જે સ ભિક્ષૂ. ૧૯
 પવેયએ અજ્જપયં મહામુણી,
 ધમ્મે ઠિઓ ઠાવયઈ પરંપિ;
 નિક્ખમ્મ વજ્જેજ્જ કુસીલલિંગં,
 ન યાવિ હાસં કુહએ જે સ ભિક્ષૂ. ૨૦
 તં દેહવાસં અસુઈં અસાસયં,
 સયા ચએ નિચ્ચ હિયટ્ઠિ યપ્પા;
 ઈંઈંદિતુ જાઈમરણસસ બન્ધણં,
 ઉવેઈ ભિક્ષૂ અપુણ્ણાગમં ગઈંઠ ત્તિબેમિ.

૨૧

(૧) દશવૈકાલિકે પ્રથમા (રતિવકા) ચૂલિકા

ઇહ ખલુ ભો પવ્વઈએણં ઉપ્પન્નદુક્ખેણં સંજમે અરઈ સમાવન્ન ચિત્તેણં ઓહાણુપ્પેહિણા અણોહાઈએણં
 ચેવ હયરસ્સિગયંકુસ-પોયપડાગાભૂઆઈં ઇમાઈં અટ્ટારસ ઠાણાઈં સમ્મં સંપડિલેહિઅવ્વાઈં ભવંતિ; તં
 જહા-હં ભો! દુસ્સમાએ દુપ્પજ્જવી (૧) લહુસગા ઇત્તરિઆગિહીણં કામભોગા (૨) ભુજ્જો અ સાઈબહુલા
 મણ્ણસા (૩) ઇમે અ મે દુક્ખે ન ચિરકાલોવટ્ટાઈ ભવિસ્સઈ (૪) ઓમજ્જણ પુરક્કારે (૫) વંતસ્સ ય
 પડિઆયણં (૬) અહરગઈ વાસોવસંપયા (૭) દુલ્લહે ખલુ ભો ગિહીણં ધમ્મે ગિહવાસ મજ્જે વસંતાણં (૮)
 આયંકે સે વહાય હોઈ (૯) સંકપ્પે સે વહાય હોઈ (૧૦) સોવક્કેસે ગિહવાસે, નિરુવક્કેસે પરિઆએ (૧૧)
 બંધે ગિહવાસે મુક્ખે પરિઆએ (૧૨) સાવજ્જે ગિહવાસે, અણવજ્જે પરિઆએ (૧૩) બહુસાહારણા
 ગિહીણં કામભોગા (૧૪) પત્તેઅં પુન્નપાવં (૧૫) અણિચ્ચે ખલુ ભો મણ્ણઆણ જીવિએ કુસગ્ગજલભિંદુચંચલે
 (૧૬) બહું ચ ખલુ ભો પાવં કમ્મં પગડં (૧૭) પાવાણં ચ ખલુ ભો કડાણં કમ્માણં પુવ્વિં દુચ્ચિન્નાણં
 દુપ્પડિક્કંતાણં વેઈત્તા મુક્ખો નત્થિ અવેઈત્તા, તવસા વા ઝોસઈત્તા (૧૮) અટ્ટારસમં પયં ભવઈ, ભવઈ અ
 ઇત્થ સિલોગો

જયા ય ચયઈ ધમ્મં, અણજ્જો ભોગકારણા;

સે તત્થ મુચ્છિએ બાલે, આયઈં નાવબુજ્જઈ.

૧

જયા ઓહાવિઓ હોઈ, ઈંદો વા પડિઓ છમં;

સવ્વ ધમ્મપરિભ્ભટ્ટો, સ પચ્છા પરિતપ્પઈ.

૨

જયા અ વંદિમો હોઈ, પચ્છા હોઈ અવંદિમો;

દેવયા ય ચુઆ ઠાણા, સ પચ્છા પરિતપ્પઈ.

૩

જયા અ પૂઠમો હોઈ, પચ્છા હોઈ અપૂઠમો; રાયા વ રજજપભ્ભટ્ઠો, સ પચ્છા પરિતપ્પઈ.	૪
જયા અ માણિમો હોઈ, પચ્છા હોઈ, અમાણિમો; સિટ્ઠિઠવ્વ કબ્બડે ધૂઢો, સ પચ્છા પરિતપ્પઈ.	૫
જયા અ થેરઓ હોઈ, સમઈકકંતજુવ્વણો; મચ્છુ વ્વ ગલં ગિલિત્તા, સ પચ્છા પરિતપ્પઈ.	૬
જયા અ કુ-કુડુંબસ્સ, કુ-તત્તીહિં વિહમ્મઈ; હત્થી વ બંધણો બદ્ધો, સ પચ્છા પરિતપ્પઈ.	૭
પુત્તદારપરીકિન્નો, મોહસંતાણસંતઓ; પંકોસન્નો જહા નાગો, સ પચ્છા પરિતપ્પઈ.	૮
અજજ આહં ગણી હુંતો, ભાવિઅપ્પા બહુસ્સુઓ; જઈહહં રમંતો પરિઆએ, સામન્ને જિણદેસિએ. દેવલોગસમાણો અ, પરિઆઓ મહે સિણં; રયાણં અરયાણં ચ, મહાનરયસારિસો.૧૦	૯
અમરોવમં જાણિઅ સુક્ખમુત્તમં, રયાણપરિઆઈ તહાડરયાણં; નિરઓવમં જાણિઅ દુક્ખમુત્તમં, રમિજજ તમ્હા પરિઆઈ પંડિએ. ૧૧	
ધમ્માઉ ભટ્ઠં સિરિઓ અવેયં, જન્નગ્ગિ વિજજ્ઞાઅમિવઅપ્પ તેઅં હીલંતિ ણં દુવ્વિહિઅં કુસીલા, દાહુહિહિઅં ધોરવિસં વ નાગં. ૧૨	
ઈહેવ ધમ્મો અયસો અકિત્તી, દુન્નામધિજ્જં ચ પિહુજ્જણંમિ; યુઅસ્સ ધમ્માઉ અહમ્મસેવિણો, સંભિન્નવિત્તસ્સ ય હિટ્ઠઓ ગઈ. ૧૩	
ભુંજિત્તુ ભોગાઈં પસજ્જ યેઅસા, તહાવિહં કટ્ટુ અસંજમં બહું; ગઈં ચ ગચ્છે અણભિજ્જિઅં દુહં, બોહી અ સે નો સુલહા પુણો પુણો. ૧૪	
ઈમસ્સ તા નેરઈઅસ્સ જંતુણો, દુહોવણીઅસ્સ કિલેસવત્તિણો; પલિઓવમં ઝિજ્જઈ સાગરોવમં, કિમંગ પુણ મજ્જ ઈમં મણોદુહં. ૧૫	
ન મે ચિરં દુક્ખમિણં ભવિસ્સઈ, અસાસયા ભોગપિવાસ જંતુણો; ન ચે સરીરેણં ઈમેણાવિસ્સઈ અવિસ્સઈ જીવિઅપજ્જવેણ મે. ૧૬	
જસ્સેવમપ્પા ઉ હવિજ નિચ્છિઓ, ચઈજ્જ દેહં ન હુ ધમ્મ સાસણં; તં તારિસં નો પઈલંતિ ઈંદિઆ, ઉવિંતવાયા વ સુદંસણં ગિરિં. ૧૭	
ઈચ્ચેવ સંપસ્સિઅ બુદ્ધિમં નરો, આયં ઉવાય વિવિહં વિઆણિઆ; કાએણ વાયા અદ્ધ માણસેણં,	

તિગુત્તિ ગુત્તો જિણવયણમહિટ્ટિજજાસિં ત્તિભેમિ.

૧૮

દશવૈકલિકે દ્વિતીયા (વિવક્તયરિયા) યુલિકા

યૂલિઅં તુ પવકૂખામિ, સુઅં કેવલિભાસિઅં; જ સુષિત્તુ સુપુણ્ણાણં, ધમ્મે ઉપ્પજજએ મઇ.	૧
અણુસોઅપટ્ટિઠઅબહુજજાંમિ, પરિસોઅલલ્લકૂખેણં; પરિસોઅમેવ અપ્પા, દાયવ્વો હોઉકામેણં.	૨
અણુસોઅસુહોલોઓ, પરિસોઓ આસવો સુવિહિઆણં; અણુસોઓ સંસારો, પરિસોઓ તસ્સ ઉત્તારો.	૩
તમ્હા આયારપરક્કમેણં, સંવરસમાહિબહુલેણં; ચરિઆ ગુણા અ નિયમા અ, હુંતિ સાહૂણ દટ્ટઠવ્વા.	૪
અનિએઅવાસો સમુઆણચરિઆ, અન્નાયઉંછં પઇરિક્કયા અ; અપ્પોવહી કલહવિવજજણા અ, વિહાર ચરિઆ ઇસિણં પસથા.	૫
આઇન્ન ઓમાણવિવજજણા અ, ઓસન્નદિટ્ટાહડંભત્તપાણે; સંસટ્ટઠ કપ્પેણ ચરિજજ ત્તિકૂખૂ, તજજાચસંસટ્ટઠ જઇ જઇજજા.	૬
અમજજ મંસાસિ અમચ્છરીઆ, અત્તિકૂખણં નિવ્વિગઇં ગયા અ; અત્તિકૂખણં કાઉસ્સગ્ગકારી, સજ્જાયજોગે પયઓ હવિજજા.	૭
પરિન્નવિજજા સયણાસણાઇં, સિજજં નિસિજજં તહ ભત્તપાણં, ગામે કુલે વા નગરે વ દેસે, મમત્તભાવં ન કહિં પિ કુજજા.	૮
ગિહિણો વેઆવડિઅં ન કુજજા, અભિવાયણવંદણ પૂઅણં વા; અસંકિલિટ્ટેહિં સમં વસિજજા, મુણી ચરિત્તસ્સ જઓ ન હાણી.	૯
ણ યા લભેજજા નિઉણં સહાયં, ગુણાહિઅં વા ગુણઓ સમં વા; ઇક્કો વિ પાવાઇં વિવજજયંતો, વિહરિજજ કામેસુ અજજમાણો.	૧૦
સંવચ્છરં વા વિ પરં પમાણં, ભીઅં ચ વાસં ન તહિં વસિજજા; સુત્તસ્સ મગ્ગેણ ચરિજજ ત્તિકૂખૂ, સુત્તસ્સ અત્થો જહ આણવેઇ.	૧૧
જો પુવ્વરત્તાવરરત્તકાલે, સંપિકૂખએ અપ્પગમપ્પગેણં; કિં મે કંઠં કિંચ મે કિચ્ચસેસં, કિં સક્કણિજજં ન સમાયરામિ.	૧૨
કિં મે પરો પાસઇ કિં ચ અપ્પા, કિં વાહહં ખલિઅં ન વિવજજયામિ; ઇચ્ચેવ સમ્મં અણુપાસમાણો, અણાગયં નો પરિબંધ કુજજા.	૧૩
જત્થેવ પાસે કઇ દુપ્પઉત્તં, કાએણ વાયા અદ્દુ માણસેણં,	

તત્થેવ ધીરો પડિસાહરિજ્જા
 આઇનનઓ ખિપ્પમિવ ખલીણં. ૧૪
 જસ્સેરિસા જોગ જિંદ્દિઅસ્સ,
 ધિઇમઓ સપ્પુરિસસ્સ નિચ્ચં;
 તમાહુ લોએ પરિબુદ્ધજીવી,
 સો જીઅઇ સંજમજીવિએણં. ૧૫
 અપ્પા ખલુ સયયં રક્ખિઅવ્વો,
 સવ્વિંદિએહિ સુસમાહિએહિં;
 અરક્ખિઓ જાઇપહં ઉવેઇ,
 સુરક્ખિઓ સવ્વદ્દુહાણ મુચ્ચઇઠ ત્તિ બેમિ. ૧૬.

બૃહત્સંગ્રહણી

નમિઉં અરિહંતાઇ, ઠિઇભવણો ગાહણા ય પત્તેયં;
 સુરનારયાણ વુચ્છં, નરતિરિયાણં વિણા ભવણં. ૧
 ઉવવાય-ચવણ-વિરહં, સંખં ઇગ સમઇયં ગમાગમણે;
 દસ વાસસહસ્સાઇ, ભવણવઇણં જહન ઠિઇ. ૨
 ચમર બલિ સારમહિઅં, તદ્દેવીણં તુ તિન્નિ ચત્તારિ;
 પલિયાઇં સદ્દાઇં, સેસાણં નવનિકાયાણં. ૩
 દાહિણ દિવડ્ડપલિયં, ઉત્તરઓ હુન્તિ દુન્નિ દેસૂણા;
 તદ્દેવીમદ્દપલિયં દેસૂણં આઉમુક્કોસં. ૪
 વંતરિયાણ જહનં, દસવાસસહસ્સ પલિયમુક્કોસં;
 દેવીણં પલિયદ્દં, પલિયં અહિયં સસિરવીણં. ૫
 લકખેણ સહસ્સેણ ય, વાસાણ ગહાણ પલિય મેએસિ;
 ઠિઇ અદ્દં દેવીણં, કમેણ નકખત્ત તારાણં. ૬
 પલિયદ્દં ચઉભાગો, ચઉઅડભાગાહિગા ઉ દેવીણં;
 ચઉજુઅલે ચઉભાગો, જહનમડભાગ પંચમએ. ૭
 દો સાહિ સત્ત સાહિય, દસ ચઉદસ સત્તર અચર જા સુક્કો;
 ઇક્કિક્ક મહિય મિત્તો, જા ઇગતીસુવરિ ગેવિજ્જે. ૮
 તિત્તીસણુત્તરેસુ, સોહમ્માઇસુ ઇમા ઠિઇ જિટ્ઠા;
 સોહમ્મે ઇસાણે, જહન ઠિઇ પલિયમહિયં ચ. ૯
 દો સાહિ સત્ત દસ ચઉદસ, સત્તર અચરાઇંજા સહસ્સારો;
 તપ્પરઓ ઇક્કિક્ક, અહિયં જાણુત્તરચઉક્કે. ૧૦
 ઇગતીસ સાગરાઇં, સવ્વટ્ઠે પુણ જહનઠિઇ નત્થિ;
 પરિગ્ગહિયાણિયરાણિ ય, સોહમ્મીસાણ દેવીણં. ૧૧
 પલિયં અહિયં ચ કમા, ઠિઇ જહન ઇઓ ય ઉક્કોસા;
 પલિયાઇં સત્ત પન્નાસ, તહ ય નવ પંચવન્ના ય. ૧૨
 પણ ઇ ચઉ ચઉ અટ્ઠ ય, કમેણ પત્તેયમગ્ગમહિસીઓ;
 અસુર નાગાઇ વંતર, જોઇસ-કપ્પ દુગ્ગિદાણં. ૧૩
 દુસુ તેરસ દુસુ બારસ, ઇ પણ ચઉ ચઉ દુગે દુગે ય ચઉ;
 ગેવિજ્જણુત્તરે દસ, ખિસટ્ઠિં પચરા ઉવરિ લોએ. ૧૪
 સોહમુક્કોસ ઠિઇ, નિયપચર વિહત્ત ઇચ્છ સંગુણિઓ;
 પચરુક્કોસ ઠિઇઓ, સવ્વત્થ જહનઓ પલિયં. ૧૫
 સુરકપ્પઠિઇવિસેસો, સગપચરવિહત્ત ઇચ્છ સંગુણિઓ;
 હિઠિલ્લઠિઇસહિઓ, ઇચ્છિય પચરંમિ ઉક્કોસા. ૧૬
 કપ્પસ્સ અંતપચરે, નિયકપ્પ-વડિંસયા વિમાણાઓ;

ઇંદ નિવાસા તેસિં, ચઉદિસિ લોગપાલાણં.	૧૭
સોમજમાણં સતિભાગ-પલિય વરૂણસ્સ દુન્નિ દેસૂણા;	
વેસમણે દો પલિયા, એસા ઠિઇલોગપાલાણં.	૧૮
અસુરા નાગ સુવન્ના, વિજ્જુ અગ્ગી ય દીવ ઉદ્દહી અ;	
દિસિ પવણ થણિય દસવિહ, ભવણવઇ તેસુ દુદ્ધુ ઇંદા.	૧૯
ચમરે બલી અ ધરણો, ભૂયાણંદે ય વેણુદેવે ય;	
તત્તો ય વેણુદાલી, હરિકંતે હરિસ્સહે ચેવ.	૨૦
અગ્ગિસિહ અગ્ગિમાણવ, પુન્ન વિસિટ્ઠે તહેવ જલકંતે;	
જલપહ તહ અમિઅગઈ, મિયવાહણ દાહિણુત્તરઓ.	૨૧
વેલંબે ય પભંજણ, ઘોસ મહાઘોસ એસિમન્નયરો;	
જંબુદ્દીવં છત્તં, મેરું દંડં પહુ કાઉં. ૨૨	
ચઉત્તીસા ચઉચત્તા, અટ્ઠતીસા ય ચત્ત પંચણ્ડં;	
પન્ના ચત્તા કમસો, લક્ખા ભવણાણ દાહિણઓ.	૨૩
ચઉ ચઉ લક્ખ વિહૂણા, તાવઇયા ચેવ ઉત્તર દિસાએ;	
સવ્વેવિ સત્તકોડી, બાવત્તરી હુન્તિ લક્ખા ય.	૨૪
રચણાએ હિટ્ઠવરિં, જોયણ સહસ્સં વિમુત્તું તે ભવણા;	
જંબુદ્દીવ સમા તહ, સંખમસંખિજ્જવિત્થારા.	૨૫
યુડામણિ ફણિ ગરુડે, વજ્જે તહ કલસ સીહ અસ્સે ય;	
ગય મયર વદ્ધમાણો, અસુરાઇણં મુણસુ ચિંધે.	૨૬
અસુરા કાલા નાગુ-દહિ, પંડુરા તહ સુવન્ન દિસિ થણિયા;	
કણગાભ વિજ્જુ સિહિ દીવ, અરુણા વાઉ પિયંગુ નિભા.	૨૭
અસુરાણ વત્થ રત્તા, નાગોદહિ-વિજ્જુ દીવ સિહિ નીલા;	
દિસિ થણિય સુવન્નાણં, ધવલા વાઉણ સંઝરુઈ.	૨૮
ચઉ-સટ્ઠિ સટ્ઠિ અસુરે, છચ્ચ સહસ્સાઈ ધરણમાઇણં;	
સામાણિયા ઇમેસિં, ચઉગ્ગુણા આયરક્ખા ય.	૨૯
રચણાએ પઢમ જોયણ-સહસ્સે હિટ્ઠવરિં સય સય વિહૂણો;	
વંતરિયાણં રમ્મા, ભોમા નયરા અસંખિજ્જા.	૩૦
બાહિં વટ્ટા અંતો-ચઉરંસા અહો ય કણિઆયારા;	
ભવણવઈણં તહ વંતરાણ, ઇંદ ભવણાઓ નાયવ્વા.	૩૧
તહિં દેવા વંતરિયા, વરતરુણીગીયવાઇયરવેણં;	
નિચ્ચં સુહિયા પમુઇયા, ગયં પિ કાલં ન યાણંતિ.	૩૨
તે જંબુદ્દીવ ભારહ, વિદેહ સમ ગુરૂ જહન્ન મજ્જિમગા;	
વંતર પુણ અટ્ઠવિહા, પિસાય ભૂયા તહા જક્ખા.	૩૩
રક્ખસ કિંનર કિંપુરિસા, મહોરગા અટ્ઠમા ય ગંધવ્વા;	
દાહિણુત્તર ભેયા, સોલસ તેસિં ઇમે ઇંદા.૩૪	
કાલે ય મહાકાલે, સુરૂવ પરિરૂવ પુન્નભદ્દે ય;	
તહ ચેવ માણિભદ્દે ભીમે, ય તહા મહાભીમે.	૩૫
કિંનર કિંપુરિસે સપ્પુરિસા, મહાપુરિસ તહય અઇકાયે;	
મહાકાય ગીયરઈ, ગીયજસે દુન્નિ દુન્નિ કમા.	૩૬
ચિંધં કલંબ સુલસે, વડ ખટ્ટંગે અસોગ ચંપયએ;	
નાગે તુંબરુ અ ઝએ, ખટ્ટંગવિવજ્જિયા રુક્ખા.	૩૭
જક્ખ પિસાય મહોરગ, ગંધવ્વા સામ કિંનરા નીલા;	
રક્ખસ કિંપુરુસા વિય, ધવલા ભૂયા પુણો કાલા.	૩૮
અણપન્ની, પણપન્ની, ઇસિવાઈ ભૂયવાઇએ ચેવ;	
કંદીય મહાકંદી, કોહંડે ચેવ પર્યંગે ય.૩૯	
ઇય પઢમજોયણસએ, રચણાએ અટ્ઠ વંતરા અવરે;	
તેસુ ઇહ સોલસિંદા, રચગઅહો દાહિણુત્તરઓ.	૪૦
સંનિહિએ સામાણો, ઘાઇ વિહાએ ઇસીય ઇસીવાલે;	

ઇસર મહેસરે વિ ય હવઇ સુવત્થે વિસાલે ય.	૪૧
હાસે હાસરઇ વિ ય, સેએ ય ભવે તહા મહાસેએ;	
પયંગે પયંગવઈ વિ ય સોલસ ઇંદાણ નામાઈ.	૪૨
સામાણિયાણ ચઉરો, સહસ્સ સોલસ ય આચરકખાણં;	
પત્તેયં સવ્વેસિ, વંતરવઇ સસિરવીણં ચ.૪૩	
ઇંદ સમ તાયતીસા, પરિસતિયા રકખ લોગપાલા ય;	
અણિય પઇન્ના અભિઓગા; કિલ્લિસં દસ ભવણ વેમાણી.	૪૪
ગંધવ્વ નટ્ટ હય ગય, રહ ભડ અણિયાણિ સવ્વઇંદાણં;	
વેમાણિયાણ વસહા, મહિસા ય અહોનિવાસીણં.	૪૫
તિત્તીસ તાયતીસા, પરિસતિયા લોગપાલ ચત્તારિ;	
અણિઆણિ સત્ત સત્તય, અણિયાહિવ સવ્વઇંદાણં.	૪૬
નવરં વંતરજોઇસ-ઇંદાણ ન હુન્તિ લોગપાલાઓ;	
તાયતીસભિહાણા, તિયસા વિ ય તેસિં ન હુ હુન્તિ.	૪૭
સમભૂતલાઓ અટ્ઠહિં, દસૂણ જોયણસએહિં આરબ્ભ;	
ઉવરિ દસુત્તર જોયણ, સયંમિ ચિટ્ઠન્તિ જોઇસિયા.	૪૮
તત્થ રવી દસજોયણ, અસીઇ તદ્દુવરિંસસી ય રિકખેસુ;	
અહ ભરણિ સાઇ ઉવરિં, બહિં મૂલો ભિંતરે અભિઇ.	૪૯
તાર રવી ચંદ રિકખા, બુહ સુક્કા જીવ મંગલ સણિયા;	
સગ સય નઉય દસ અસિઇ, ચઉ ચઉ કમસો તિયા ચઉસુ.	૫૦
ઇક્કારસ જોયણ સય, ઇગવીસિક્કાર સાહિયા કમસો;	
મેરુ અલોગાબાહં, જોઇસ ચક્કં ચરઇ ઠાઇ.	૫૧
અદ્ધ કવિટ્ઠાગારા, ફલિહમયા રમ્મ જોઇસવિમાણા;	
વંતરનયરેહિંતો, સંખિજજગુણા ઇમે હુન્તિ.	૫૨
તાઇ વિમાણાઇં પુણ, સવ્વાઇં હુન્તિ ફાલિહમયાઇં;	
દગફાલિહ મયા પુણ, લવણે જે જોઇસવવિમાણા.	૫૩
જોયણિગસટ્ઠિં ભાગા, ઇપ્પન્ન અડયાલ ગાઉ દુ ઇગ ઢં;	
ચંદાઇવિમાણાયામ-વિત્થડા અદ્ધમુચ્ચતં.૫૪	
પણયાલ લકખ જોયણ, નરખિત્તં તત્થિમે સયા ભમિરા;	
નરખિત્તાઉ બહિં પુણ, અદ્ધપમાણા ઠિઆ નિચ્ચં.	૫૫
સસિ રવિ ગહ નકખત્તા, તારાઓ હુન્તિ જહુત્તરં સિગ્ધા;	
વિવરીયા ઉ મહરિંદેઅ, વિમાણવહગા કમેણેસિં.	૫૬
સોલસ સોલસ અડ ચઉ, દો સુર સહસ્સા પુરઓ દાહિણઓ;	
પચ્છિમ ઉત્તર સીહા, હત્થી વસહા હયા કમસો.	૫૭
ગહ અટ્ઠાસી નકખત્ત, અડવીસં તાર કોડિકોડીણં;	
છાસટ્ઠિં સહસ્સ નવસય, પણહત્તરિ એગસસિસિત્તં.	૫૮
કોડા કોડી સન્નં-તરં તુ મન્નન્તિ ખિત્તથોવતયા;	
કેઇ અન્ને ઉસ્સે-હંગુલમાણેણ તારાણં. ૫૯	
કિણહં રાહુ વિમાણં, નિચ્ચં ચંદેણ હોઇ અવિરહિયં;	
ચઉરંગુલમપ્પત્તં હિટ્ઠા ચંદસ્સ તં ચરઇ.૬૦	
તારસ્સ ય તારસ્સ ય, જંબુદ્દીવંમિ અંતરં ગુરુયં;	
બારસજોયણસહસ્સા, દુન્નિસયા ચેવ બાયાલા.	૬૧
નિસઢો ય નીલવંતો, ચત્તારિસય ઉચ્ચ પંચસય કૂડા;	
અદ્ધ ઉવરિં રિકખા, ચરંતિ ઉભયટ્ઠ બાહાએ.	૬૨
છાવટ્ઠા દુન્નિ સયા, જહુત્તરમેયં તુ હોઇ વાઘાએ;	
નિવ્વાઘાએ ગુરુલહુ, દો ગાઉ ય ધનુસયા પંચ.	૬૩
માણુસ નગાઓ બાહિં, ચંદા સૂરસ્સ સૂર ચંદસ્સ;	
જોયણ સહસ્સ પન્નાસ, ણૂણગા અંતરં દિટ્ઠં.	૬૪
સસિ સસિ રવિ રવિ સાહિય, જોયણ લકખેણ અંતરં હોઇ;	

રવિ અંતરિયા સસિણો, સસિ અંતરિયા રવિ દિતા.	૬૫
બહિયા ઉ માણુસુત્તરઓ, ચંદા સૂરા અવટ્ઠિ ઉજ્જોયા;	
ચંદા અભિઇ જુત્તા, સૂરા પુણ હુન્તિ પુસ્સેહિં.	૬૬
ઉદ્ધારસાગર દુગે, સડ્ઢે સમએહિં તુલ્લદીવુદ્દહી;	
દુગુણા દુગુણ પવિત્થર-વલયાગારા પઢમવજ્જં.	૬૭
પઢમો જોયણ લકખં, વટ્ટો તં વેટ્ટિઉં ઠિઆ સેસા;	
પઢમો જંબુદ્દીવો, સયંભૂરમણોદ્દહી ચરમો.	૬૮
જંબૂ ધાયઇ પુકખર, વારુણીવર ખીર ઘય ખોય નંદીસરા;	
અરુણા રુણુવાય કુંડલ, સંખ રૂયગ ભુયગ કુસ કુંયા.	૬૯
પઢમે લવણો જલહી, બીએ કાલોય પુકખરાઇસુ;	
દીવેસુ હુન્તિ જલહી, દીવસમાણેહિં નામેહિં.	૭૦
આભરણ વત્થ ગંધે, ઉપ્પલ તિલએ ય પઉમનિહિ રયણે;	
વાસહર દહ નઇઓ, વિજયા વકખાર કપ્પિંદા.	૭૧
કુરુ મંદર આવાસા, કૂડા નકખત્ત ચંદ સૂરા ય;	
અન્નેવિ એવમાઈ, પસત્થવત્થૂણ જે નામા.	૭૨
તન્નામા દીવુદ્દહી, તિપડોયાયારા હુન્તિ અરુણાઈ;	
જંબૂલવણાઈયા, પત્તેયં તે અસંખિજ્જા.૭૩	
તાણંતિમ સૂરવરાવભાસજલહી પરંતુ ઇક્કિક્કા;	
દેવે નાગે જકખે, ભૂએ ય સયંભૂરમણે ય.	૭૪
વારુણીવર ખીરવરો, ઘયવર લવણો ય હુન્તિ ભિન્નરસા;	
કાલોય પુકખરોદ્દહિ, સયંભૂરમણો ય ઉદ્દગરસા.	૭૫
ઇકખુરસ સેસજલહી, લવણે કાલોએ ચરિમિ બહુમચ્છા;	
પણ સગ દસ જોયણ સય, તણુ કમા થોવ સેસેસુ.	૭૬
દો સસિ દો રવિ પઢમે, દુગુણા લવણંમિ ધાયઈ સંડે;	
બારસ સસિ બારસ રવિ, તપ્પભિઇ નિદ્દિટ્ઠ સસિ-રવિણો.	૭૭
તિગુણા પુવ્વિલજુયા, અણંતરાણંતરંમિ ખિત્તંમિ;	
કાલોએ બાયાલા, બિસત્તરી પુકખરદ્દંમિ.૭૮	
દો સસિ દો રવિપંતિ, એગંતરિયા ઇસટ્ઠિસંખાયા;	
મેરું પયાહિણંતા, માણુસખિત્તે પરિઅડન્તિ.	૭૯
એવં ગહાઇણો વિ હુ, નવરં ધુવપાસવત્તિણો તારા;	
તં ચિય પયાહિણંતા, તત્થેવ સયા પરિભમન્તિ.	૮૦
પન્નરસ ચુલસીઇસયં, ઇહ સસિરવિમંડલાઇં તકખિત્તં;	
જોયણ પણસય દસહિય, ભાગા અડયાલ ઇગસટ્ઠા.	૮૧
તીસિ ગસટ્ઠા ચઉરો, ઇગ ઇગસટ્ઠસ્સ સત્ત ભઇયસ્સ;	
પણતીસં ચ દુજોયણ, સસિરવિણો મંડલંતરયં.	૮૨
મંડલદસગં લવણે, પણગં નિસદંમિ હોઇ ચંદસ્સ;	
મંડલઅંતરમાણં, જાણપમાણં પુર કહિયં.૮૩	
પણસટ્ઠી નિસદંમિય દુન્નિયબાહા દુજોયણંતરિયા;	
ઇગુણવીસં તુ સયં, સૂરસ્સ ય મંડલા લવણે.	૮૪
સસિ રવિણો લવણંમિ ય, જોયણસયતિન્નિ તીસઅહિયાઇં;	
અસીયં તુ જોયણસયં, જંબુદ્દીવંમિ પવિસન્તિ.	૮૫
ગહરિકખતારસંખં, જત્થેચ્છસિ નાઉ મુદ્દહિ દીવે વા;	
તસ્સસિહિ એગસસિણો, ગુણસંખં હોઇ સવ્વગ્ગં.	૮૬
બત્તીસટ્ઠાવીસા બારસ અડ ચઉ વિમાણ લકખાઇં;	
પન્નાસ ચત્ત ઇ સહસ્સ, કમેણ સોહમ્માઇસુ.	૮૭
દુસુ સયચઉ દુસુ સય તિગ, મિગારસહિયં સયં તિગેહિટ્ઠા;	
મજ્જે સત્તતરસય, મુવરિતિગે સયમુવરિ પંચ.	૮૮
ચુલસીઇ લકખ સત્તાણવઇ-સહસ્સા વિમાણ તેવીસં;	

સવ્વગ્ગ મુડ્ઢ લોગંમિ, ઇંદયા ભિસટ્ઠિં પયરેસુ.	૯૯
ચઉદ્દિસિ ચઉ પંતીઓ, બાસટ્ઠિં વિમાણિયા પઢમપયરે;	
ઉવરિ ઇક્કિક્કહીણા, અણુત્તરે જાવ ઇક્કિક્કં.	૯૦
ઇંદય વટ્ટા પંતીસુ, તો કમસો તંસ ચઉરંસા વટ્ટા;	
વિવિહા પુષ્કવકિન્ના, તયંતરે મુતું પુવ્વદિસિં.	૯૧
એગં દેવેદીવે, દુવે ય નાગોદહીસુ બોદ્ધવ્વે;	
ચત્તારિ જકખદીવે, ભૂયસમુદેસુ અટ્ટેવ.૯૨	
સોલસ સયંભૂરમણો, દીવેસુ પઇટ્ઠિયા ય સુરભવણા;	
ઇગતીસં ચ વિમાણા, સયંભૂરમણો સમુદે ય.	૯૩
વટ્ટં વટ્ટસ્સુવરિં તંસં તંસસ્સ ઉવરિમં હોઇ;	
ચઉરંસે ચઉરંસં ઉડ્ઢંતુ વિમાણસેદીઓ.૯૪	
સવ્વે વટ્ટવિમાણા, એગદુવારા હવન્તિ નાયવ્વા;	
તિન્નિ ય તંસવિમાણો, ચત્તારિ ય હુન્તિ ચઉરંસે.	૯૫
પાગારપરિક્ખિન્ના, વટ્ટવિમાણા હવન્તિ સવ્વેવિ;	
ચઉરંસ વિમાણાણં, ચઉદ્દિસિં વેઇયા હોઇ.	૯૬
જત્તો વટ્ટ વિમાણા, તત્તો તંસસ્સ વેઇયા હોઇ;	
પાગારો બોધવ્વો, અવસેસેસું તુ પાસેસુ.૯૭	
આવલિયવિમાણાણં, અંતરં નિયમસો અસંખિજજં;	
સંખિજજમસંખિજજં, ભણિયં પુષ્કવકિન્નાણં.	૯૮
અચ્ચંતસુરહિગંધા, ફાસે નવણીયમઉયસુહફાસા;	
નિચ્ચુજ્જોયા રમ્મા, સયંપહા તે વિરાયંતિ.	૯૯
જે દક્ખિણેણ ઇંદા, દાહિણેઓ આવલી મુણેયવ્વા;	
જે પુણ ઉત્તર ઇંદા, ઉત્તરઓ આવલી મુણે તેસિં.	૧૦૦
પુવ્વેણ પચ્છિમેણ ય, સામન્ના આવલી મુણેયવ્વા;	
જે પુણ વટ્ટ વિમાણા, મજ્જિલ્લા દાહિણિલ્લાણં.	૧૦૧
પુવ્વેણ પચ્છિમેણ ય, જે વટ્ટા તે વિ દાહિણિલ્લસ્સ;	
તંસ ચઉરંસગા પુણ, સામન્ના હુન્તિ દુણ્હં પિ.	૧૦૨
પઢમંતિમપયરાવલિ, વિમાણમુહભૂમિ તસ્સમાસદ્ધં;	
પયરગુણમિટ્ઠ કપ્પે, સવ્વગં પુષ્કકિન્નિયરે.	૧૦૩
ઇગદ્દિસિપંતિવિમાણા, તિવિભત્તા તંસ ચઉરંસા વટ્ટા;	
તંસેસુ સેસમેગં ખિવ સેસ દુગસ્સ ઇક્કિક્કં.	૧૦૪
તંસેસુ ચઉરંસેસુ ય, તો રાસિતિગંપિ ચઉગુણં કાઉં;	
વટ્ટેસુ ઇંદયં ખિવ, પયરધણં મીલિયં કપ્પે.	૧૦૫
સત્તસય સત્તવીસા, ચત્તારિસયા ય હુન્તિ ચઉનઉયા	
ચત્તારિ ય છાસીયા, સોહમ્મે હુન્તિ વટ્ટાઇ.	૧૦૬
એમેવ ય ઈસાણો, નવરં વટ્ટાણ હોઇ નાણતં;	
દો સય અટ્ટેતીસા, સેસા જહ ચેવ સોહમ્મે.	૧૦૭
પુવ્વાવરા છલંસા તંસા પુણ દાહિણુત્તરા બજ્જ;	
અભિન્નતર ચઉરંસા, સવ્વા વિ ય કણ્હરાઇઓ.	૧૦૮
ચુલસી અસિઇ બાવત્તરિ, સત્તરિ સટ્ટી ય પન્ન ચત્તાલા;	
તુલ્લસુર તીસ વીસા, દસસહસ્સ આયરકખ ચઉગુણિયા.	૧૦૯
કપ્પેસુ ય મિય મહિસો, વરાહ સીહા ય ઇગલ સાલૂરા;	
હય ગય ભુયંગ બગ્ગી, વસહા વિડિમાઇં ચિંધાઇં.	૧૧૦
દુસુ તિસુ તિસુ કપ્પેસુ, ઘણુદહિ ઘણવાય તદુભયં ચ કામા;	
સુરભવણપઇટ્ટાણં, આગાસપઇટ્ઠિયા ઉવરિં.	૧૧૧
સત્તાવીસસયાઇં, પુઢવિપિંડો વિમાણઉચ્ચંતં;	
પંચસયા કપ્પદુગે, પઢમે તત્તો ય ઇક્કિક્કં.	૧૧૨
હાયઇ પુઢવીસુ સયં, વડ્ઢઇ ભવણેસુ દુ દુ દુ કપ્પેસુ;	

ચઉગે નવગે પણગે, તહેવ જાણુત્તરેસુ ભવે.	૧૧૩
ઇગવીસ સયા પુઢવી, વિમાણમિક્કારસેવ ય સયાઇં;	
બત્તીસ જોયણ સયા, મિલિયા સવ્વત્થ નાયવ્વા.	૧૧૪
પણ ચઉ તિ દુ વન્નવિમાણ, સધય દુસુ દુસુ ય જા સહસ્સારો;	
ઉવરિ સિય ભવણવંતર-જોઇસિયાણં વિવિહવન્ના.	૧૧૫
રવિણો ઉદયત્થંતર, ચઉનવઇ સહસ્સ પણસય છવીસા;	
બાયાલ સટ્ઠિઠ ભાગા, કક્કડસંકંતિ દિયહંમિ.	૧૧૬
એયંમિ પુણો ગુણિએ, તિ પંચ સગ નવહિં હોઇ કમમાણં;	
તિગુણંમિ ય દોલકખા, તેસીઇ સહસ્સ પંચસયા.	૧૧૭
અસીઈ છસટ્ઠિઠ ભાગા, જોયણ ચઉલકખ બિસત્તરિસહસ્સા;	
છચ્ચ સયા તેત્તીસા, તીસકલા પંચ ગુણિયંમિ.	૧૧૮
સત્તગુણો છલકખા, ઇગસટ્ઠિઠ સહસ્સ ઇસય છાસીયા;	
ચઉપન્નકલા તહ નવ-ગુણંમિ અડલકખ સડ્ઢાઓ.	૧૧૯
સત્તસયા ચત્તાલા, અટ્ઠારસકલા ય ઇય કમા ચઉરો;	
ચંડા ચવલા જયણા, વેગા ય તહા ગઈ ચઉરો.	૧૨૦
ઇત્થ ય ગઇં ચઉત્થિં જયણાયરિં નામ કેઇ મન્નંતિ;	
એહિં કમેહિં મિમાહિ ગઇહિં ચઉરો સુરા કમસો.	૧૨૧
વિકખંભં આયામં, પરિહિં અભિંતરં ચ બાહિરિયં;	
જુગવં મિણંતિ છમ્માસ, જાવ ન તહાવિ તે પારં.	૧૨૨
પાવંતિ વિમાણાણં, કેસિં પિહુ અહવ તિગુણયાઇએ;	
કમ ચઉગે પત્તેયં, ચંડાઈ ગઈ ઉ જોઇજજા.	૧૨૩
તિગુણોણ કપ્પચઉગે, પંચગુણોણં તુ અટ્ઠસુ મુણિજજા;	
ગેવિજજે સત્તગુણોણં, નવગુણોણુત્તરચઉક્કે.	૧૨૪
પઢમપયરંમિ પઢમે-કપ્પે ઉડુનામ ઇંદયવિમાણં;	
પણયાલલકખજોયણ, લકખં સવ્વુવરિસવ્વટ્ઠં.	૧૨૫
ઉડુ ચંદ રયય વગ્ગુ, વીરિયે વરુણો તહેવ આણંદે;	
બંભે કંચણ રુઇરે, ચંદ અરુણો ય વરુણો ય.	૧૨૬
વેરૂલિય રુયગ રુઇરે, અંકે ફલિહે તહેવ તવણિજજે;	
મેહે અઘ હલિદે, નલિણો તહ લોહિયકખે ય.	૧૨૭
વઇરે અંજણ વરમાલ, રિટ્ઠ દેવે ય સોમ મંગલએ;	
બલભદ્દે ચક્ક ગયા, સોવત્થિય ણંદિયાવત્તે.	૧૨૮
આભંકરે ય ગિહ્ધી, કેણિ ગરુલે ય હોઇ બોધવ્વે;	
બંભે બંભહિએ પુણ, બંભુત્તર લંતએ ચેવ.	૧૨૯
મહસુક્ક સહસ્સારે, આણય તહ પાણએ ય બોધવ્વે;	
પુષ્કે લંકાર આરણ, તહા વિય અચ્ચુએ ચેવ.	૧૩૦
સુદંસણ સુપડિબદ્ધે, મણોરમે ચેવ હોઇ પઢમ તિગે;	
તત્તો ય સવ્વભદ્દે, વિસાલએ સુમણો ચેવ.૧૩૧	
સોમણસે પીઇકરે, આઇચ્ચે ચેવ હોઇ તઇય તિગે;	
સવ્વટ્ઠસિદ્ધિ નામે, ઇંદયા એવ બાસટ્ઠી.	૧૩૨
પણયાલીસં લકખા, સીમંતય માણુસં ઉડુ સિવં ય;	
અપયટ્ઠાણો સવ્વટ્ઠ જંબૂદીવો ઇમં લકખં.	૧૩૩
અહ ભાગા સગ પુઢવીસુ, રજ્જુ ઇક્કિક્ક તહેવ સોહમ્મે;	
માહિંદ લંત સહસ્સાર, અચ્ચુઅ ગેવિજજ લોગંતે.	૧૩૪
સમ્મત્ત ચરણ સહિયા, સવ્વં લોગં ફુસે નિરવસેસં;	
સત્ત ય ચઉદ્દસ ભાએ, પંચ ય સુય દેસવિરઇએ.	૧૩૫
ભવણ વણ જોઇ સોહમ્મી સાણે સત્તહત્થતણુમાણં;	
દુ દુ દુ ચઉક્કે ગેવિજજણુત્તરે હાણિઇક્કિક્કં.	૧૩૬
કપ્પ દુગ દુ દુ ચઉગે, નવગે પણગે ય જિટ્ઠ ઠિઇ અચરા;	

દો સત્ત ચઉદ દુઠારસ, બાવીસિગતીસ તિત્તીસા.	૧૩૭
વિવરે નાણિક્કુણે, ઇક્કારસગા ઉ પાડિએ સેસા;	
હથ્થિક્કારસભાગા, અયરે અયરે સમહિયંમિ.	૧૩૮
ચય પુવ્વસરીરાઓ, કમેણ ઇગુત્તરાઇ વુડ્ડીએ;	
એવં ઠિઇવિસેસા, સણંકુમારાઇતણુમાણં.૧૩૯	
ભવધારણિજ્જ એસા, ઉત્તરવેઉવ્વિ જોયણા લકખં;	
ગેવિજ્જણુત્તરેસુઉત્તરવેઉવ્વિયાનત્થિ.૧૪૦	
સાહાવિયવેઉવ્વિય, તણુ જહન્ના કમેણ પારંભે;	
અંગુલ-અસંખભાગો, અંગુલસંખિજ્જભાગો ય.	૧૪૧
સામન્નેણં ચઉવિહ-સુરેસુ બારસમુહુત્તઉક્કોસા;	
ઉવવાયવિરહકાલો, અહ ભવણાઇસુ પત્તેયં.	૧૪૨
ભવણ વણ જોઇ સોહમ્મી-સાણેસુ મુહુત્ત ચઉવીસં;	
તો નવદિણ વીસમુહુ, બારસદિણ દસમુહુતાય.	૧૪૩
બાવીસ સડ્ઢ દિયહા પણપાલ અસીઇ દિણ સયં તત્તો;	
સંખિજ્જા દુસુમાસા, દુસુવાસા તિસુ તિગેસુ કમા.	૧૪૪
વાસાણ સયા સહસ્સા, લકખ તહ ચઉસુ વિજયમાઇસુ;	
પલિયા અસંગભાગો, સવ્વટ્ઠે સંખભાગો ય.	૧૪૫
સવ્વેસિંપિ જહન્નો, સમઓ એમેવ ચવણ વિરહો વિ;	
ઇગ દુતિસંખમસંખા, ઇગ સમએ હુન્તિ ય ચવંતિ.	૧૪૬
નર પંચિંદિય તિરિયા ણુપ્પત્તી સુરભવે પજ્જતાણં;	
અજ્જવસાય વિસેસા, તેસિં ગઇ તારતમ્મં તુ.	૧૪૭
નરતિરિ અસંખજીવી, સવ્વે નિયમેણ જંતિ દેવેસુ;	
નિયઆઉય સમ-હીણા-ઉએસુ ઇસાણ અંતેસુ.	૧૪૮
જંતિ સમુચ્છિમતિરિયા ભવણવણેસુ ન જોઇમાઇસુ;	
જં તેસિં ઉવવાઓ, પલિયાહ સંખંસ આઊસુ.	૧૪૯
બાલતવે પડિબદ્ધા, ઉક્કડરોસા તવેણ ગારવિયા;	
વેરેણ ય પડિબદ્ધા, મરિઉં અસુરેસુ જાયંતિ.	૧૫૦
રજ્જુગહ વિસભકખાણ-જલજલણપવેસ તણહ છુહદુહહઓ;	
ગિરિસિરપડણાઉ મુઆ, સુહભાવાહુંતિ વંતરિયા.	૧૫૧
તાવસ જા-જોઇસિયા, ચરગપરિવ્વાય બંભલોગો જા;	
જા સહસ્સારો પંચિંદિ તિરિય જા અચ્ચુઓ સડ્ઢા.	૧૫૨
જઇલિંગ મિચ્છદિટ્ઠિ, ગેવિજ્જા જાવ જંતિ ઉક્કોસં;	
પયમવિ અસદ્દહંતો, સુત્તત્થં મિચ્છદિટ્ઠિઓ.	૧૫૩
સુત્તં ગણહરરઇયં, તહેવ પત્તેયબુદ્ધ રઇયં ય;	
સુયકેવલિણા રઇયં, અભિન્નદસપુવ્વિણા રઇયં.	૧૫૪
ઇઉમત્થસંજયાણં, ઉવવા ઉક્કોસઓ અ સવ્વટ્ઠે;	
તેસિં સડ્ઢાણં પિ ય, જહન્નઓ હોઇ સોહમ્મે.	૧૫૫
હંતંમિ ચઉદપુવ્વિસ્સ તાવસાઇણ વંતરેસુ તહા;	
એસો ઉવવાયવિહિ, નિયકિરિયઠિયાણ સવ્વોવિ.	૧૫૬
વજ્જરિસહનારાયં, પઢમં બીયં ચ રિસહ નારાયં;	
નારાય મદ્દનારાયં, કીલિયા તહ ય છેવટ્ઠં.	૧૫૭
એએ છ સંઘયણા, રિસહો પટ્ટો ય કીલિયા વજ્જં;	
ઉભઓ મક્કડબંધો, નારાઓ હોઇ વિન્નેઓ.	૧૫૮
છ ગબ્ભતિરિનરાણં સમુચ્છિમપણિંદિવિગલ છેવટ્ઠં;	
સુરનેરઇયા એગિંદિયા ય સવ્વે અસંઘયણા.	૧૫૯
છેવટ્ઠેણં ઉ ગમ્મઇ, ચઉરો જા કપ્પ કીલિયાઇસુ;	
ચઉસુ દુ દુ કપ્પ વુડ્ડી, પઢમેણં જાવ સિદ્ધી વિ.	૧૬૦
સમચઉરેસે નગ્ગોહ, સાઇ વામણ ય ખુજ્જ હુંડે ય;	

જીવાણ ઇસંઠાણા, સવ્વત્થ સુલકખણં પઢમં.	૧૬૧
નાહીએ ઉવરિભીયં, તઇયમહો પિટ્ઠિઉયરઉર વજ્જં;	
સિરગીવ પાણિ પાએ, સુલકખણં તં ચઉત્થં તુ.	૧૬૨
વિવરીયં પંચમગં, સવ્વત્થ અલકખણં ભવે છટ્ઠં;	
ગબ્ભયનરતિરિય છહા, સુરા સમા હુંડયા સેસા.	૧૬૩
જંતિ સુરા સંખાઉ ય, ગબ્ભય પજ્જત્તમણુય તિરિએસુ;	
પજ્જત્તેસુ ય બાયર-ભૂદગ પત્તેયગવણેસુ.૧૬૪	
તત્થવિ સણંકુમાર-પભિઇ એગિંદિએસુ નો જંતિ;	
આણાય પમુહા ચવિઉં, મણુએસુ ચેવ ગચ્છન્તિ.	૧૬૫
દો કપ્પ કાયસેવી, દો દો દો ફરિસરૂવસદ્દેહિં;	
ચઉરો મણેણુ વરિમા, અપ્પવિયારા અણંતસુહા.	૧૬૬
જં ય કામસુહં લોએ, જં ય દિવ્વં મહાસુહં;	
વીયરાયસુહસ્સ ય; ણંતભાગં પિ નગ્ઘઇ.૧૬૭	
ઉવવાઓ દેવીણં, કપ્પ દુગં-જા પરઓ સહસ્સારા;	
ગમણાગમણં નત્થિ, અચ્ચુય પરઓ સુરાણંપિ.	૧૬૮
તિપલિય તિસાર તેરસ, સારા કપ્પ દુગ તઇયલંત અહો;	
કિબ્બિસિય ન હુન્તિ ઉવરિં, અચ્ચુય પરઓ ભિઓગાઈ.	૧૬૯
અપરિગ્ગહદેવીણં, વિમાણ લકખા છ હુંતિ સોહમ્મે;	
પલિયાઇ સમયાહિય, ઠિઇ જાસિં જાવ દસ પલિયા.	૧૭૦
તાઓ સણંકુમારા-ણેવં વડ્ઢન્તિ પલિયદસગેહિં;	
જા બંભસુક્ક આણાય આરણ દેવાણ પન્નાસા.	૧૭૧
ઇસાણે ચઉ લકખા, સાહિય પલિયાઈ સમય અહિય ઠિઇ;	
જા પન્નર પલિય જાસિં તાઓ માહિંદેદેવાણં.	૧૭૨
એએણ કમેણ ભવે, સમયાહિય પલિયદસગવુડ્ઢીએ;	
લંત સહસ્સાર પાણાય, અચ્ચુયદેવાણ પણ પન્ના.	૧૭૩
કિણહા નીલા કાઊ, તેઉ પમ્હા ય સુક્ક લેસ્સાઓ;	
ભવણ વણ પઢમ ચઊ લેસ, જોઇસ કપ્પ દુગે તેઊ.	૧૭૪
કપ્પતિય પમ્હલેસા, લંતાઇસુ સુક્કલેસ હુન્તિ સુરા;	
કણગાભ પઉમકેસર વન્ના દુસુ તિસુ ઉવરિધવલા.	૧૭૫
દસવાસસહસ્સાઇં, જહન્ન-માઉ ધરંતિ જે દેવા;	
તેસિં ચઉત્થાહારો, સત્તહિં થોવેહિં ઊસાસો.	૧૭૬
આહિ વાહિ વિમુક્કસ્સ, નીસાસૂસ્સાસ એગગો;	
પાણુ સત્ત ઇમો થોવો, સોવિ સત્તગુણો લવો.	૧૭૭
લવ સત્તહત્તરીએ, હોઇ મુહૂત્તો ઇમંમિ ઊસાસા;	
સગતીસ સય તિહુત્તર, તીસ ગુણા તે અહોરત્તે.	૧૭૮
લકખં તેરસ સહસા, નઉયસયં અયરસંખયા દેવે;	
પકખેહિં ઊસાસો વાસસહસ્સેહિં આહારો.	૧૭૯
દસવાસસહસ્સુવરિં, સમયાઈ જાવ સાગરં ઊણં;	
દિવસમુહુત્ત પુહુત્તા, આહારૂસાસ સેસાણં.	૧૮૦
સરીરેણ ઓયાહારો, તયાઇ ફાસેણ લોમઆહારો;	
પકખે વા હારો પુણ, કાવલિઓ હોઇ નાયવ્વો.	૧૮૧
ઓયાહારા સવ્વે અપજ્જત્ત પજ્જત્ત લોમ આહારો;	
સુરનિરય ઇગિંદિવિણા, સેસા ભવત્થા સપકખેવા.	૧૮૨
સચિત્તચિત્તોભય, રૂવો આહાર સવ્વતિરિયાણં;	
સવ્વનરાણં ય તહા, સુરનેરઇયાણ અચ્ચિત્તો.	૧૮૩
આભોગાણાભોગા, સવ્વેસિં હોઇ લોમઆહારો;	
નિરયાણં અમણુન્નો, પરિણમઇ સુરાણ સમણુન્નો.	૧૮૪
તહ વિગલ નારયાણં, અંતમુહુત્તા સ હોઇ ઉક્કોસો;	

પંચિંદિતિરિનરાણં, સાહાવિઓ છટ્ઠ અટ્ઠમઓ.	૧૮૫
વિગ્ગહગઇમાવન્ના, કેવલિણો સમુહયા અજોગી ય;	
સિદ્ધા ય અણાહારા, સેસા આહારગા જીવા.	૧૮૬
કેસટ્ટિં મંસ નહ રોમ, રુહિર વસ યમ્મ મુત્ત પુરિસેહિં;	
રહિયા નિમ્મલદેહા, સુગંધનીસાસ ગયલેવા.	૧૮૭
અંતમુહુત્તેણં ચિય, પજ્જત્તા તરુણપુરિસસંકાસા;	
સવ્વંગભૂસણધરા, અજરા નિરુયા સમા દેવા.	૧૮૮
અણિમિસનયણા મણ-કજ્જસાહણા પુફ્ફદામ અમિલાણા;	
ચઉરંગુલેણ ભૂમિં, ન છિવન્તિ સુરા જિણા ભિંતિ.	૧૮૯
પંચસુ જિણકલ્લાણેસુ, ચેવ મહરિસિતવાણુભાવાઓ;	
જમ્મંતરનેહેણ ય, આગચ્છન્તિ સુરા ઇહયં.	૧૯૦
સંકંતદિવ્વપેમા, વિસયપસત્તા સમત્તકત્તવ્વા;	
અણાહીણમણુયકજ્જા, નરભવમસુહં ન ઇંતિ સુરા.	૧૯૧
ચત્તારિ પંચ જોયણ સયાઇં ગંધો ય મણુયલોગસ્સ;	
ઉડ્ડં વચ્ચઇ જેણં, ન હુ દેવા તેણ આવન્તિ.	૧૯૨
દોકપ્પ પઢવિં, દો દો દો બીય તઇયગં ચઉલ્લિં;	
ચઉ ઉવરિમ ઓહીએ, પાસન્તિ પંચમં પુઢવિં.	૧૯૩
સટ્ટિં ઇ ગેવિજ્જા, સત્તમીયરે અણુત્તરસુરા ઉ;	
કિંચૂણલોગનાલિં, અસંખદીવુદ્ધહિ તિરિયં તુ.	૧૯૪
બહુઅરગં ઉવરિમગા, ઉડ્ડં સવિમાણચૂલિયધયાઈ;	
ઊણદ્ધસાગરે સંખજોયણા તપ્પરમસંખા.૧૯૫	
પણવીસજોયણલહુ, નારય ભવણ વણ જોઇ કપ્પાણં;	
ગેવિજ્જણુત્તરાણ ય, જહસંખંઓહિ આગારા.	૧૯૬
તપ્પાગારે પલ્લગ, પડહગ જલ્લરિ મુઈગ પુફ્ફ જવે;	
તિરિયમણુએસુઓહિ, નાણાવિહસંઠિઓ ભણિઓ.	૧૯૭
ઉડ્ડં ભવણવણાણં, બહુગો વેમાણિયાણહો ઓહી;	
નારય જોઇસ તિરિયં, નરતિરિયાણં અણોગવિહો.	૧૯૮
ઇય દેવાણં ભણિયં, ઠિઇ પમુહં નારયાણ વુચ્છામિ;	
ઇગ તિન્નિ સત્ત દસ સત્તર, અયર બાવીસ, તિત્તીસા.	૧૯૯
સત્ત ય પુઢવીસુ ઠિઇ, જિટ્ઠોવરિમાઇ હિટ્ઠપુઢવીએ;	
હોઇ કમેણ કણિટ્ઠા, દસવાસ સહસ્સ પઢમાએ.	૨૦૦
નવઇ સમ સહસ લકખા, પુવ્વાણં કોડી અયર દસ ભાગા;	
ઇકિંકલ્લાગ વુડ્ડિદે, જા અયરં તેરસે પયરે.	૨૦૧
ઇય જિટ્ઠજહન્ના પુણ, દસ વાસ સહસ્સ લકખ પયરદુગે;	
સેસેસુ ઉવરિ જિટ્ઠા, અહો કણિટ્ઠાઉ પઇં પુઢવી.	૨૦૨
ઉવરિખિઇ ઠિઇવિસેસો, સગપયર વિહત્તુ ઇચ્છ સંગુણિઓ;	
ઉવરિખિઇ ઠિઇ સહિઓ, ઇચ્છિયપયરંમિ ઉક્કોસા.	૨૦૩
બંધણ ગઇ સંઠાણા, ભેયા વન્ના ય ગંધ રસ ફાસા;	
અગુરુ લહુ સદ્દ દસહા, અસુહા વિય પુગ્ગલા નિરએ.	૨૦૪
નરયા દસવિહવેયણ, સી ઉસિણ ખુહ પિવાસ કંડૂહિં;	
પરવસ્સં જર દાહં, ભય સોગં ચેવ વેયંતિ.	૨૦૫
સત્તસુ ખિત્તજવિયણા, અણુણણ કયાવિ પહરણોહિ વિણા;	
પહરણકયા વિ પંચસુ, તિસુ પરમાહમ્મિય કયાવિ.	૨૦૬
રયણપ્પહ સક્કરપહ વાલુયપહ પંકપહ ય ધૂમપહા;	
તમપહા તમતમપહા, કમેણ પુઢવીણ ગોત્તાઇં.	૨૦૭
ઘમ્મા વંસા સેલા, અંજણ રિટ્ઠા મઘા ય માઘવઇ;	
નામેહિં પુઢવીઓ, ઇત્તાઇઇત્તસંઠાણા.૨૦૮	
અસીય બત્તીસ અડવીસ, વીસા અટ્ઠાર સોલ અડસહસા;	

લકખુવરિ પુઢવિપિંડો, ઘણુદહિ ઘણવાય તણુવાયા.	૨૦૮
ગયણં ચ પઠટ્ટાણં, વીસસહસ્સાઈ ઘણુદહીપિંડો;	૨૧૦
ઘણતણુ વાયાગાસા, અસંખજોયણ જુયા પિંડો.	૨૧૦
ન કુસંતિ અલોગં, ચઉદિસંપિ પુઢવી ય વલયસંગહિયા;	૨૧૧
રયણાએ વલયાણં, છ દ્વપંચમ જોયણં સડ્ઢં.	૨૧૧
વિકખંભોઘણઉદહી ઘણતણુવાયાણ હોઈ જહસંખં;	૨૧૨
સતિભાગ ગાઉયં, ગાઉયં ચ તહ ગાઉયતિભાગો.	૨૧૨
પઢમમહીવલએસું, ખિવિજજ એયં કમેણ બીયાએ;	૨૧૩
દુ તિ ચઉ પંચ છ ગુણં, તઈયાઈસુ તંપિ ખિવ કમસો.	૨૧૩
મજ્ઞે ચિય પુઢવી અહે, ઘણુદહિપમુહાણ પિંડપરિમાણં;	૨૧૪
ભણિયં તઓ કમેણં, હાયઈ જા વલયપરિમાણં.	૨૧૪
તીસ પણવીસ પન્નરસ, દસતિન્નિ પણુણ એગલકખાઈં;	૨૧૫
પંચ ય નરયા કમસો, ચુલસી લકખાઈં સત્તસુ વિ.	૨૧૫
તેરિક્કારસ નવ સગ, પણ તિન્નિગ પયર સવ્વિગુણવન્ના;	
સીમંતાઈ અપ્પઈઠાણંતા ઈંદયા મજ્ઞે.૨૧૬	
તેહિંતો દિસિ વિદિસિ, વિણિગ્ગયા અટ્ઠ નિરયઆવલીઆ;	
પઢમે પયરે દિસિ ગુણ-વન્ન વિદિસાસુ અડયાલા.	૨૧૭
બીયાઈસુ પયરેસુ, ઈગ ઈગ હીણા ઉ હુન્તિ પંતીઓ;	
જાસત્તમીમહીપયરે, દિસિ ઈક્કિક્કો વિદિસિ નત્થિ.	૨૧૮
ઈટ્ઠપયરેગ દિસિ-સંખઅડગુણા ચઉવિણા સઈગસંખા;	
જહ સીમંતયપયરે, એગુણનઉયા સયાતિન્નિ.	૨૧૯
અપયટ્ટાણો પંચ ઉ, પઢમો મુહમંતિમો હવઈ ભૂમી;	
મુહભૂમી સમાસદ્ધં, પયરગુણં હોઈ સવ્વઘણં.	૨૨૦
છન્નવઈસય તિવન્ના, સત્તસુ પુઢવીસુ આવલી નિરયા;	
સેસ તિયાસી લકખા, તિસય સિયાલા નવઈ સહસા.	૨૨૧
તિસહસ્સુચ્ચા સવ્વે, સંખમસંખિજજ વિત્થડાયામા;	
પણયાલલકખ સીમંતઓ ય લકખં અપઈટ્ટાણો.	૨૨૨
છસુ હિટ્ઠોવરિ જોયણસહસ્સ બાવન્ન સડ્ઢચરિમાએ;	
પુઢવીએ નરયરહિયં, નરયા સેસંમિ સવ્વાસુ.	૨૨૩
ભિસહસ્સુણા પુઢવી, તિસહસ્સગુણેહિં નિયયપયરેહિં;	
ઉણા રુવૂણ નિય પયરભાઈયા પત્થંતરયં.	૨૨૪
પઉણટ્ટ ઘણુ છ અંગુલ, રયણાએ દેહમાણમુક્કોસં;	
સેસાસુ દુગુણ દુગુણં, પણ ઘણુ સય જાવયરમાએ.	૨૨૫
રયણાએ પઢમપયરે, હત્થતિયદેહમાણ મણુપયરં;	
છપ્પન્નંગુલસડ્ઢા, વુડ્ઢી જા તેરસે પુન્નં.૨૨૬	
જં દેહપમાણં ઉવરિમાએ, પુઢવીઈ અંતિમે પયરે;	
તં ચિય હિટ્ઠિંમપુઢવીપઢમપયરંમિ બોદ્ધવ્વં.	૨૨૭
તં ચેગુણાગ સગપયર-ભઈયં બીયાઈપયરવુડ્ઢિભવે;	
તિકર તિઅંગુલ કરસત્ત, અંગુલા સડ્ઢિગુણવીસં.	૨૨૮
પણઘણુ અંગુલવીસં, પનરસઘણુ દુન્નિ હત્થ સડ્ઢા ય;	
બાસટ્ઠિં ઘણુહ સડ્ઢા, પણ પુઢવી પયર વુડ્ઢિ ઈમા.	૨૨૯
ઈઅ સાહાવિય દેહો, ઉત્તરવેઉવ્વિઓ ય તદ્દુગુણો;	
દુવિહો વિ જહન્ન કમા, અંગુલ અસંખ સંખંસો.	૨૩૦
સત્તસુ ચઉવીસ મુહૂ, સગ પન્નર દિણેગ દુ ચઉ છમ્માસા;	
ઉવવાયચવણાવિરહો, ઓહે બારસ મુહૂત્ત ગુરૂ.	૨૩૧
લહુઓ દુહાવિ સમઓ, સંખા પુણ સુરસમા મુણેયવ્વા;	
સંખાઉ પજજત્ત પણિંદિ-તિરિનરા જંતિ નરએસુ.	૨૩૨
મિચ્છદિટ્ઠિ મહારંભ, પરિગ્ગહો તિવ્વકોહ નિસ્સીલો;	

નરયાઉઅં નિબંધઇ, પાવમઈ રુદ્ધપરિણામો.	૨૩૩
અસન્નિ સરિસિવ પક્ષી, સીહ ઉરગિત્થિ જન્તિ જો છટ્ટિંઃ;	
કમસો ઉક્કોસેણં, સત્તમવુદ્ધવિં મણુય મચ્છા.	૨૩૪
વાલા દાઢી પક્ષી, જલયર નરયાગયા ઉ અઈકૂરા;	
જંતિ પુણ્ણો નરએસુ, બાહુલ્લેણં ન ઉણ નિયમો.	૨૩૫
દો પઢમ પુઢવિગમણં, ઇવટ્ઠે કીલિયાઇ સંઘયણો;	
ઇક્કિક્ક પુઢવિવુડ્ઢી, આઇતિલેસ્સા ઉ નરએસું.	૨૩૬
દુસુ કાઊ તઇયાએ, કાઊ નીલાય નીલ પંકાએ;	
ધૂમાએ નીલકિણ્ણહા, દુસુકિણ્ણહા હુન્તિ લેસ્સાઓ.	૨૩૭
સુરનારયાણ તાઓ, દવ્વલેસા અવટ્ઠિઠઆ ભણિયા;	
ભાવપરાવત્તીએ, પુણ એસિં હુન્તિ છલ્લેસા.	૨૩૮
નિરઉવ્વટ્ઠા ગબ્ભય, પજજત્ત સંખાઉ લલ્લિ એએસિં;	
ચક્કિ હરિજુઅલ અરિહા, જિણજઇદ્ધિસિ સમ્મ પુહવિક્કમા.	૨૩૯
રયણાએ ઓહિ ગાઉઅ, ચત્તારિ અદ્ધટ્ઠ ગુરુ લહુ કમેણ;	
પઇ પુઢવિ ગાઉયદ્ધં, હાયઇ જા સત્તમિ ઇગદ્ધં.	૨૪૦
ગબ્ભનર તિપલિયાઊ, તિગાઉ ઉક્કોસ તે જહન્નેણં;	
મુચ્છિમ દુહાવિઅંતમુહૂ, અંગુલઅસંખભાગતણૂ.	૨૪૧
બારસમુહુત્ત ગબ્ભે, ઇયરે ચઉવીસ વિરહ ઉક્કોસો;	
જમ્મમરણોસુ સમઓ, જહન્નસંખા સુરસમાણા.	૨૪૨
સત્તમ મહિ નેરઇએ, તેઊ વાઊ અસંખ નર તિરિએ;	
મુત્તૂણ સેસ જીવા, ઉપ્પજજતિ નરભવંમિ.	૨૪૩
સુર નેરઇએહિં ચિય, હવંતિ હરિ અરિહ ચક્કિ બલદેવા;	
ચઊવિહસુર ચક્કિબલા, વેમાણિય હુન્તિ હરિ અરિહા.	૨૪૪
હરિણો મણુસ્સ રયણાઇ, હુન્તિ નાણુત્તરેહિં દેવેહિં;	
જહ સંભવમુવવાઓ, હયગયએગિંદિરયણાણં.	૨૪૫
વામપમાણં ચક્કં, છત્તં દંડં દુહલ્થયં ચમ્મં;	
બત્તીસંગુલખગ્ગો, સુવન્નકાગિણિ ચઉરંગુલિયા.	૨૪૬
ચઉરંગુલો દુઅંગુલ પિહુલોય મણિ પુરોહિ ગય તુરયા;	
સોણાવઇ ગાહાવઇ, વડ્ઢ ઇત્થી ચક્કિરયણાઇ.	૨૪૭
ચક્કં ઘણુહં ખગ્ગો, મણી ગયા તહ ય હોઇ વણમાલા;	
સંખ સત્ત ઇમાઇ, રયણાઇ વાસુદેવસ્સ.૨૪૮	
સંખ નરા ચઉસુ ગઇસુ, જંતિ પંચસુવિ પઢમસંઘયણો;	
ઇગ દુ તિ જા અટ્ઠસયં, ઇગસમએ જંતિ તે સિદ્ધિં.	૨૪૯
વીસિત્થિ દસ નપુંસગ, પુરિસટ્ઠસયં તુ એગસમએણં;	
સિજ્જઇ ગિહિ અન્ન સલિંગ, ચઉ દસ અટ્ઠાહિય સયંચ.	૨૫૦
ગુરુલહુ મજ્જિમ દો ચઉ, અટ્ઠસયં ઉડ્ઢહો તિરિયલોએ;	
ચઉબાવીસટ્ઠસયં, દુ સમુદ્ધે તિન્નિ સેસજલે.	૨૫૧
નરયતિરિયાગયા દસ, નરદેવ ગઇઉ વીસ અટ્ઠસયં;	
દસ રયણા સક્કર વાલુયાઉ, ચઉ પંક ભૂદ્ધગઓ.	૨૫૨
છચ્ચ વણસ્સઇ દસ તિરિ, તિરિત્થી દસ મણુય વીસ નારીઓ;	
અસુરાઇ-વંતરા દસ, પણ તદ્ધેવિઉ પત્તેયં.	૨૫૩
જોઇ દસ દેવિ વીસં, વેમાણિયટ્ઠસય વીસ દેવીઓ;	
તહ પુંવેએહિંતો, પુરિસો હોઊણ અટ્ઠસયં.	૨૫૪
સેસટ્ઠ ભંગએસુ, દસ દસ સિજ્જન્તિ એગસમએણં;	
વિરહો છમાસ ગુરુઓ, લહુ સમઓ ચવણમિહ નત્થિ.	૨૫૫
અડ સગ છ પંચ ચઉ તિન્નિ, ઇક્કો ય સિજ્જમાણોસુ;	
બત્તીસાઇસુ સમયા, નિરંતરં અંતરં ઉવરિં.	૨૫૬
બત્તીસા અડયાલા, સટ્ઠી બાવત્તરી ય બોધવ્વા;	

ચુલસીઈ છન્નવઈ, દુરહિય-મટ્ટુત્તર સયં ચ.	૨૫૭
પણયાલલકખજોયણ, વિકખંભા સિદ્ધ સિલ ફલિહવિમલા;	
તદુવરિગ જોયણંતે, લોગંતો તત્થ સિદ્ધઠિઈ.	૨૫૮
બાવીસ સગ તિ દસવાસ-સહસ ગણિતિદિણ બેઈંદિયાઈસુ;	
બારસ વાસુણપણ દિણ, છમ્માસતિપલિયઠિઈ જિટ્ઠા.	૨૫૯
સણહા ય સુદ્ધ વાલુય, મણોસિલા સક્કરાય ખર પુઢવી;	
ઈગ બાર ચઉદ સોલસ, ટ્ઠારસ બાવીસ સમસહસા.	૨૬૦
ગબ્ભ ભુય જલયરોભય, ગબ્ભોરગ પુવ્વ કોડિ ઉક્કોસા;	
ગબ્ભચઉપ્પય-પકિખસુ, તિપલિય પલિયાઅસંખંસો.	૨૬૧
પુવ્વસ્સ ઉ પરિમાણં, સયરિં ખલુ વાસ કોડિલકખાઓ;	
છપ્પન્નં ચ સહસ્સા, બોધવ્વા વાસકોડીણં.૨૬૨	
સમુચ્છિમપણિંદિ થલખયર, ઉરગ ભુયગ જિટ્ઠઠિઈ કમસો;	
વાસ સહસ્સા ચુલસી, બિસત્તરિ તિપન્ન બાયાલા.	૨૬૩
એસા પુઢવાઈણં, ભવઠિઈ કાયઠિઈ;	
સંપયં તુ ચઉ એગિંદિસુ ણોયા, ઉસ્સપ્પિણિઓ અસંખિજ્જા.	૨૬૪
તાઓ વણંમિ અણંતા, સંખિજ્જા વાસસહસ વિગલેસુ;	
પંચિંદિતિરિનરેસુ, સત્તટ્ઠભવા ઉ ઉક્કોસા.	૨૬૫
સવ્વેસિપિ જહન્ના, અંતમુહુત્તં ભવે ય કાયે ય;	
જોયણસહસ્સમહિયં, એગિંદિય દેહ મુક્કોસં.	૨૬૬
ભિતિયઉરિંદિ સરીરં, બારસ જોયણ તિકોસ ચઉકોસં;	
જોયણસહસ પણિંદિય, ઓહે વોચ્છં વિસેસં તુ.	૨૬૭
અંગુલઅસંખભાગો, સુહુમનિગોઓ અસંખ ગુણવાગિ;	
તો અગણિ તઓ આઉ, તત્તો સુહુમા ભવે પુઢવી.	૨૬૮
તો બાયર વાઉ ગણી, આગિ પુઢવી નિગોય અણુક્કમસો;	
પત્તેઅવણસરીરં, અહિયં જોયણસહસ્સં તુ.	૨૬૯
ઉસ્સેહંગુલજોયણં, સહસ્સમાણે જલાસએ નેયં;	
તં વલ્લિપઉમપમુહં, અઓ પરં પુઢવીરૂવં તુ.	૨૭૦
બારસજોયણ સંખો, તિકોસ ગુમ્મીય જોયણં ભમરો;	
મુચ્છિમ ચગિપય ભુય, ગુરગગાગિ ઘણુજોયણપુહુત્તં.	૨૭૧
ગબ્ભ ચઉપ્પય છગ્ગાઉયાઈ, ભુયગાઉ ગાઉયપુહુત્તં;	
જોયણસહસ્સમુરગા, મચ્છા ઊભયે વિ ય સહસ્સં.	૨૭૨
પકિખદુગ ઘણુપ્પુહુત્તં, સવ્વાણંગુલ અસંખ ભાગલહૂ;	
વિરહો વિગલાસત્તીણ, જમ્મમરણોસુ અંતમુહૂ.	૨૭૩
ગબ્ભે મુહૂત્ત બારસ, ગુરુઓ લહુ સમય સંખ સુરતુલ્લા;	
અણુ સમયમસંખિજ્જા, એગિંદિય હુંતિ ય ચવંતિ.	૨૭૪
વણકાઈઓ અણંતા, ઈક્કોક્કાઓ વિ જં નિગોયાઓ;	
નિચ્ચમસંખો ભાગો, અણંતજ્જવો ચયઈ એઈ.	૨૭૫
ગોલા ય અસંખિજ્જા, અસંખનિગોયઓ હવઈ ગોલા;	
ઈક્કિક્કંમિ નિગોએ, અણંતજ્જવા મુણેયવ્વા.	૨૭૬
અત્થિ અણંતા જ્જવા, જેહિં ન પત્તો તસાઈ પરિણામો;	
ઉપ્પજ્જંતિ ચયંતિ ય, પુણોવિ તત્થેવ તત્થેવ.	૨૭૭
સવ્વોવિ કિસલઓ ખલુ, ઉગ્ગમમાણો અણંતઓ ભણિઓ;	
સો ચેવ વિવડ્ઢંતો, હોઈ પરિત્તો અણંતો વા.	૨૭૮
જયા મોહોદઓ તિવ્વો, અન્નાણં ખુ મહબ્ભયં;	
પેલવં વેયણીયં તુ, તયા એગિંદિયત્તણં.૨૭૯	
તિરિએસુ જંતિ સંખાઉ, તિરિ નરા જાદુકપ્પદેવાઓ;	
પજ્જત્તસંખગબ્ભય, બાયર ભૂદગપરિત્તેસુ.	૨૮૦
તો સહસારંત સુરા, નિરયા પજ્જત્તસંખગબ્ભેસુ;	

સંખપણિદિયતિરિયા, મરિઉચઉસુવિ ગઇસુ જન્તિ.	૨૮૧
થાવર વિગલા નિયમા, સંખાઉચ તિરિનરેસુ ગચ્છન્તિ;	
વિગલાલભ્મિજ્જ વિરઇ, સમ્મંપિ ન તેઉવાઉ ચુયા.	૨૮૨
પુઢવી દગ પરિત્તવણા, બાયર પજ્જત્ત હુન્તિ ચઉલેસા;	
ગબ્ભયતિરિયનરાણં, ઇલ્લેસા તિન્નિ સેસાણં.	૨૮૩
અંતમુહુત્તંમિ ગએ, અંતમુહુત્તંમિ સેસએ ચેવ;	
લેસાહિ પરિણયાહિ, જીવા વચ્ચંતિ પરલોયં.	૨૮૪
તિરિનર આગામિભવ લેસ્સાએ અઇગયે સુરા નિરયા;	
પુવ્વભવ લેસ્સસેસે, અંતમુહુત્તે મરણમિતિ.	૨૮૫
અંતમુહુત્ત ઠિઇઓ, તિરિયનરાણં હવન્તિ લેસ્સાઓ;	
ચરિમા નરાણ પુણ નવવાસૂણા પુવ્વકોડી વિ.	૨૮૬
તિરિયાણ વિ ઠિઇપમુહં, ભણિયમસેસંપિ સંપઇ વુચ્છં;	
અભિહિયદારબ્ભહિયં, ચઉગઇ જીવાણ સામન્નં.	૨૮૭
દેવા અસંખનરતિરિ, ઇત્થી પુંવેય ગબ્ભનરતિરિયા;	
સંખાઉયા તિવેયા, નપુંસગા નારયાઈઆ.૨૮૮	
આયંગુલેણ વત્થું, સરીરમુસ્સેહઅંગુલેણ તહા;	
નગપુઢવિ-વિમાણાઇં, મિણસુ પમાણંગુલેણં તુ.	૨૮૯
સત્થેણ સુતિકખેણ વિ, ઇત્તું ભિત્તું ચ જં કિર ન સક્કા;	
તં પરમાણું સિદ્ધા, વયંતિ આઇં પમાણાણં.	૨૯૦
પરમાણૂ તસરેણૂ રહરેણૂ, વાલઅગ્ગ લિકખા ય;	
જૂય જવો અટ્ટઠગુણો, કમેણ ઉસ્સેહ અંગુલયં.	૨૯૧
અંગુલ છક્કં પાઓ, સો દુગુણ વિહત્થિ સા દુગુણ હત્થો;	
ચઉહત્થં ઘણુ દુસહસ, કોસો તે જોયણં ચઉરો.	૨૯૨
ચઉસયગુણં પમાણં-ગુલમુસ્સેહઅંગુલાઉ બોધવ્વં;	
ઉસ્સેહઅંગુલ દુગુણં, વીરસ્સાયંગુલં ભણિયં.	૨૯૩
પુઢવાઈસુ પત્તેયં, સગ વણ પત્તેય ણંત દસ ચઉદ્ધ;	
વિગલે દુ દુ સુરનારય, તિરિ ચઉ ચઉ ચઉદ્ધસ નરેસુ.	૨૯૪
એગિંદિએસુ પંચસુ, બાર સગ તિ સત્ત અટ્ટાવીસા ય;	
વિગલેસુ સત્ત અડ નવ, જલ ખહ ચઉપય ઉરગ ભુયગે.	૨૯૫
અદ્ધ તેરસ બારસ, દસ દસ નવગં નરામરે, નિરએ;	
બારસ છવ્વીસ પણવીસ, હુન્તિ કુલ કોડિ લક્ખાઇં.	૨૯૬
ઇગ કોડિ સત્ત નવઇ, લક્ખા સડ્ઢા કુલાણ કોડીણં;	
સંવુડજોણિ સુરેગિંદિ, નારયા વિયડ વિગલ ગબ્ભુભયા.	૨૯૭
અચિત્તજોણિ સુર નિરય, મીસ ગબ્ભે તિભેય સેસાણં;	
સી ઉસિણ નિરય સુરગબ્ભ, મીસ તે ઉસિણ સેસ તિહા.	૨૯૮
હયગબ્ભ સંખવત્તા, જોણી કુમુન્નયાઇ જાયંતિ;	
અરિહ હરિ ચક્કિરામા, વંસીપત્તાઇ સેસ નરા.	૨૯૯
આઉસ્સ બંધકાલો, અબાહકાલો ય અંતસમઓ ય;	
અપવત્તણ-ણાપવત્તણ, ઉવક્કમ-ણુવક્કમા ભણિયા.	૩૦૦
બંધન્તિ દેવ નારય, અસંખ નર તિરિ છમાસ સેસાઊ;	
પરભવિયાઊ સેસા, નિરુવક્કમ તિભાગ સેસાઊ.	૩૦૧
સોવક્કમાઉયા પુણ, સેસ તિભાગે અહવ નવમભાગે;	
સત્તાવીસઇમે વા, અંતમુહુત્તંતિમે વા વિ.૩૦૨	
જઇમે ભાગે બંધો, આઉસ્સ ભવે અબાહકાલો સો;	
અંતે ઉજ્જુગઇ ઇગ-સમય વક્ક ચઉ પંચસમયં તા.	૩૦૩
ઉજ્જુગઇ પઢમસમએ, પરભવિયં આઉયં તહાહારો;	
વક્કાઇ બીય સમએ, પરભવિયાઉ ઉદયમેઇ.	૩૦૪
ઇગ દુ તિ ચઉ વક્કાસુ, દુગાઇસમએસુ પરભવાહારો;	

દુગવક્કાઈસુ સમયા, ઇગ દો તિન્નિય અણાહારા.	૩૦૫
બહુકાલ વેયણિજજં, કમ્મં અપ્પેણ જમિહ કાલેણં;	
વેઈજજઈ જુગવં ચિય, ઉઈન સવ્વપએ સગ્ગં.	૩૦૬
અપવત્તણિજજમેયં, આઉં અહવા અસેસકમ્મંપિ;	
બંધસમયે વિ બદ્ધં, સિઠિલં ચિય તં જહા જોગં.	૩૦૭
જં પુણ ગાઢનિકાયણ, બંધેણં પુવ્વમેવ કિલ બદ્ધં;	
તં હોઈ અણપવત્તણ, જુગ્ગં કમ વેયણિજજફલં.	૩૦૮
ઉત્તમ ચરમસરીરા, સુરનેરઈયા અસંખનરતિરિયા;	
હુન્તિ નિરુવક્કમાઓ, દુહાવિ સેસા મુણેયવ્વા.	૩૦૯
જેણાઉમુવક્કમિજજઈ, અપ્પસમુત્થેણ ઇયરગેણાવિ;	
સો અજ્જવસાણાઈ, ઉવક્કમ-ણુવક્કમો ઇયરો.	૩૧૦
અજ્જવસાણ નિમિત્તે, આહારે વેયણા પરાઘાએ;	
ફાસે આણાપાણુ સત્તવિહં ઝિજ્જએ આઉં.	૩૧૧
આહારસરીરઈંદિય, પજ્જત્તી આણપાણ ભાસ મણે;	
ચઉ પંચ પંચ છપ્પિય, ઇગ વિગલા સન્નિ સન્નીણં.	૩૧૨
આહાર સરીર ઇંદિય, ઊસાસ વઊ મણો-ભિનિવ્વત્તી;	
હોઈ જઓ દલિયાઊ, કરાણં પઈ સાઉ પજ્જત્તી.	૩૧૩
પણ્ણિદિય તિબલૂસા-સાઊ દસપાણ ચઉ છ સગ અટ્ઠ;	
ઈગદુત્તિ ચઊરિંદિણં, અસન્નિસન્નીણ નવ દસય.	૩૧૪
સંખિત્તા સંઘયણી, ગુરુત્તર સંઘયણિમજ્જઓ એસા;	
સિરિસિરિયંદમુણેદેણ, નિમ્મિયા અપ્પપઢણટ્ઠા.	૩૧૫
સંખિત્તયરી ઉ ઇમા, સરીરમોગાહણા ય સંઘયણા;	
સન્ના સંઠાણ કસાય, લેસિંદિય દુ સમુઘયા.	૩૧૬
દિટ્ઠી દંસણ નાણે, જોગુવઓગોવવાય ચવણ ઠિઈ;	
પજ્જત્તિ કિમાહારે, સન્નિ ગઈ આગઈ વેએ.	૩૧૭
મલહારિહેમસૂરીણ, સીસલેસેણ વિરઈયં સમ્મં;	
સંઘયણિરયણમેયં, નંદઉ જા વીરજિણાતિત્થં.	૩૧૮

બૃહત્સંગ્રહણીમાં ઉપયોગી ગાથાઓ

પંચસયા બાવીસા, તિન્નેવસયા ઉ હુંતિ છપ્પન્ના;	
તિન્નિસયા અડયાલા, સણંકુમારસ્સ વટ્ઠાઈ.	૧
સત્તરિસયમણૂણં, તિન્નેવસયા હવન્તિ છપ્પન્ના;	
તિન્નિસયા અડયાલા, વટ્ઠાઈ માહિંદસગ્ગસ્સ.	૨
ચોવત્તરિ ચુલસીયા, છસુત્તરયા દુવે દુવે સયાઓ;	
કપ્પંમિ બંભલોએ, વટ્ઠા તંસા ય ચઉરંસા.	૩
તિનઉય ચેવ સયં, દો ચેવ સયા સયં ચ બાણાઉયં;	
કપ્પંમિ લંતગંમિ, વટ્ઠા તંસા ય ચઉરંસા.૪	
અહ્હાવીસં ચ સયં છત્તીસસયં સયં ચ બત્તીસં;	
કપ્પંમિ મહાસુક્કે, વટ્ઠા તંસા ય ચઉરંસા.૫	
અટ્ઠત્તરસય સોલસ-સય પુણ અટ્ઠત્તરં સયં પુણ્ણં;	
કપ્પંમિ સહસ્સારે, વટ્ઠા તંસા ય ચઉરંસા.૬	
અડસીઈ બાણાઉઈ, અટ્ઠાસીઈ ય હોઈ બોધવ્વા;	
આણાયપાણાયકપ્પે, વટ્ઠા તંસા ય ચઉરંસા.	૭
ચઉસટ્ઠી બાવત્તરિ, અડસટ્ઠી ચેવ હોઈ નાયવ્વા;	
આરણઅચ્ચુયકપ્પે, વટ્ઠા તંસા ય ચઉરંસા.	૮
પણતીસા ચત્તાલા, છત્તીસા હેટ્ઠિમંમિ ગેવિજ્જે;	
તેવીસા અટ્ઠાવીસા, ચોવીસા ચેવ મજ્જિમએ.	૯
ઈક્કારસ સોલસ, બારસેવ ગેવિજ્જે ઉવરિમે હુંતિ;	
એક્કં વટ્ઠા તંસા, ચઉરો ય અણુત્તરવિમાણો.	૧૦

અચ્ચિ તહાચ્ચિમાલી, વઘરોયણ પભંકર ય ચંદાભં;	
સુરાભં સુક્કાભં, સુપઠટ્ટાભં ય રિટ્ટાભં.	૧૧
સારસ્સયમાઈચ્ચા, વણહી વરૂણા ય ગદતોયા ય;	
તુસિયા અવ્વાબાહા, અગ્ગિ તહ ચેવ રિટ્ટા ય.	૧૨
નાણાસ્સ કેવલીણં, ધમ્માયરિયસ્સ સવ્વસાહૂણં;	
માઈ અવણણવાઈ, કિબ્બિસિયભાવણં કુણઠ.	૧૩
કોઊય ભૂઠકમ્મે, પસિણાપસિણો નિમિત્તમાજ્જવે;	
ઇરિંદરસસાયગરૂઓ, અભિઓગં ભાવણં કુણઠ.	૧૪
તેસીયા પંચસયા, ઇક્કારસ ચેવ જોયણ સહસ્સા;	
રયણાએ પત્થંતર, મેગો ચિય જોયણ તિભાગો.	૧૫
સત્તાણવઠ સયાઈ, બીયાએ પત્થંતરં હોઈ;	
પણહત્તરિ તિન્નિ સયા, બારસ સહસ્સ તઈયાએ.	૧૬
છાવટ્ઠિઠ સયં સોલસ-સહસ્સ એગો ય દો વિભાગાઈ;	
અરૂઠાઈજજ સયાઈ, પણવીસસહસ્સ ધૂમાએ.	૧૭
બાવન્નસહસ્સાઈ, પંચેવ હવંતિ જોયણ સયાઈ;	
પત્થંતરમેયં, છટ્ટી પુઢવીએ નાયવ્વં.૧૮	
સીમંતઓ ત્થ પઢમો, બીઓ પુણ રોરૂયત્તિ નામેણ;	
રંભો (ભંતો) ય તત્થ તઈઓ, હોઈ ચઉત્થો ય ઉબ્ભંતો.	૧૯
સંભંતમસંભંતો, વિબ્ભંતો ચેવ સત્તમો નિરઓ;	
અટ્ટમઓ ભંતો (તત્તો) પુણ, નવમો સીઓત્તિ નાયવ્વો.	૨૦
વક્કંતમ વક્કંતો, વિકલો (વિક્કંતો) તહ ચેવ રોરૂઓ નિરઓ;	
પઢમાએ પુઢવીએ, ઇંદયાએએ બોધવ્વા.૨૧	
થણિએ થણાએ ય તસા, મણાએ ચ (વ) ણાએ ય હોઈ નાયવ્વો;	
ઘટ્ટે તહ સંઘટ્ટે, જિબ્ભે અવજિબ્ભએ ચેવ.	૨૨
લોલે લોલાવત્તે, તહેવ ઘણાલોલુએ ય બોધવ્વે;	
બીયાએ પુઢવીએ, ઇક્કારસ ઇંદયા એએ.૨૩	
તત્તો તવિઓ તવણો, તાવણો પંચમો ય નિદ્ડહો (નિદ્દાહો);	
છટ્ટો પુણ પજ્જલિઓ ઉપ્પજ્જલિઓ ય સત્તમઓ.	૨૪
સજ્જલિઓ અટ્ટમઓ, સંપજ્જલિઓ ય નવમઓ ભણિઓ;	
તઈયાએ પુઢવીએ, નવ ઇંદય નારયા એએ.	૨૫
આરે તારે મારે, વચ્ચે તમએ ય હોઈ નાયવ્વે;	
ખાડખડે ખડખડે, ઇંદય નરયા ય ચઉત્થીએ.	૨૬
ખાએ તમએ ય તહા, ઊસે ઉ અંધએ ય તહા તિમિસે;	
ઇય પંચમી પુઢવીએ, નિરય ઇંદયા હુંતિ.૨૭	
હિમ વદલ લલ્લકે, તિન્નિ નિરય ઇંદયા ય છટ્ટીએ;	
એગો ય સત્તમાએ, અપઠટ્ટાણો ઉ નામેણં.	૨૮

લઘુ ક્ષેત્રસમાસ

વીરં જયસેહરપય-પઠટ્ટિઠં પણમિઊણ સુગુરૂં ચ;	
મંદુ ત્તિ સસરણટ્ટા, ખિત્તવિઆરાહણુ-મુંછામિ.	૧
તિરિએગરજ્જુખિત્તે, અસંખદીવોદહીઉ તે સવ્વે;	
ઉદ્ધારપલિઅપણવીસ, કોડાકોડીસમયતુલ્લા.	૨
કુરૂસગદ્દિણાવિ-અંગુલ, રોમે સગવાર વિહિઅઅડખંડે;	
બાવન્નસયં સહસા, સગનઉઈ વીસલકખાણુ.	૩
તે થુલા પલ્લે વિ હુ, સંખિજ્જા ચેવ હુંતિ સવ્વેઠવિ;	
તે ઇક્કિક્ક અસંખે, સુહુમે ખંડે પકપ્પેહ.૪	
સુહુમાણુ-નિચિઅ-ઉસ્સેહંગુલ-ચઉકોસ પલ્લિ-ઘણાવટ્ટે;	

પઇસમય-મણુગ્ગહ, નિટ્ઠિઠઅમ્મિ ઉદ્ધારપલિઉ ત્તિ.	૫
પઢમો જંબૂ બીઓ, ધાયઇસંડો અ પુકખરો તઇઓ;	
વારુણિવરો ચઉત્થો, ખીરવરો પંચમો દીવો.	૬
ઘયવરદીવો છટ્ટઠો, ઇકખુરસો સત્તમો અ અટ્ટઠમઓ;	
નંદીસરો અ અરુણો, નવમો ઇચ્ચાઇઅસંખિજજા.	૭
સુપસત્થવત્થુનામા, તિપડોઆરા તહાડરુણાઇઆ;	
ઇગનામેડવિ અસંખા જાવ ય સૂરાવભાસ ત્તિ.	૮
તત્તો દેવે નાગે, જકખે ભૂએ સયંભુરમણે અ;	
એએ પંચ વિ દીવા, ઇગેગનામા મુણેઅવ્વા.	૯
પઢમે લવણો બીએ, કાલોદ્દહિ સેસએસુ સવ્વેસુ;	
દીવસમ નામયા જા, સયંભુરમણોદ્દહી ચરમો.	૧૦
બીઓ તઇઓ ચરમો, ઉદ્દગરસા પઢમ ચઉત્થ પંચમગા;	
છટ્ટઠોવિ સનામરસા, ઇકખુરસા સેસજલનિહિણો.	૧૧
જંબુદ્દીવ પમાણં, ગુલ-જોઅણ-લકખ-વટ્ટ-વિકખંભો;	
લવણાઇઆ સેસા, વલયાભા દુગુણદુગુણા ય.	૧૨
વયરામઇહિં નિઅનિઅ, દીવોદ્દહિ મજ્જગણિઅ મૂલાહિં;	
અટ્ટકુચ્ચાહિં બારસ, ચઉમૂલેઉવરિ રુંદાહિં.	૧૩
વિત્થાર-દુગ-વિસેસો, ઉસ્સેહ વિભત્તખઓ ચઓ હોઇ;	
ઇઅ ચૂલાગિરિકૂડાઇ, તુલ્લવિકખંભકરણાહિં.	૧૪
ગાઉદુગુચ્ચાઇ તયટ્ટઠ-ભાગરૂંદાઇ પઉમવેઇએ;	
દેસૂણ દુજોઅણ વર વણાઇ, પરિમંડિઅ સિરાહિં.	૧૫
વેઇસમેણ મહયા, ગવકખકડએણ સંપરિત્તાહિં;	
અટ્ટઠારસૂણચઉભત્ત, પરિહિદારંતરાહિં ચ.	૧૬
અટ્ટકુચ્ચ-ચઉસુવિત્થર, દુપાસ-સકકોસ-કુકકારાહિં;	
પુવ્વાઇ-મહડિટ્ટેઅ-દેવ, દાર-વિજયાઇનામાહિં.	૧૭
નાણામણિમય દેહલિ-કવાડ પરિઘાઇ-દાર-સોહાહિં;	
જગઇહિં તે સવ્વે, દીવોદ્દહિણો પરિક્ખિત્તા.	૧૮
વરતિણ તોરણ-જ્જય, ઇત્ત-વાવિ-પાસાયસેલ-સિલવટ્ટે;	
વેઇવણે વરમંડવ-ગિહાસણેસું રમંતિ સુરા.	૧૯
ઇહ અહિગારો જેસિં, સુરાણ દેવીણ તાણામુપ્પત્તી;	
નિઅદીવોદ્દહિનામે, અસંખ ઇમે સનયરીસુ.	૨૦
જંબુદ્દીવો ઇહિં કુલ-ગિરિહિં સત્તહિં તહેવ વાસેહિં;	
પુવ્વાવર-દીહેહિં, પરિછિત્તો તે ઇમે કમસો.	૨૧
હિમવંસિહરી મહહિમવ-રુપ્પિ-નિસઢો અ ણીલવંતો અ;	
બાહિરઓ દુદ્ધુ ગિરિણો, ઉભઓ વિ સવેઇઆ સવ્વે.	૨૨
ભરહેરવય ત્તિ દુગં, દુગં ચ હેમવય-રણણવયરૂવં;	
હરિવાસ-રમ્મય-દુગં, મજ્જિ વિદેહુત્તિ સગવાસા.	૨૩
દો દીહા ચઉ વટ્ટા, વેઅરૂઢા પિત્તઇક્કમજ્જમ્મિ;	
મેરૂ વિદેહમજ્જે, પમાણમિત્તો કુલગિરીણં.	૨૪
ઇગ દો ચઉ સય ઉચ્ચા, કણાગમયા કણાગરાયયા કમસો;	
તવણિજ્જ-સુવેરુલિઆ, બહિ મજ્જ-બ્ભિતરા દો દો.	૨૫
દુગ અડ દુત્તિસ અંકા, લકખગુણા કમેણ નઉઅસયભઇઆ;	
મૂલોવરિ સમરૂવં, વિત્થારં ભિંતિ જુઅલતિગે.	૨૬
બાવન્ન-હિઓ સહસો, બારકલા બાહિરાણ વિત્થારો;	
મજ્જિમગાણ દસુત્તર-બાયાલસયા દસકલા ય.	૨૭
અબ્ભિંતરાણ દુકલા, સોલસહસ્સ-ડસયા સબાયાલા	

ચઉચત્તસહસ દો સય, દસુત્તરા દસકલા સવ્વે.	૨૮
ઇગ ચઉ સોલસ અંકા, પુવ્વુત્તવિહીઇ ખિત્તજુઅલતિગે;	
વિત્થારં ખિંતિ તહા, ચઉસદ્દિંઠકો વિદેહસ્સ.	૨૯
પંચસયા છવ્વીસા, ઇચ્ચ કલા ખિત્તપદ્મજુઅલમ્મિ;	
બીએ ઇગવીસસયા, પણુત્તરા પંચ ય કલા ય.	૩૦
ચુલસીસય ઇગવીસા, ઇક્કલા તઇઅગે વિદેહિ પુણો;	
તિત્તીસસહસ ઇસય, ચુલસીઆ તહ કલા ચઉરો.	૩૧
પણપન્નસહસ સગસય, ગુણનઉઆ નવકલા સયલવાસા;	
ગિરિખિત્તં કસમાસે, જોઅણલકખં હવઇ પુણાં.	૩૨
પન્નાસસુદ્ધ બાહિરખિત્તે, દલિઅમ્મિ દુસય અડતીસા;	
તિન્નિ ય કલા ય એસો, ખંડચઉક્કસ્સ વિકખંભો.	૩૩
ગિરિઉવરિ સવેઈદહા, ગિરિ-ઉચ્ચત્તાઉ દસગુણા દીહા;	
દીહત્ત-અદ્ધરુંદા, સવ્વે દસજોઅણુવ્વેહા.૩૪	
બહિ પઉમપુંડરીયા, મજ્જે તે ચેવ હુંતિ મહપુવ્વા;	
તેગચ્છિ-કેસરીઆ, અભિંતરિઆ કમેણેસું.	૩૫
સિરિલચ્છી હિરિબુદ્ધિ, ધીકિત્તી નામિયાઉ દેવીઓ;	
ભવણવઇઓ પલિઓ-વમાઉ વરકમલનિલયાઓ.	૩૬
જલુવરિ કોસદ્ધુગુચ્ચં, દહવિત્થરપણસયંસવિત્થારં;	
બાહલ્લ વિત્થરદ્ધં, કમલં દેવીણ મૂલિલ્લં.૩૭	
મૂલે કંદે નાલે, તં વયરા-રિટ્ઠ વેરુલિઅરૂવં;	
જંબુણાયમજ્જ તવણિજ્જ-બહિઅદલં રત્તકેસરિઅં.	૩૮
કમલદ્ધપાયપિહુલુચ્ચ, કણગમયકણિણ ગોવરિં ભવણાં;	
અદ્ધેગકોસ-પિહુદીહ, ચઉદસય-ચાલ ધણુ હુચ્ચં.	૩૯
પચ્છિમદ્દિસિ વિણુ ધણુપણસય ઉચ્ચ ઢાઇજ્જસયપિહુપવેસં;	
દારતિગં ઇહ ભવણે, મજ્જે દહદેવિસયણિજ્જં.	૪૦
તં મૂલકમલદ્ધપ્પમાણ-કમલાણ અડહિઅ-સએણાં;	
પરિખિત્તં તબ્ભવણેસુ, ભૂસણાઇણિ દેવીણાં.	૪૧
મૂલપઉમાઉ પુવ્વિં, મહયરિયાણાં ચઉણહ ચઉપઉમા;	
અવરાઇ સત્તપઉમા, અણિઆહિવઈણ સત્તણહં.	૪૨
વાયવ્વાઇસુ તિસુ સુરિ, સામન્નસુરાણ ચઉસહસપઉમા;	
અટ્ઠ દસ બાર સહસા, અગ્ગેઆઇસુ તિપરિસાણાં.	૪૩
ઇઅ બીઅપરિકખેવો, તઇએ ચઉસુ વિ દિસાસુ દેવીણાં;	
ચઉ ચઉ પઉમસહસ્સા, સોલસસહસ્સાડવયરકખાણાં.	૪૪
અભિઓગાઇ તિવલએ, દુત્તીસ-ચત્તા-ડયાલ-લકખાઇં;	
ઇગકોડિ વીસલકખા, સડ્ઢા વીસં સયં સવ્વે.	૪૫
પુવ્વાવરમેરુમુહં, દુસુ દારતિગં પિ સદ્દિસિ દહમાણા;	
અસિઇભાગપમાણાં, સતોરણાં નિગ્ગયનઈઅં.	૪૬
જામુત્તરદારદુગં, સેસેસુ દહેસુ તાણ મેરુમુહા;	
સદ્દિસિ દહાસિઅભાગા, તયદ્ધમાણા ય બાહિરિયા.	૪૭
ગંગા સિંધૂ રત્તા, રત્તવઈ બાહિરં નઇચઉક્કં;	
બહિદહપુવ્વાવરદાર-વિત્થરં વહઇ ગિરિસિહરે.	૪૮
પંચસય ગંતુ નિઅગા-વત્તણાકૂડાઉ બહિમુહં વલઇ;	
પણસયતેવીસેહિં, સાહિઅતિકલાહિં સિહરાઓ.	૪૯
નિવડઇ મગરમુહોવમ, વયરામય-જિભિઆઇ વયરતલે;	
નિઅગે નિવાયકુંડે, મુત્તાવલિસમપ્પવાહેણા.	૫૦
દહદારવિત્થરાઓ, વિત્થરપન્નાસભાગ જહ્ઙાઓ;	
જહ્ઙતાઓ ચઉગુણ દીહાઓ સવ્વજિભ્ભીઓ.	૫૧
કુંડંતો અડજોઅણપિહુલો, જલઉવરિ કોસદ્ધુગમુચ્ચો;	

વેઇજુઓ નઇદેવી-દીવો દહદેવિસમભવણો.	૫૨
જોઅણસદ્દિઠપિહુત્તા, સવાયછપ્પિહુલ વેઇતિદુવારા;	
એએ દસુંડ કુંડા, એવં અન્ને વિ નવરં તે.૫૩	
એસિં વિત્થારતિગં, પડુચ્ચસમ-દુગુણ-ચઉગુણ ટ્ઠગુણા;	
ચઉસદ્દિઠ સોલ-ચઉ-દો, કુંડા સવ્વેવિ ઇહ નવઇ.	૫૪
એઅં ચ નઇચઉક્કં, કુંડાઓ બહિદુવારપરિવૂઠં;	
સગસહસ નઇસમેઅં, વેઅડ્ઢગિરિં પિ ભિંદેઇ.	૫૫
તત્તો બાહિરખિત્તદ્ધ-મજ્ઞઓ વલઇ પુવ્વઅવરમુહં;	
નઇસત્તસહસસહિઅં, જગઇતલેણં ઉદહિમેઇ.	૫૬
ધુરિ કુંડદુવાર સમા, પજ્જંતે દસગુણા ય પિહુલત્તે;	
સવ્વત્થ મહનઇઓ, વિત્થરપન્નાસભાગુંડા.	૫૭
પણખિત્તમહનઇઓ, સદારદિસિ દહવિસુદ્ધગિરિઅદ્ધં;	
ગંતૂણ સજ્જિભ્ભીહિં નિઅનિઅકુંડેસુ નિવડંતિ.	૫૮
નિઅ જિભ્ભિઅ પિહુલત્તા, પણવીસંસેણ મુત્તમજ્ઞગિરિં;	
જામમુહા પુવ્વુદ્ધિં, ઇઅરા અવરોઅહિમુવિત્તિ.	૫૯
હેમવઇ રોહિઅંસા, રોહિઆ ગંગદુગુણપરિવારા;	
એરણ્ણવએ સુવણ્ણ રૂપ્પકૂલાઓ તાણ સમા.	૬૦
હરિવાસે હરિકંતા, હરિસલિલા ગંગચઉગુણનઇઆ;	
એસિં સમા રમ્મયએ, નરકંતા નારિકંતા ય.	૬૧
સીઓઆ સીઆઓ મહાવિદેહમ્મિ તાસુ પત્તેયં;	
નિવડઇ પણલકખ-દુત્તીસસહસ અડત્તીસ નઇસલિલં.	૬૨
કુરુનઇ ચુલસી સહસા, ઇચ્ચેવંતરનઇઓ પઇવિજયં;	
દો દો મહાનઇઓ, ચઉદસહસ્સા ઉ પત્તેયં.	૬૩
અડસચરિ મહનઇઓ, બારસ અંતરનઇઉ સેસાઓ;	
પરિઅરનઇ ચઉદસ-લકખા છપ્પન્નસહસા ય.	૬૪
એગારડ નવકૂડા, કુલગિરિજુઅલત્તિગે વિ પત્તેઅં;	
ઇઇ છપ્પન્ના ચઉ ચઉ, વકખારેસુ ત્તિ ચઉસટ્ઠી.	૬૫
સોમણસિ ગંધમાયણિ સગ સગ વિજ્જુપ્પભિ માલવંતિ પુણો;	
અટ્ઠટ્ઠ સયલ તીસં, અડ નંદણિ અટ્ઠ કરિકૂડા.	૬૬
ઇઅ પણસયઉચ્ચ ઇાસદ્દિઠ-સય કુંડા તેસુ દીહરગિરીણં;	
પુવ્વનઇ મેરુદિસિ, અંતસિદ્ધકૂડસુ જિણાભવણા.	૬૭
તે સિરિગિહાઓ દોસય ગુણાપ્પમાણા તહેવ તિદુવારા;	
નવરં અડવીસાહિઅ સયગુણ દારપ્પમાણામિહ.	૬૮
પણવીસં કોસસયં સમચઉરસવિત્થડા દુગુણામુચ્ચા;	
પાસાયા કૂડેસુ, પણસયઉચ્ચેસુ સેસેસુ. ૬૯	
બલહરિસહહરિકૂડા, નંદણવણિ માલવંતિ વિજ્જુપભે;	
ઇસાણુત્તરદાહિણ-દિસાસુ સહસુચ્ચ કણગમયા.	૭૦
વેઅડ્ઢેસુ વિ નવ નવ, કૂડા પણવીસ કોસઉચ્ચા તે;	
સવ્વે તિસય ઇડુત્તર, એસુ વિ પુવ્વંતિ જિણકૂડા.	૭૧
તાણુવરિ ચેઇહરા, દહદેવીભવણાતુલ્લપરિમાણા;	
સેસેસુ અ પાસાયા, અદ્ધેગકોસં પિહુચ્ચત્તે.	૭૨
ગિરિકરિકૂડા ઉચ્ચત્તણાઓ, સમ-અદ્ધ-મૂલુવરિરુંદા;	
રયણમયા નવરિવિઅડ્ઢ, મજ્જિમા તિતિ કણગરૂવા.	૭૩
જંબૂણાયરયયમયા, જગઇસમા જંબુસામલીકૂડા;	
અટ્ઠટ્ઠ તેસુ દહદેવિ-ગિહસમા ચારુચેઇહરા.	૭૪
તેસિં સમોસહકૂડા, ચઉત્તીસં ચુલ્લકુંડ જુઅલંતો;	
જંબૂણાએસુ તેસુ અ, વેઅડ્ઢેસું વ પાસાયા.	૭૫
પંચસએ પણવીસે, કૂડા સવ્વે વિ જંબૂદીવમ્મિ;	

તે પત્તેઅં વરવણજુઆહિ વેઇહિ પરિક્ષિત્તા.	૭૬
છસપરિ કૂડેસુ તહા, ચૂલા ચઉવણ-તરૂસુ જિણભવણા;	
ભણિયા જંબૂદીવે, સદેવયા સેસઠાણેસુ.૭૭	
કરિફૂડ-કુંડ-નઇ-દહ, કુરુ-કંચણ-યમલ-સમવિઅડ્ઢેસુ;	
જિણભવણવિસંવાઓ, જો તં જાણંતિ ગીઅથ્યા.	૭૮
પુવ્વાવરજલહિતા, દસુચ્યદસપિહુલ મેહલચઉક્કા;	
પણવીસુચ્યા પન્નાસ-તીસ-દસ-જોઅણ-પિહુત્તા.	૭૯
વેઇહિં પરિક્ષિત્તા, સખયરપુર-પન્ન-સટ્ઠિઠ-સેણિદુગ્ગા;	
સદિસિંદ-લોગપાલો-વભોગિ ઉવરિલ્લ-મેહલયા.	૮૦
દુદુ ખંડવિહિઅ-ભરહે, રવયા દુદુ-ગુરુગુહાય રુપ્પમયા;	
દો દીહા વેઅડ્ઢા, તહા દુત્તીસં ચ વિજએસુ.	૮૧
નવરં તે વિજયંતા, સખયર-પણપન્નપુર-દુસેણીઆ;	
એવં ખયરપુરાઇં, સગતીસસયાઇં ચાલાઇં.	૮૨
ગિરિવિત્થરદીહાઓ, અડુચ્ય ચઉ પિહુપવેસદારાઓ;	
બારસપિહુલાઉ અડુ-ચ્યયાઉ વેઅડ્ઢદુગુહાઓ.	૮૩
તમ્મજ્જ રૂજોઅણ, અંતરાઉ તિ તિ વિત્થરાઉ દુનઇઓ;	
ઉમ્મગ્ગ નિમ્મગાઓ, કડગાઉ મહાનઇગયાઓ.	૮૪
ઇહ પઇભિત્તિં ગુણવન્ન, મંડલે લિહઇં ચક્કિ દુ દુસમુહે;	
પણસયધણુહપમાણે, બારેગડજોઅણુજ્જોએ.	૮૫
સા તમિસગુહા જ્જએ, ચક્કી પવિસેઇ મજ્જખંડંતો;	
ઉસહં અંકિઅ સો જ્જએ, વલઇ સા ખંડગપવાયા.	૮૬
ક્યમાલ નટ્ટમાલય-સુરાઉ વદ્ધઇનિબદ્ધસલિલાઓ;	
જા ચક્કી તા ચિટ્ઠંતિ, તાઓ ઉગ્ઘડિયદારાઓ.	૮૭
બહિખંડંતો બારસદીહા નવવિત્થડા અઉજ્જપુરી;	
સા લવણા વેઅડ્ઢા, ચઉદ-હિઅસયં ચિગારકલા.	૮૮
ચક્કિવસનઇપવેસે, તિત્થદુગં માગહો પભાસો અ;	
તાણંતો વરદામો, ઇહ સવ્વે બિહુત્તરસયં તિ.	૮૯
ભરહેરવએ છઇઅર-મયાવસપ્પિણિ-ઉસપ્પિણીરૂવં;	
પરિભમઇ કાલચક્કં, દુવાલસારં સયા વિ કમા.	૯૦
સુસમસુસમા ય સુસમા, સુસમદુસમા ય દુસમસુસમા ય;	
દુસમા ય દુસમદુસમા, કમુક્કમા દુસુ વિ અરછક્કં.	૯૧
પુવ્વુત્તપલ્લિ-સમસય, અણુગહણાનિટ્ઠિંએ હવઇ પલિઓ;	
દસ કોડિકોડિપલિએહિં, સાગરો હોઇ કાલસ્સ.	૯૨
સાગરચઉત્તિદુકોડા-કોડિમિએ અરતિગે નરાણ કમા;	
આગિ તિ દુ ઇગપલિઆ, તિદુઇગકોસા તણુચ્યત્તં.	૯૩
તિદુઇગદિણેહિં તૂવરિ-બયરામલમિત્તુ તેસિમાહારો;	
પિટ્ઠકરંડા દોસય, છપ્પન્ના તદ્દલં ચ દલં.	૯૪
ગુણવન્નદિણે તહ પનર-પનરઅહિએ અવચ્યપાલણયા;	
અવિ સયલજિઆ જુઅલા, સુમણ સુરૂવા ય સુરગઇઆ.	૯૫
તેસિ મત્તંગ ભિગ્ગા તુડિઅંગા જોઇ દીવ ચિત્તંગા;	
ચિત્તરસા મણિઅંગા, ગેહાગારા અણિઅચકખા.	૯૬
પાણં ભાયણ પિચ્છણ, રવિપહ દીવપહ કુસુમ માહારો;	
ભૂસણ ગિહ વત્થાસણ, કપ્પદુમા દસવિહા દિંતિ.	૯૭
મણુઆઉસમગયાઇ, હયાઇ-ચઉરંસ જાઈ-અટ્ઠંસા;	
ગોમહિસુટ્ટખરાઇ-પણંસ સાણાઇ-દસમંસા.	૯૮
ઇચ્યાઇ તિરચ્છાણ વિ, પાયં સવ્વારએસુ સારિચ્છં;	
તઇઆરસેસિ કુલગર-નયજિણધમ્માઇ ઉપ્પત્તી.	૯૯
કાલદુગે તિચઉત્થારગેસુ એગૂણાનવઇપકખેસુ;	

સેસિ ગએસુ સિજ્ઞંતિ, હુંતિ પઢમંતિમજિણિદા.	૧૦૦
બાયાલસહસવરસૂ-ણિગકોડાકોડિ અચરમાણાએ;	
તુરિએ નરાઉ પુવ્વાણ, કોડિ તણુ કોસચઉરંસં.	૧૦૧
વરિસેગવીસસહસ, પ્પમાણાપંચમરએ સગકરુચ્ચ્યા;	
તીસહિઅસયાઉ નરા, તયંતિ ધમ્માઠઆણંતો.	૧૦૨
ખારગ્ગિવિસાઠહિં, હાહાભૂઆકયાઠ પુહવીએ;	
ખગભીયં વિઅડ્ઢાઠસુ, નરાઠભીયં બિલાઠસુ.	૧૦૩
બહુમચ્છયક્કવહનઠ-ચઉક્કપાસેસુ નવ નવ બિલાઠં;	
વેઅડ્ઢોભયપાસે, ચઉઆલસયં બિલાણેવં.	૧૦૪
પંચમસમઘટ્ઠારે, દુકરુચ્ચ્યા વીસવરિસઆઉ નરા;	
મચ્છાસિણો કુરૂવા, કૂરા બિલવાસિ કુગઠગમા.	૧૦૫
નિલ્લજ્જા નિવ્વસણા, ખરવયણા પિઅસુઆઠઠિઠરહિઆ;	
થીઓ ઇવરિસગભ્મા, અઠદુહપસવા, બહુસુઆય.	૧૦૬
ઠઅ અરઠકકેણવસપ્પિણિ ત્તિ ઉસ્સપ્પિણી વિ વિવરીઆ;	
વીસં સાગર કોડાકોડીઓ કાલચક્કમ્મિ.૧૦૭	
કુરુદુગિ હરિરમ્મયદુગિ, હેમવએરણણવઠદુગિ વિદેહે;	
કમસો સયાવસપ્પિણિ, અરયચઉક્કાઠસમકાલો.	૧૦૮
હેમવએરણણવએ, હરિવાસે રમ્મએ અ રયણમયા;	
સદાવઠવિઅડાવઠ, ગંધાવઠ માલવંતકખા.	૧૦૯
ચઉ વટ્ટવિઅડ્ઢાસાઠ, અરુણપઉમપ્પભાસ સૂરવાસા;	
મૂલુવરિ પિહુત્તે તહ, ઉચ્ચત્તે જોયણસહસ્સં.	૧૧૦
મેરૂ વટ્ટો સહસ્સકંઠો લકખૂસિઓ સહસ્સુવરિં;	
દ્દસગુણ ભુવિ તં સનવઠ, દ્દસિગારંસં પિહુલમૂલે.	૧૧૧
પુઢવુવલવયરસક્કર, મયકંઠો ઉવરિ જાવ સોમણસં;	
ફલિહંકરયયકંચણ-મઓ અ જંબૂણઓ સેસો.	૧૧૨
તદુવરિ ચાલીસુચ્ચ્યા, વટ્ટા મૂલુવરિ બાર ચઉ પિહુલા;	
વેરુલિયા વરચૂલા, સિરિભવણ-પમાણ ચેઠહરા.	૧૧૩
ચૂલાતલાઉ ચઉસય, ચઉનવઠ વલયરૂવવિકખંભં;	
બહુજલકુંડં પંડગ-વણં ચ સિહરે સવેઠઅં.	૧૧૪
પન્નાસજો અણોહિં, ચૂલાઓ, ચઉદ્દિસાસુ જિણભવણા;	
સવિદ્દિસિ સક્કીસાણં, ચઉવાવિજુઆ ય પાસાયા.	૧૧૫
કુલગિરિચેઠહરાણં, પાસાયાણં ચિમે સમટ્ઠગુણા;	
પણવીસ રુદ્દ દુગુણા-યામાઉ ઇમાઉ વાવીઓ.	૧૧૬
જિણહરબહિદ્દિસિ જોઅણ-પણસય દીહદ્ધપિહુલ ચઉઉચ્ચ્યા;	
અદ્ધસસિસમા ચઉરો, સિઅકણયસિલા સવેઠઆ.	૧૧૭
સિલમાણાટ્ઠસહસ્સં-સમાણાસીહાસણોહિ દોહિ જુઆ;	
સિલ પંડુકંબલા રત્ત-કંબલા પુવ્વપચ્છિમઓ.	૧૧૮
જામુત્તરાઉ તાઓ, ઇગેગસીહાસણાઉ અઠપુવ્વા;	
ચઉસુ વિ તાસુ નિયાસણ દ્દિસિભવજિણમજ્જણંહોઠ.	૧૧૯
સિહરા ઇત્તીસેહિં સહસેહિં મેહલાઠ પંચસએ;	
પિહુલં સોમણસવણં, સિલવિણુ પંડગવણસરિચ્છં.	૧૨૦
તબ્બાહિરિ વિકખંભો, બાયાલસયાઠ દુસયરિ જુઆઠં;	
અટ્ઠેગારસભાગા, મજ્જે તં ચેવ સહસૂણં.	૧૨૧
તત્તો સડ્ઢદુસટ્ઠી-સહસેહિં નંદણં પિ તહ ચેવ;	
નવરિ ભવણપાસાયં-તરટ્ઠ દ્દિસિ કુમરિકૂડા વિ.	૧૨૨
નવસહસ નવસયાઠં ચઉપન્ના ઇચ્ચિગારભાગા ય;	
નંદણબહિવિકખંભો, સહસૂણો હોઠ મજ્જમ્મિ.	૧૨૩
તદ્દહો પંચસએહિં, મહિઅલિ તહ ચેવ ભદ્દસાલવણં;	

નવરમિહ દિગ્ગય ચ્ચિઅ, કૂડા વણવિત્થરં તુ ઇમં.	૧૨૪
બાવીસસહસ્સાઇં, મેરૂઓ પુવ્વઓ અ પચ્છિમઓ;	
તં ચાડસીવિહત્તં, વણમાણં દાહિણુત્તરઓ.	૧૨૫
ઇવ્વીસ સહસ ચઉસય, પણહત્તરિ ગંતુ કુરુનઇપવાયા;	
ઉભઓ વિણિગ્ગયા ગય-દંતા મેરુમ્મુહા ચઉરો.	૧૨૬
અગ્ગેઆઇસુ પયાહિણેણ, સિઅરત્તપીઅનીલાભા;	
સોમણસ વિજ્જુપ્પહ, ગંધમાયણમાલવંતકપ્પા.	૧૨૭
અહલોયવાસિણીઓ, દિસાકુમારીઉ અટ્ઠ એએસિં;	
ગયદંતગિરિવરાણં, હિટ્ઠા ચિટ્ઠંતિ ભવણેસુ.	૧૨૮
ધુરિ અંતે ચઉપણસય, ઉચ્ચત્તિ પિહુત્તિ પણસયાડસિસમા;	
દીહત્તિ ઇમે ઇકલા, દુસય નવુત્તર સહસતીસં.	૧૨૯
તાણંતો દેવુત્તર-કુરાઉ ચંદ્દસંઠિયાઉ દુવે;	
દસસહસ વિસુદ્ધમહા-વિદેહ દલમાણ પિહુલાઓ.	૧૩૦
નઇપુવ્વાવરકૂલે, કણગમયા બલસમા ગિરિ દો દો;	
ઉત્તરકુરાઇ જમગા, વિચિત્તચિત્તા ય ઇઅરીએ.	૧૩૧
નઇવહદીહા પણ પણ, હરયા દુદુદારયા ઇમે કમસો;	
નિસહો તહ દેવકુરૂ, સૂરો સુલસો ય વિજ્જુપભો.	૧૩૨
તહ નીલવંત ઉત્તરકુરૂ ચંદેરવય માલવંતુ ત્તિ;	
પઉમદહસમા નવરં, એએસુ સુરા દહસનામા.	૧૩૩
અડસય ચઉતીસ જોઅણાઇં, તહ સેગસત્તભાગાઓ;	
ઇક્કારસ ય કલાઓ, ગિરિ-જમલ-દહાણ-મંતરયં.	૧૩૪
દહ-પુવ્વાવરદસજોયણેહિ, દસ દસ વિઅડ્ઠકૂડાણં;	
સોલસગુણપ્પમાણા, કંચણગિરિણો દુસય સવ્વે.	૧૩૫
ઉત્તરકુરુપુવ્વદ્દે, જંબૂણય જંબુપીઠમંતેસુ;	
કોસદુગુચ્ચં કમ્મિ વડ્ઠમાણુ, ચઉવીસગુણં મજ્જે.	૧૩૬
પણસયવટ્ટપિહુત્તં, તં પરિખિત્તં ય પઉમવેઇએ;	
ગાઉદુગુચ્ચ-દ્ધપિહુત્ત, ચારુ-ચઉદાર-કલિઆએ.	૧૩૭
તં મજ્જે અડવિત્થર, ચઉચ્ચ મણિ પીઠિઆઇ જંબૂતરૂ;	
મૂલે કંદે ખંધે, વરવયરા-રિટ્ઠ-વેરુલિએ.૧૩૮	
તસ્સ ય સાહપસાહા, દલા ય ખિંટાય પલ્લવા કમસો;	
સોવન્ન-જાયરૂવા, વેરુલિ-તવણિજ્જ-જંબુણયા.	૧૩૯
સો રયયમયપવાલો, રાયયવિડિમોય રયણપુષ્કલો;	
કોસદુગં ઉવ્વેહે, થુડસાહાવિડિમવિકખંભો.	૧૪૦
થુડ સાહવિડિમદીહ ત્તિ, ગાઉએ અટ્ઠ પનર ચઉવીસં;	
સાહા સિરિસમભવણા, તમ્માણ સચેઇઅં વિડિમં.	૧૪૧
પુવિલ્લ સિજ્જ તિસુ આસણાણિ, ભવણેસુડણાઢિઅસુરસ્સ;	
સા જંબૂ બારસ-વેઇઆહિં કમસો પરિક્ખિત્તા.	૧૪૨
દહપઉમાણં જં વિત્થરં, તુ તમિહાવિ જંબુરુકપ્પાણં;	
નવરં મહયરિયાણં, ઠાણે ઇહ અગ્ગમહિસીઓ.	૧૪૩
કોસદુસએહિં જંબૂ, ચઉદિસિં પુવ્વસાલસમભવણા;	
વિદિસાસુ સેસતિસમા, ચઉવાવિજુયા ય પાસાયા.	૧૪૪
તાણંતરેસુ અડ જિણ-કુડા તહ સુરકુરાઇ અવરદ્દે;	
રાયયપીઠે સામલિ-રુકપ્પો એમેવ ગરુલસ્સ.	૧૪૫
બત્તીસ સોલ બારસ, વિજયા વકપ્પાર અંતરનઇઓ;	
મેરુવણાઓ પુવ્વાવરાસુ કુલગિરિ-મહનયંતા.	૧૪૬
વિજયાણ પિહુત્તિ સગટ્ઠ-ભાગ બારુત્તરા દુવીસસયા;	
સેલાણં પંચસએ, સવેઇ-નઇ પન્નવીસ-સયં.	૧૪૭
સોલસસહસ્સ પણસય, બાણઉઆ તહ ય દો કલાઓ ય;	

એએસિં સવ્વેસિં, આયામો વણમુહાણં ય.	૧૪૮
ગયદંતગિરિવ્યુચ્યા, વકખારા તાણમંતરનઇણં;	
વિજયાણં ય ત્મિહાણાઈ, માલવંતા પયાહિણાઓ.	૧૪૯
ચિત્તે ય બંભકૂડે, નલિણીકૂડે ય એગસેલે ય;	
તિઉડે વેસમણે વિ ય, અંજણ માયંજણે ચેવ.	૧૫૦
અંકાવઇ પમ્હાવઇ, આસીવિસ તહ સુહાવહે ચંદે;	
સૂરે નાગે દેવે, સોલસ વકખારગિરિનામા.	૧૫૧
ગાહાવાઈ દહવઈ, વેગવઈ તત્ત મત્ત ઉમ્મત્તા;	
ખીરોય સીયસોયા, તહ અંતોવાહિણી ચેવ.	૧૫૨
ઉમ્મીમાલિણિ ગંભીર-માલિણી ફેણમાલિણી ચેવ;	
સવ્વત્થ વિ દસજોયણ, ઉંડા કુંડુભવા એયા.	૧૫૩
કચ્છુ સુકચ્છો ય મહા-કચ્છો કચ્છાવઈ તહા;	
આવત્તો મંગલાવત્તો, પુકખલો પુકખલાવઈ.	૧૫૪
વચ્છુ સુવચ્છો ય મહા-વચ્છો વચ્છાવઈ વિ ય;	
રમ્મો ય રમ્મઓ ચેવ, રમણી મંગલાવઇ.	૧૫૫
પમ્હુ સુપમ્હો ય મહા-પમ્હો પમ્હાવઈ તઓ;	
સંખો નલિણનામા ય, કુમુઓ નલિણાવઈ.	૧૫૬
વપ્પુ સુવપ્પો અ મહા-વપ્પો વપ્પાવઇ ત્તિ ય;	
વગ્ગૂ તહા સુવગ્ગૂ ય, ગંધિલો ગંધિલાવઇ.	૧૫૭
એએ પુવ્વાવરગય વિઅડ્ઢદલિય ત્તિ નઇદિ સિદલેસુ;	
ભરહદ્ધપુરિસમાઓ, ઇમેહિ નામેહિ નયરીઓ.	૧૫૮
ખેમા ખેમપુરા વિ અ, અરિદ્ઠ રિટ્ઠાવઈ ય નાયવ્વા;	
ખગ્ગી મંજૂસા વિ ય, ઓસહિપુરી પુંડરિગિણી ય.	૧૫૯
સુસીમા કુંડલા ચેવ, અવરાઈઅ પહંકરા;	
અંકાવઇ પમ્હાવઇ, સુભા રયણસંચયા.૧૬૦	
આસપુરા સીહપુરા, મહાપુરા ચેવ હવઇ વિજયપુરા;	
અવરાઈયા ય અવરા, અસોગા તહ વીઅસોગા ય.	૧૬૧
વિજયા ય વેજયંતી, જયંતિ અપરાજિયા ય બોધવ્વા;	
ચક્કપુરા ખગ્ગપુરા, હોઇ અવજ્જા અઉજ્જા ય.	૧૬૨
કુંડુભવા ઉ ગંગા-સિંધૂઓ કચ્છ પમ્હપમુહેસુ;	
અટ્ઠટ્ઠસુ વિજએસું, સેસેસુ ય રત્ત રત્તવઇ.	૧૬૩
અવિવકિખગિણ જગઇ, સવેઇ વણમુહયઉક્ક પિહુલત્તં;	
ગુણતીસસય દુવીસા, નઇંતિ ગિરિઅંતિ એગકલા.	૧૬૪
પણતીસસહસયઉસય, છડુત્તરા સયલવિજયવિકખંભો;	
વણમુહદુગ વિકખંભો, અડવન્ન સયા ય ચોયાલા.	૧૬૫
સગ સય પન્નાસા નઇ-પિહુત્તિ ચઉવન્ન સહસ મેરુવણે;	
ગિરિવિત્થરિયઉસહસા, સવ્વસમાસો હવઇ લકખં.	૧૬૬
જોઅણ-સયદસગંતે, સમધરણીઓ અહો અહોગામા;	
બાયાલીસસહસેહિં, ગંતું મેરુસ્સ પચ્છિમઓ.	૧૬૭
ચઉચઉતીસં ય જિણા, જહન્નમુક્કોસઓ અ હુંતિ કમા;	
હરિચક્કિબલા ચઉરો, તીસં પત્તેઅમિહ દીવે.	૧૬૮
સસિદુગરવિદુગ ચારો, ઇહ દીવે તેસિં ચારખિત્તં તું;	
પણસય દસુત્તરાઇ, ઇગસટ્ઠિભાગા ય અડયાલા.	૧૬૯
પનરસ ચુલસીઇસયં છપ્પન્નડડયાલભાગમાણાઇ;	
સસિસૂરમંડલાઇ, તયંતરાણિગિગહીણાઇ.૧૭૦	
પણતીસ જોઅણો ભાગ-તીસ ચઉરો અ ભાગ સગભાયા;	
અંતરમાણં સસિણો, રવિણો પુણ જોઅણો દુન્નિ.	૧૭૧
દીવંતો અસિઅસએ, પણ પણસટ્ઠી અ મંડલા તેસિં;	

તીસહિઅ તિસય લવણે, દસિગુણવીસં સયં કમસો.	૧૭૨
સસિસસિરવિરવિ અંતરિ, મજ્જે ઇગલકખુ તિસય સાઠૂણો;	
સાહિઅદુસયરિ પણ ચય, બહિલકખો છસય સાઠહિઓ.	૧૭૩
સાહિઅ પણસહસ તિહુત્તરાઈં સસિણો મુહુત્તગઈ મજ્જે;	
બાવન્નહિઆ સા બાહિ, પઈમંડલ પઉણચઉવુડ્ઢી.	૧૭૪
જા સસિણો સા રવિણો, અડસયરિસએણ સીસએણ હિઆ;	
કિંચૂણાણં અટ્ઠાર સટ્ઠિભાગાણ મિહ વુડ્ઢી.	૧૭૫
મજ્જે ઉદયત્થંતરિ, ચઉનવઈ સહસ્સ પણસય છવીસા;	
બાયાલ સટ્ઠિભાગા, દિણં ચ અટ્ઠારસમુહુત્તં.	૧૭૬
પઈમંડલ દિણહાણી, દુણહ મુહુત્તેગસટ્ઠિભાગાણં;	
અંતે બારમુહુત્તં, દિણં નિસા તસ્સ વિવરીઆ.	૧૭૭
ઉદયત્થંતરિ બાહિ, સહસા તેસટ્ઠિ છસય તેસટ્ઠા;	
તહ ઇગસસિપરિવારે, રિકખડવીસા-ડસીઈ ગહા.	૧૭૮
છાસટ્ઠિ સહસ નવસય, પણહત્તરિ તારકોડિકોડીણં;	
સન્નંતરેણમુસ્સેહં, ગુલમાણેણ વા હુંતિ.૧૭૯	
ગહ રિકખ તારગાણં, સંખં સસિસંખ સંગુણં કાઉં;	
ઈચ્છિયદીવુદ્દહિંમિ ય, ગહાઈમાણં વિઆણેહ.	૧૮૦
ચઉ ચઉ બારસ બારસ, લવણે તહ ધાયઈમ્મિ સસિસૂરા;	
પરઓ દહિદીવેસુ અ, તિગુણા પુવ્વિલ્લસંજુત્તા.	૧૮૧
નરખિત્તં જા સમસેણિ, ચારિણો સિઘ સિઘતર ગઈણો;	
દિટ્ઠિપહમિંતિ ખિત્તા ણુમાણઓ તે નરાણેવં.	૧૮૨
પણસય સત્તતીસા, ચઉતીસસહસ્સ લકખઈગવીસા;	
પુકખરદીવડ્ઢનરા, પુવ્વેણ અવરેણ પિચ્છંતિ.	૧૮૩
નરખિત્તબહિં સસિરવિ-સંખા કરણંતરેહિં વા હોઈ;	
તહ તત્થ ય જોઈસિયા, અચલદ્ધપમાણસુવિમાણા.	૧૮૪
જંબૂ પરિહિ તિલકખા, સોલસહસ દુસય પઉણઅડવીસા;	
ઘણુ અડવીસસયંગુલ, તેરસસડ્ઢા સમહિઆ ય.	૧૮૫
સગસય નઉઆકોડી, લકખા છપ્પન્ન ચઉનવઈ સહસા;	
સડ્ઢસયં પઉણદુકોસ, સડ્ઢબાસટ્ઠિઠકર ગણિઅં.	૧૮૬
વટ્ટપરિહિં ય ગણિઅં, અંતિમખંડાઈ ઉસુજિઅં ય ઘણું;	
બાહું પયરં ય ઘણં, ગણેહ એએહિં કરણોહિં.	૧૮૭
વિકખંભવગ્ગદહુગુણ-મૂલં વટ્ટસ્સ પરિરઓ હોઈ;	
વિકખંભપાયગુણિઓ, પરિરઓ તસ્સ ગણિઅપયં.	૧૮૮
ઓગાહુ ઉસૂ સુચ્ચિઅ, ગુણવીસગુણો કલાઉસૂ હોઈ;	
વિઉસુપિહુત્તે-ચઉગુણ-ઉસુગુણિએ મૂલમિહ જીવા.	૧૮૯
ઈસુવગ્ગિ છગુણિ જીવા-વગ્ગજુએ મૂલ હોઈ ઘણુપિટ્ઠં;	
ઘણુદુગ-વિસેસ-સેસં, દલિઅં બાહાદુગં હોઈ.	૧૯૦
અંતિમખંડસ્સિગુણા, જીવં સંગુણિઅ ચઉહિં ભઈઊણં;	
લદ્ધમિ વગ્ગિએ દસ-ગુણમ્મિ મૂલં હવઈ પયરો.	૧૯૧
જીવા-વગ્ગાણ દુગે, મિલિએ દલિએ અ હોઈ જં મૂલં;	
વેઅડ્ઢાઈણ તયં, સપિહુત્તગુણં ભવે પયરો.	૧૯૨
એયં ય પયરગણિઅં, સંવવહારેણ દંસિઅં તેણં;	
કિંચૂણં હોઈ ફલં, અહિઅં પિ હવઈ સુહુમગણાણા.	૧૯૩
પયરો સોસ્સેહ-ગુણો, હોઈ ઘણો પરિરયાઈ સવ્વં વા;	
કરણગણાણાલસેહિં, જંતગલિહિઆઉ દટ્ઠવ્વં.	૧૯૪
ગોતિત્થં લવણોભય, જોઆણ પણનવઈસહસ જા તત્થ;	
સમભૂતલાઉ સગસય જલવુડ્ઢી સહસમોગાહો.	૧૯૫
તેરાસિએણ મજ્જિલ્લ-રાસિણા સંગુણિજજ અંતિમગં;	

તં પદમરાસિભઇઅં, ઉવ્વેહં મુણસુ લવણજલે.	૧૯૬
હિટ્ટુવરિ સહસદસગં, પિહુલા મૂલાઉ સતર-સહસુચ્ચા;	
લવણસિહા સા તદુવરિ, ગાઉદુગં વડુદઇ દુવેલં.	૧૯૭
બહુમજ્જે ચઉદિસિ ચઉ, પાયાલા વચરકલસસંઠાણા;	
જોઅણસહસ્સ જડા, તદ્દસ-ગુણ હિટ્ટુવરિ રુંદા.	૧૯૮
લકખં ચ મજ્જિત્ત પિહુલા, જોઅણલકખં ચ ભૂમિમોગાઢા;	
પુવ્વાઇસુ વડવામુહ-કેજુવ જૂવેસર-ભિહાણા.	૧૯૯
અન્ને લહુપાયાલા, સગ સહસા અડસયા સચુલસીઆ;	
પુવ્વુત્ત-સચંસ-પમાણા, તત્થ તત્થ પ્પએસેસુ.	૨૦૦
કાલો અ મહાકાલો, વેલંબ પભંજણો અ ચઉસુ સુરા;	
પલિઓવમાઉણો તહ, સેસેસુ સુરા તયદ્ધાગી.	૨૦૧
સવ્વેસિમહોભાગે, વાગી મજ્જિત્તલ્લયમ્મિ જલવાગી;	
કેવલ-જલમુવરિલ્લે, ભાગદુગે તત્થ સાસુવ્વ.	૨૦૨
બહવે ઉદારવાયા, મુચ્છંતિ ખુહંતિ દુન્નિવારાઓ;	
એગ-અહોરત્તંતો, તયા તયા વેલપરિવુડ્ઢી.	૨૦૩
બાયાલ સટ્ટિઠ-દુસચરિ, સહસા નાગાણ મજ્જુવરિ બાહિં;	
વેલં ધરંતિ કમસો, ચઉહત્તરુલકખુ તે સવ્વે.	૨૦૪
બાયાલ સહસ્સેહિં, પુવ્વેસાણાઇ-દિસિવિદિસિ લવણે;	
વેલંધરાણુવેલં ધરરાઈણં ગિરિસુ વાસા.૨૦૫	
ગોથૂભે દગભાસે, સંખે દગસીમ નામિ દિસિ સેલે;	
ગોથૂભો સિવદેવો, સંખો અ મણોસિલો રાયા.	૨૦૬
કક્કોડે વિજ્જુપભે, કેલાસ રુણપ્પહે વિદિસિ સેલે;	
કક્કોડગુ કદમઓ, કેલાસ રુણપ્પહો સામી.	૨૦૭
એએ ગિરિણો સવ્વે, બાવીસ-હિઆ ચ દસસયા મૂલે;	
ચઉસય ચઉવીસહિઆ, વિચ્છિન્ના હુંતિ સિહરતલે.	૨૦૮
સતરસસય ઇગવીસા, ઉચ્ચત્તે તે સવેઇઆ સવ્વે;	
કણગંક રયય ફાલિહ, દિસાસુ વિદિસાસુ રયણમયા.	૨૦૯
ણવ ગુણહત્તરિજોઅણ, બહિજલુવરિચત્ત પણ નવઇ ભાયા;	
એએ મજ્જે નવસય, તેસટ્ટઠા ભાગ સગસચરિ.	૨૧૦
હિમવંતંતા વિદિસી સાણાઇગયાસુ ચઉસુ દાઢાસુ;	
સગ સગ અંતરદીવા, પદમચઉક્કં ચ જગઇઓ.	૨૧૧
જોઅણાતિસએહિં તઓ, સયસયવુડ્ઢી અ ઇસુ ચઉક્કેસુ;	
અન્નુજગઇઅંતરિ, અંતરસમવિત્થરા સવ્વે.	૨૧૨
પદમચઉક્કુચ્ચ બહિં, અડ્ઢાઇઅજોઅણે અ વીસંસા;	
સચરિંસ વુડ્ઢિપરઓ, મજ્જાદિસિં સવ્વિ કોસદુગં.	૨૧૩
સવ્વે સવેઇઅંતા, પદમ-ચઉક્કમ્મિ તેસિ નામાઇ;	
એગોરુઅ આભાસિઅ, વેસાણિઅ ચેવ લંગૂલે.	૨૧૪
બીઅચઉક્કે હયગય, ગોસક્કુલિપુવ્વ કણનામાણો;	
આયંસ મિંદગ અઓ-ગોપુવ્વમુહા ય તઇઅમ્મિ.	૨૧૫
હય ગય હરિ વગ્ઘ મુહા, ચઉત્થએ આસકણુ હરિકણણો;	
અકણણ કણણ પાવરણુ, દીઓ પંચમચઉક્કમ્મિ.	૨૧૬
ઉક્કમુહો મેહમુહો, વિજ્જુમુહો વિજ્જુદંત ઇટ્ટમ્મિ;	
સત્તમગે દંતંતા, ઘણ-લટ્ટ-નિગૂઢ-સુદ્ધા ય.	૨૧૭
એમેવ ય સિહરિમ્મિ વિ, અડવીસં સવ્વિ હુંતિ ઇપ્પન્ના;	
એએસુ જુઅલરૂવા, પલિઆ સંખંસ-આઉ નરા.	૨૧૮
જોઅણ દસમંસત્તણૂ, પિટ્ટિઠ કરંડાણ મેસિ ચઉસટ્ટઠી;	
અસણં ચ ચઉત્થાઓ ગુણસીદિણ વચ્ચ પાલણયા.	૨૧૯
પચ્છિમદિસિ સુત્થિઅ, લવણસામિણો ગોઅમુત્તિઇગુદીવો;	

ઉભઓ વિ જંબુલાવણ, દુ દુ રવિ દીવા ય તેસિં ચ.	૨૨૦
જગઇપરુપ્પરઅંતરિ, તહ વિત્થર બાર જોઅણ સહસ્સા;	
એમેવ ય પુવ્વદિસિં, ચંદચઉક્કસ્સ ચઉ દીવા.	૨૨૧
એવં ચિઅ બાહિરઓ, દીવા અટ્ટઠટ્ટપુવ્વપચ્છિમઓ;	
દુ દુ લવણ છ છ ધાયઇ સંડ સસીણં રવીણં ચ.	૨૨૨
એએ દીવા જલુવરિ, બહિ જોઅણ સડ્ઢઅટ્ટઠસીઇ તહા;	
ભાગા વિ અ ચાલીસા, મજ્જે પુણ કોસદુગમેવ.	૨૨૩
કુલગિરિપાસાયસમા, પાસાયા એસુ ષિઅણિઅપહૂણં;	
તહ લાવણ-જોઇસિઆ, દગફાલિહ ઉડ્ઢલેસાગા.	૨૨૪
જામુત્તરદીહેણં દસસય-સમ-પિહુલ પણસયુચ્ચેણં;	
ઉસુચાર ગિરિદુગેણં, ધાયઇસંડો દુહવિહત્તો.	૨૨૫
ખંડદુગે છ છ ગિરિણો, સગ સગ વાસા ય અરવિવરરૂવા;	
ધુરિ અંતિ સમા ગિરિણો, વાસા પુણ પિહુલપિહુલયરા.	૨૨૬
દહકુંડુડુત્તમમે રુમુસ્સયં વિત્થરં વિઅડ્ઢાણં;	
વટ્ટિગિરીણં ચ સુમેરુવજ્જમિહ જાણ પુવ્વસમં.	૨૨૭
મેરુદુગં પિ તહ ચ્ચિઅ, નવરં સોમણસ હિટ્ટુવરિ-દેસે;	
સગ-અડ-સહસ ઊણુ ત્તિ, સહસપણસીઇ ઉચ્ચત્તે.	૨૨૮
તહ પણનવઇ ચઉણઉઅ, અદ્ધચઉણઉઅ અટ્ટઠતીસા ય;	
દસ સયાઇ કમેણં, પણઠાણ પિહુત્તિ હિટ્ટઠાઓ.	૨૨૯
ણઇકુંડદીવવણમુહ, દહ-દીહરસેલ-કમલવિત્થારં;	
ણઇઉડત્તં ચ તહા, દહ-દીહત્તં ચ ઇહ દુગુણં.	૨૩૦
ઇગલકખુ સત્તસહસા, અડસય ગુણસીઇ ભદ્દસાલવણં;	
પુવ્વાવરદીહં તં, જામુત્તર અટ્ટઠસી ભઇઅં.	૨૩૧
બહિ ગયદંતા દીહા, પણ લકખૂણસયરિસહસ દુગુણટ્ટઠા;	
ઇઅરે તિલકખ ઇપ્પન્ન, સહસ્સ સય દુન્નિ સગવીસા.	૨૩૨
ખિત્તાણુમાણઓ સેસ, સેલ-નઇ-વિજય-વણમુહાયામો;	
ચઉલકખ-દીહ વાસા, વાસ વિજય-વિત્થરો ઉ ઇમો.	૨૩૩
ખિત્તંક-ગુણ-ધુવંકે, દો સય બારુત્તરેહિ પવિભત્તે;	
સવ્વત્થ વાસવાસો, હવેઇ ઇહ પુણ ઇય ધુવંકા.	૨૩૪
ધુરિ ચઉદ લકખ દુસહસ, દોસગણઉઆ ધુવં તહા મજ્જે;	
દુસય અડુત્તર સત્ત-સટ્ટિઠ સહસ ઇવ્વીસ લકખા ય.	૨૩૫
ગુણવીસ સયં બત્તીસ, સહસ ગુણયાલ લકખ ધુવમંતે;	
નઇગિરિવણમાણવિસુદ્ધ, ખિત્તસોલંસપિહુ વિજયા.	૨૩૬
નવસહસા ઇસય તિઉ-ત્તરા ય ઇચ્ચેવ સોલભાયા ય;	
વિજયપિહુત્તં નઇગિરિ, વણવિજયસમાસિ ચઉલકખા.	૨૩૭
પુવ્વં વ પુરી અ તરુ, પરમુત્તરકુરૂસુ ધાઈ મહધાઈ;	
રુકખા તેસુ સુદંસણ-પિયદંસણનામયા દેવા.	૨૩૮
ધુવરાસીસુ અ મિલિઆ, એગો લકખો ય અડસયરિ સહસા;	
અટ્ટઠ સયા બાયાલા, પરિહિત્તિગં ધાયઈસંડે.	૨૩૯
કાલોઓ સવ્વત્થ વિ, સહસુંડો વેલવિરહિઓ તત્થ;	
સુત્થિઅસમ કાલ મહા-કાલ સુરા પુવ્વ પચ્છિમઓ.	૨૪૦
લવણમ્મિ વ જહસંભવ, સસિરવિદીવા ઇહં પિ નાયવ્વા;	
નવરં સમંતઓ તે, કોસદુગુચ્ચા જલસ્સુવરિં.	૨૪૧
પુકખરદલબહિજગઇવ્વ, સંઠિઓ માણુસુત્તરો સેલો;	
વેલંધરગિરિમાણો, સીહનિસાઇ નિસઢવન્નો.	૨૪૨
જહ ખિત્તનગાઈણં, સંઠાણો ધાઇએ તહેવ ઇહં;	
દુગુણો અ ભદ્દસાલો, મેરુસુચારા તહા ચેવ.	૨૪૩
ઇહ બાહિરગયદંતા, ચઉરો દીહત્તિ વીસ-સયસહસા;	

તેઆલીસ સહસ્સા, ઉણવીસહિઆસયા દુન્નિ.	૨૪૪
અભિંતરગયદંતા, સોલસલકખા ય સહસ છવ્વીસા;	
સોલહિઅં સયમેગં, દીહત્તે હુંતિ ચઉરો વિ.	૨૪૫
સેસા પમાણઓ જહ, જંબૂદીવાઉ ધાઇએ ભણિઆ;	
દુગુણા સમા ય તે તહ, ધાયઇસંડાઉ ઇહ નેયા.	૨૪૬
અડસીલકખા ચઉદસ સહસા તહ નવસયા ય ઇગવીસા;	
અભિંતરધુવરાસી, પુવ્વુત્તવિહીઇ ગણિઅવ્વો.	૨૪૭
ઇગ કોડિ તેરલકખા, સહસા ચઉચત્ત સગસય તિયાલા;	
પુકખવરદીવડ્ઢે, ધુવરાસી એસ મજ્ઞમ્મિ.	૨૪૮
એગા કોડિ અડતીસ, લકખા ચઉહત્તરી સહસ્સા ય;	
પંચસયા પણસટ્ઠા, ધુવરાસી પુકખરદ્ધંતે.	૨૪૯
ગુણવીસસહસ સગસય, ચઉનઉઅ સવાય વિજયવિકખંભો;	
તહ ઇહ બહિવહસલિલા, પવિસંતિ અ નરનગસ્સાહો.	૨૫૦
પુકખરદલપુવ્વાવર-ખંડંતો સહસદુગપિહુ દુ કુંડા;	
ભણિયા તટ્ઠાણં પુણ, બહુસ્સુયા ચેવ જાણંતિ.	૨૫૧
ઇહ પઉમ મહાપઉમા, રુકખા ઉત્તરકુરૂસુ પુવ્વં વ;	
તેસુ વિ વસંતિ દેવા, પઉમો તહ પુંડરીઓ અ.	૨૫૨
દોગુણહત્તરિ પઢમે, અડ લવણે બીઅદ્ધિવિ તઇઅદ્ધે;	
પિહુ પિહુ પણસયયાલા, ઇઅ નરખિત્તે સયલગિરિણો.	૨૫૩
તેરહસય સગવન્ના, તે પણમેરૂહિ વિરહિઆ સવ્વે;	
ઉસ્સેહપાયકંદા, માણુસસેલો વિએ મેવ.૨૫૪	
ધુવરાસીસુ તિલકખા, પણપન્ન સહસ્સ છસય ચુલસીઆ;	
મિલિઆ હવંતિ કમસો, પરિહિતિગં પુકખરદ્ધસ્સ.	૨૫૫
નઇદહઘણથણિઆગણિ-જિણાઇણરજમ્મમરણાકાલાઇ;	
પણયાલલકખજોઅણ-નરખિત્તં મુત્તુ નો પુરઓ.	૨૫૬
ચઉસુ વિ ઉસુઆરેસું, ઇક્કિક્કં નરનગમ્મિ ચત્તારિ;	
કૂડોવરિજિણભવણા, કુલગિરિજણભવણપરિમાણા.	૨૫૭
તત્તો દુગુણપમાણા, ચઉદારા થુત્તવણિણઅસરૂવે;	
નંદીસરિ બાવન્ના, ચઉ કુંડલિ રૂઅગિ ચત્તારિ.	૨૫૮
બહુસંખવિગપ્પે રુઅગ-દીવિ ઉચ્ચન્તિ સહસ ચુલસીઇ;	
નરનગસમરુઅગો પુણ, વિત્થરિ સયઠાણિ સહસંકો.	૨૫૯
તસ્સ સિહરમ્મિ ચઉદ્ધિસિ, બીઅસહસ્સિગિગુ ચઉત્થિ અટ્ઠટ્ઠ;	
વિદ્ધિસિ ચઉ ઇઅ ચત્તા, દ્ધિસિકુમરી કૂડ સહસંકા.	૨૬૦
ઇઇ કઇવય દીવોદ્ધિ વિઆરલેસો મએ વિમઇણાવિ;	
લિહિઓ જિણાગણહરગુરુ સુઅ સુઅદેવીપસાએણ.	૨૬૧
સેસાણ દીવાણ તહોદ્ધીણં, વિઆરવિત્થારમણોરપારં;	
સયા સુઆઓ પરિભાવયંતુ, સવ્વં પિ સવ્વન્નુ મઇક્કચિત્તા.	૨૬૨
સૂરીહિં જં રયણસેહરનામએહિં,	
અપ્પત્થમેવ રઇઅં નરખિત્તવિકખં;	
સંસોહિઅં પયરણં સુઅણોહિ લોએ,	
પાવેઉ તં કુસલરંગમઇં પસિદ્ધિં.	૨૬૩